



**QAFAR AFIH BARITTOK
FEDERAAL CADDOL
MASSOOWE 9^{tô} FOOTIMAK
BARTEENI MIRACSENTA**

BICISSEM:-

AMIIN MACAMMAD ACMAD (MA)

QABDALLA IGACLE BORRI (MA)

MAYSARAARACA ABTEM:

Siraaj Nuur Qali (MA) (Language Editor)

Saalic Ibraahim Qali (MA) (Content Editor)

Abubakar Macammad (MA) (Curriculum Editor)

MIIC BICA ABTEM:

Ibraahim Qabdalla Cuseen (Msc)

AYKABAB ABTEM:

Adam Qali Kabbo ((Msc)



**FEDERAL DEMOCRATIC REPUBLIC OF ETHIOPIA
MINISTRY OF EDUCATION**



HAWASSA UNIVERSITY

Qemboh addah yintibiqimeh yan XXXX,2014 I.L.L Itiyoppiyak demokraasiyyoh Ripaplikik barittô malaakak amôladih barittô maxxatih maysaasah taddiiray (GEQIP-E)Qaalam banki qokoluuy, Ingiliizik baad caddoh daddoosih exxaay,awqenta qoklaanamata gaba yessegelleeniih, “Common wealth and Development Office/FCDO, Finlanxik irô caagiidah malaakaay, Royaal norwey Embaasiy, Tengele qaalam dowaalak alaaqâ fanxi. /UNICEF), Baadak barittô qokolih massoyna (**Global Partnership for Education**) (**GPE**), kee Diini markik irô caagiidah ministerih xaquk mango marih gabat aglee kee maali qokolul tekke.

© 2014 I.L.L. Itiyoppiyak Federaal Demokraasiyyoh Repaplikik barittô malaaka. Inkih yan gar kak gaanuunut daccarsima. Orbisek misinkacâ gar kaah dagrumeh. Ta bartiyyaa kee barsiyyi kitab naharal barittô malaakak yaktubeenimih idini wonna hinnay, idini amcowwe wayya heek faxeqaynatal, axcih elektirooniksiiy, mekaanikaalah, magneetik, foto koppii, yasiggileenimiiy, wonna hinnay yatbiqeeniih yayyaaqeenim wonnay, sinaamah mataban. Itiyoppiyak Federaal Demokraasiyyoh Repaplikik Nagaarit majallatak kukti ixximak 410/2004 – Qulim gar kee cuggaanê garwah dacayri.

Barittô malaak ta bartiyyi kitab yatbiqoonuh saanih takkuh, derrek qokoleh, gabat agle edde haysiteh yan mango maritteey, hortittee kee gersi dagortih gadda gacisna. Hawaasâ Jaamiqataay, Axxis Ababah Jaamiqaataay, Bahraxaar Jaamiqat kee Jimmâ Jaamiqatalluk cattimik ta kitaabih gulgulussoo kee bicah abeenih yanin fayya le doorih kulsa gadda keenih gacisna.

Qulim gar kak dacarsimeh yan mansoofa lewannah idinik ugutak manfaqatal aselon. Qulim gar akah dacarsimeh yan caagid galab akak xageween caagid wonna hinnay, galab akak xagaanam faxxiimewaak edde yaabeenih yanin caagidih leewanna tekkeenik, sin maganak barittô malaakak leenâ maktab arat kilo (P.O.Box 1367) Axxis Ababa, Itiyoppiya.

Matbaqat abtem:

xxxxxxx MATBAQATA

F.S.Loowo xxxxxx

xxxxxxx, ITIYOPPIYA

Barittô Malaakak Angaaraw Ixxima -----XXXXX

ISBN: xxxxxxxxxxxxxxxxx

Maakama

Barittoo kee daddos sittat axaw leh taniimi. Baritto Itiyoppiyak daddos kee ayyuntiinô milaaguh maftacah tan abto kah iyyaanamak sabab tahama. Away edde nanih nan uddur sissik maddur kee baadiino/globalization kulli numul, numtin amol qusba ixxigaay, xiqtoo kee mascaba faxa. Barittô siiratih **blue print** dibuk hinnak inki baaxok siirat milallaagimta caagiidah raddi gacisam akah faxximtem tamadma.

Itiyoppiyak qusbah tan barittoo kee aydakaakan poolisi/makcâ gur qembisseeh abinah edde culteemih soddom sanatah gexak geytimta. 1994a barittoo kee aydakaakan poolisik qembissa haanam ni baaxo maadisiyyalaay, qadliinoo kee elle faxximtah tan gurral meqe xalu tuybulle. Tonnah barittô maxxat yaysiisoonuh kaxxa gibbatitte abeenih, uxiih abak geytiman.

Ta dadal bisoh haynuh, barittô malaak sanat 2014 qusubih amôladih barittô siiratih kiba kah massoye. Ta kiba axcih inkih tan madab barittok naharaay, qemboh caddooy, fanti caddoo kee nammey haytoh caddoh barittoh buxaaxii kee baritto addat yabbixe. Barittoo kee aydakaakan poolisih addal rooriseenih yanin rakiiboh tan radmoomi maqarroysaanamal hangi haytah tanim kinnuk ciggiilak barittô siiratih mansoofah massoyal miracsenta tacee. Ta barseeni miracsentaa kee barteeni kitab edde anuk anbad le gurral bartaanamih cogdal rakitam kee duddal rakitah yan xayyos addat le.

Ta qusba barittô siirat A.L.L. 2018ah gexsittah tan barittô roox mappi/**Road Map** kusaaqittee kee mabloomi leenah caddoodah kak raaqan. Qusba barittô siiratih mansoofa addatino kak barteeniit karma luk qeedaalisak, dariifah ixxigal rakitakaay elle faxxiima aracal, qusba qasirih

metteebannitte bartaanam kee barsaanamah edde xoqaysimaanamaay, mihratitte yasgalleenim kee neqem kaban baritto is xiqta barittoh qaynatah haak. Tonnaah mihraatiinuu kee metteebannittê baritto kaadu is xiqta baritto edde culusak barteenitik mango xiqto yaysaasu xiqta barittô siirata.

Faxe baaxol barittô maxxat yaysiisoonuh qusba gurral, barteenit kitoobaa kee barseenit miracsentitte yatbiqeenim faxe gurral dubuk calli takku maxiqta. Sariimaane leh yan maysaasa inkih tan maglableelah gabat agle essera. Barseeni doori barsaanamaak ilaa uguugusuuy, miraacisaanam kee koobaahisaanama fanah mango gurral milallaagimam faxximta. Ta barseeni miracsental galab akak xagen maknayittel aydakaakan keenih yantocowweh, hirgeenih.

Barseenit ta miracsenta cubbil kawsaanam kee addal galab kak xageenih yanin maknayittee kee abtoota abbinoyesak barteenit qokoltaanam faxximta.

Barittô siirat yaysiiseenim kee sarrimaane leh yan barittô mansoofa maxxat le gurral yaysiisoonuh, barittô malaak ossotinâ kusaq kee maysaasa abnuh nee xiqsissah tan tû mabulittee kee kassiisitte/anni yaysê mabla kulsa gabah hirga.

AXXIS ABABA, ITIYOPPIYA

xxxxx 2014

*ITIYOPPIYAK FEDERAAL
DEMOKRAASIYYOH RIPAPLIKIK
BARITTÔ MALAAKA*

CUTTUUKUSSO

ADDATINO

Gali

Maakama	iii
CULMÁ	v
ENEKHAYTO MAFDAGA.....	1
1. TAAMAH ABNISSOO KEE XALU	1
NAMMAYHAYTÔ MAFDAGA	19
2. 21HAYTO ADABANIH CERFATITTE.....	19
SIDOCHAYTÔ MAFDAGA	31
3. KAARIBI.....	31
FEREYHAYTÔ MAFDAGA	44
4. QADRORTI CELSIISENTA	44
KONNOY HAYTÔ MAFDAGA	61
5. QIBNAYTIINOO KEE KONNABNA	61
LECEY HAYTÔ MAFDAGA.....	72
6. SUGEET IXXIGAA KEE QAADAH ABNISSO	72
MALCIN HAYTÔ MAFDAGA	84
7. TASGALLE BARITTO	84
BACAAR HAYTÔ MAFDAGA.....	95
8. QADARA	95
SAGAL HAYTÔ MAFDAGA.....	106
9. INKITTIINOT AMOLE MAGGINTINAANE	106
TABAN HAYTÔ MAFDAGA.....	116
10. DABBÓ.....	116

CULMÁ

Ta kitab taban haytô footima barittah tan barteeniitih massoyseen Qafar afak federal caddol dooriteenih elle baritoonuwaan nammey HAYTOH afih barittoh kitaaba. Ta kitaabih bicsi bartenit mannal yakryem kee

yaktubem faxximtamaay, tu yaanamat xayuk akah radan innah mango kiraate dariifal rakuh tan caagiiday barteenit taaxigeh tanil rakitak kulli mafdagah gubal xayyoowe. Barteenit ta kiraateh addatinoona yikriyeeniih, ankaciseeniik lakal, ta kiraatek rakitak, yaabaanaah, yaktubeenim abelon. Barteeniit sinni amoh dibuk hinnay, keenillih barittah tan ken kataysiisilluk butta, buttah gacak sittak edde bartelon. Barteeniit kiraatel rakitak xayyooweh yan qusba qangor ankacisaanaah, yakriyen waqdi, geyaanah yanin waqdi, qangor figda edde bartaanaah, ken tanfiqu xiqtaah, afat loonuh yanin dudda keenik nagay dadlissu xiqta.

KITAB AMMUNTITTEH GULGULUSSO

BARITTÔ SIIRATAK RAKIIBÔ RADMOOMA

Kitab addal xayyowteh tan ammuntitte Mafdaga, mafdagah xayyowte. Kulli mafdaga issi kiraateh ammuntaa kee kulli kiraateh ammuntih gubat sidiica ammunta le kiraate le. Ta kiraateh xayyowte ammuntitte barteenit Qafar Afat akah yaaban innaay, akah ankacsan innaay, akah yakriyen innaa kee akah yaktuben innah qembô sido keenih takke. Baarteenit kulli mafdagak geyaanah yanin ixxiga wonna hinnâ may cirfat ahak irol edde yabnem keeni.

Barteenit xalti balkih ta cirfatittel essero taallen kaa tekkek, sinni xaylo wonna hinnay, ken barseenit esserra hayteenih geytaanam xiqtaanah. Ossotinah kaadu sinni xaylo mannal qokoltaanam xiqtaanah taniinim barseeniitilluk agaarada.

QANGÓR KUSAQ

Barteenit qusba qangooruuy, qangooruk baxaabaxsa le xisooy, baxaabaxsa le xoqaysooy, qangor yaybulleeh yan milaagi weeloola bartelon.

Tonnah ossotinah kaadu, barteenit takriyeeh, ankacissah tan kiraateh addak keenit matarah yan qusba qangor baritaanam xiqan. Ceelalloh:-

- Qangarak kiraateey, maqnaa kee baxaabaxsa le xoqayso edde bartelon
- Inki qaynatih maqna leh yan gersi qangor kaadu edde bartelon
- Footimah addaa kee footimak irol (Ceelalloh: - buxa wanna hinnay, dariifah ayyuntalih abaanah yanin yab kee kutbel inkih qangoorut xoqaysimelon.

KAWSEENIH CEDAANAM

Barteenit takriyeh tan kutbe mannal hangi akah acuyya hayteh yakriyeenim kee mannî nal ken cultam bartelon. Tahak ossotinah kaadu, yikriyeenih yanin kutbel rakitak massowteh tan yaabaanam kee yaktubeenimih abtootat gaba assagallelon. Ta abtoota ciggiltah tanim addat lem xiqqimtah.

- Kiraate elle xissimteh tan ammuntal agaaradaanam,
- Kiraatek naharat fayramisaanam,
- Faxxiima qangor edde bartaanam kee keenil agaaradaanam
- Aakam kiraateey, kiraatê gexsit kee kiraatek barteenimih esseroora esseraanam kee gacsaanama,
- Kiraate wagsissaamal footimah addal gersi barteeniitillih agaaradaanama,
- Kiraate wagittaamal sinni mabla akah yaceen innah ken absiisaanama,
- Kiraateh xayyoowe ammunta wagsissah tan caaggiidal footimah addal abaanam xiqaanah yanin aydaaditteey, gabbaaqitteey, ransâ kutbeeba keenih acayuk akah aban innah keenik abaanama.

SISSIK KAWSA

Barteenit kutbe ken caddol elle takkeh tan sissikaay, massat axcih argiggiqe kal yakriyeenim kinnim baxxaqqa luk elle tantaabbê nal anay fayya heenih akriyelon.

QANGOORUUY, ANKACTUU KEE YABTI CIRFATA

Barteenit yakriyeenim kee Ankacisan kutbel hangi haanam kak bartelon. Ossotinah kaadu Ankacisaanam takku yakriyeenim kiraate rakiibo abak gabat agle edde haysitelon. Taamitaanah yaniinim ciggiltam addat lem xiqqimtah.

- Ankacsi kiraateh ammuntal agaaradaanama,
- Ankacisaanamak naharat fayramisaanam
- Maftacah yan qangor bartaanam kee keenil agaaradanama
- Aakam ankacsaay, Ankacsi gexsit kee ankacsak bartaanamih esseroora esseraanam kee gacsaanam,
- Gersi barteenitilluh ankacisak kiraatel footimah addal agaaradanama,
- Ankaciseenih yanin kiraatel agaaradaanamaay, numtin amô mabla xayyoosaanama.
- Ankacsuh xayyoowe ammunta wagsissah tan caagiidal footimah addal abaanam xiqqaanah yanin aydaaditteey, gabbaaqitteey, ransâ kutbeeba keenih acayuk akah aban innah keenik abaanama

YABTI-RAKIIBO

Barteenit afak yemeexege xisneh exxaaxi, ceelalloh:- Tiinooy, maggaay, migooqaay, yan warguuy, tatre warguuy, ciggiileey, abnaay, maxcâ maafô baarisiyyaa kee xoqaysimiyya bartelon.

ENEKHAYTO MAFDAGA

1. TAAMAH ABNISSOO KEE XALU

Mafdagah hadafitte

Barteenit ta mafdaga barteeniiik lakal yaalloonuwaan xiqto:

- Afti barittoh addal taamâ gabbatuu kee taamâ xali maca kinnim ankacselon
- Fakut tan kutbeyta ankacisak foxo lekke akak kibanam abelon
- Ankacsiyyaa kee ankacsiyyi ellebarittota abaanama
- Walaliyya gexselon
- Addatiinok yaabanama
- qunxa qunxa hortah gacak aban hokkatittet yaabanam kee gabat-agle haysitaanam
- Yakriyeenih ascossitte baxsanam
- Hadal kutbe abanama
- Sahnâ giddanimil yaktubeenimi
- Xayyowte kutbe yaktubeenim kee dudusaanam
- Qangor fidgal maca tanim axmiqelon
- mango kutbeeba abaanam
- dikshinerih qangor addafakoot akah abak maqnisaanama

Addâfakootu:

Taamah abnisso akak iyyanam taama elle abanah, abbinoyan gurra kinnim kee mango abtootay, abbak baxal naggarsimtay, naggarinna deqsita mihrattat feera maqanet fanni gurral mango uwwa bicisak sugen ta uwwi kaadu sugeet mettebannih uwwa deqsittah, abtoh tenek kaadu sugget raata innam xiqnah.

1.1. **INIKHAYTOH EXXA: ANKACSI KAWSA (40 Minit)**

1^{haytoh} Ayyaama

QUNXAANEYTAA KEE TAAMA

1^{hattoh} Ayro

Asaaki barittoh ximmooma

- **Ankaacsi kawsa**
- **Ankacsi kawsak elle barittoota bisaanama.**

1.1.1. ANKACSI MAAKAMA(8 Minit)

Barseena: Asaaku siinih akrayuwaam, “taamaa kee qunxaaneyta” iyya ammuntal xayyoowe, ankacsi kiraate siinih akriyek naharal isin isih kak taaxigeenimit elle yabtan ankacsan naharal aakam esseroora gacsetton. Naharsi namma essero anu siinih gacissa heeh, raqteh tan esseroora too weelol isin gacsetton. Naharsi essero, **Taamaa kee xaluk angaaraw macaay?** Ittah tan essero nableh nan waqdi, inki faxe taamay abbinosnah nanik geynah nanim xalu innam xiqnah, ken tasgoorowem, kaadu, faxe taamay abba haana tamqay, taamay xalul rakuh tan iyyeenih gacsaanam xiqaanah.

[Raddi sabbuural keenih aktabuk keenih baxxaqis]

Barteenit: Barseeni siinih elle yascasse gurral, sabbuural siinih yuktube kutbe sinni xaftaaral aktabuk, hangi akah acuwwa haysay kattaata.

Barseeni: Qunxaaneytaa kee taamah angaaraw maca siinit celtaa?

[Barteenit: Faxemih qusba cayla leeh, qusba mabla leeh, faxe qaynatih taama aracat haytu xiqtam qunxaaneyta, tohih sabbatah qunxaaneyti taama hadlaah, abbinoosaanamal kaxxa doori lon iyyeenih gacsaanam xiqaanah]

Barseeni: Qunxaaneyti baaxô dadalah le doori macaay?

[Qunxaaneyti, mablal taamal, caylal, baaxol yakkeh yan daddos cataanaah, dadlisaanamal qembot geytimah yan ayyunti exxaaxi.]

Barseeni: Xalu le taama taamitaanam, le numuh, gersi marah,

[Barsteenit, baxaabaxsa le radditte gacsaanam xaqaanah]

1.1.2. ANKACSI GEXSIT (12 Minit)

“Qunxaaneytaa kee taama” iyya ammuntal xayyoowe kiraate, barseeni, barteenitih yakriyeh yan waqdi, lafa, lafa le ximmo, akah yaktuben innaa kee kiraatek amakkaquk foxooxa akah iban innah abam faxximta. Barteenit kaadu barseeni keenik elle iyyah yan gurral hangi akah acuyya heenih ankacisaanam kee fakut tan arooca kibaanam kfaxximta.

Ciggiltah tan esseroorak Ankacisseenih tanin kiraatek ugutak fakut tan arooca qarwali addat yan qangor edde kibakgacisa

Misinkacâ qayxiinxinna	Ugugus	Qunxaaneyta	Qaalamal
Rufto le mano	Manô milaaguh	fayxii	

1. Faxe _____ inki baaxok kaxxa gaddi _____..
2. Faxeemik daga _____yallemih fayxi lem qunxaaneyta
3. Yimixxige mari qidaddok is xiqam mango marah _____xiqtam mali.
4. Kullimik lafitak _____nagrisan urri faxe wak yassasaqqeenim maxiqan.
5. Taama hadlaanamih saami leh yan qunxaaneyti exxaaxik taama_____kee_____ken barisnam faxximta..

FOXO KIBÂ GACSA

1. Qaalamal, Qunxaaneyta
2. Rufto le mano
3. Manô milaaguh
4. Misinkacâ qayxiixinna
5. Uguugus kee Fayxi

QUXAANEYTA KEE TAAMÁ

Faxe qaalamal inki baaxok kaxxa gaddi qunxaaneyta. Ta qunxaaneyta akak iyyan cayli mangom taamitam xiqaaq mangom yacsubem xiqqa Cayla. Tah yaanam kaxxam qusbam hadlaanamay, caylat qagaaqagidak taamitanam xiqaanam kee edde qagamqagtem duudusam xiqamih xiqto le ayyunti exxa kinni. Faxeemik daga ruftole mano yallemih fayxi lem qunxaaneyta, tah kaadu aracat kaah gactuh kullumik daga taamittam faxximtam qunxaaneyta. Yimixxige mari qidaddok is xiqam mango marah manô milaaguh xiqtam mali.

Kullimik lafitak misinkicâ qayxiixinna nagrisan urri faxe wak yassasaqeenim maxiqan. Tohiih taagah taama hadlaanamih saami leh yan qunxaaneyti exxaaxik taama fayxii kee uguugus ken barisnam faxximta.

Tonna leemik amakkaquk qunxaaneyti dubuh yeexegen taamomit sinni axawah haak mano sinnik ceenisanam hinnay baarlekkel abaluk taama hadlaanam kee isinni gabbatul mangom abaanam xiqaanam bartaanam faxximta. Mangom abeh yan num mangoh yan culenta geyaah mano kaak xayikkeek massowtam dudda

1.1.3. ANKACSAK CEDEENIM (10 Minit)

Barseeni: Ankacsak cedeenimih esseroora namma qaynatah kurak nablem xiqna. Enek haytoh exxa, gacsa kak saanih kiraateh addak akak geytima esseroora kee nammey haytoh exxa kaadu, sinnih akak yaaxigeenimit yaabak kusaaqisak gacsaanah yanin esseroorah tan.

Taway, taamitnu waynah nanim gacsi kak saanih kiraateh addak geynan kak xiqnah nan esseroora.

Kassiisi

Barteenit, saanih kiraateh addak gacsa elle geyaanam xiqan gurra ken ayballayuk, gacsan, raddi sabbuural keenih haak keenih baxxaqis.

Ciggiltah tan esseroora Ankacisseenih tanin kawsak ugutak **Numma** axcek, **Diraaba** axce akkuk, afak gacisa

1. Qunxaaneyti mangom yascubem xiqa cayla.
2. Baaxo dadaltam xiqtam, kulli buxah marih qedaddo fayya itta waqdi.
3. Qunxaaneyti baaxoh xiqam mali.
4. Kulliimik lafittam misinkacâ qayxiixanna.
5. Qunxaaneyti faxe waqdi, meqe mano yaalleemih fayxi mali

DIRAB KEE NUMMAH ESSEROORAH GACSA

1. Numma
2. Numma
3. Diraaba
4. Numma
5. Diraaba

1.2. NAMMAY HAYTOH EXXA YAABIYYA (10 Minit)

Barseeni: Horta, hortah gacak kulli hortak nammay, nammay akkuk tahak gubal yan mablâ garayih qaynatih mablâ-garay bicisak barteenit focal kulli hortak awlaytitte ayyaaquk akah yaaban innah keenih abtam faxximta.

[Barseena: Mabla keenik sababal rakittak waytam abaluk, gacsan raddi, afak keenik esserak akah gacsan innaa kee hoxa keenih gacisak elle agaarada

2^{hattoh} Ayro

Asaaki barittoh ximmooma

- **Yaabiyya**
- **Yaabak cedeenim.**

TAAMÂ MABLA- GARAYA

• Qali: Maacissee?	↔	Casan Maacissee.
• Qali : hayyeh acmaadow tah mannay, macaalay	↔	Casan alcamdulillah
• Qali : hayyeh munkaq muquk taama mabla garayah nee fan temeteh	↔	Casan gadda gey
• Qali : hayyeh acmadow inki inki esseroora koo esseruh gulgul tani	↔	Casan yey
• Qali: taama akak iyyaanam ku mablal baxxaqisam may xiqtaah?	↔	Casan taama akak iyyanam anu elle akkale innal inki num isil tanimiy, kak qambalsimtam abbinoysoah xalu fan baahanamih gexsiti.
• Qali: kaxxam meqe gacsak taamah	↔	Casan taamah abbinoysiyya akak iyyanam taamitanah mexxat le abnissol taama xalu bahsiisonuh aban macala.
• Qali: meqehik acmadaow taamah cultuh mañnah yan qaaqa kok qambalsimtam kot celtaah?	↔	Casan meqehiiy fiiruk taama yassakaxxenimiy, amantiinoy, saaqatal geytimanamay, taama kacanuy, fayxi kee ayfawal yaaminemi.
• Qali: hay taamah addal gexe kalit kot yekkek mannal akak assaqettoh?	↔	Casan taamat gexe kalit yok takke caalota tenek taama yollih gexsa horta lih gacak walal afdige liyo.
• Qali : kaxxam meqe gacsay kulsale	↔	Casan gadda mali makkin.

1.3.1. YAABAK CEDEENIM

Barseena: Mabla keenik sababal rakittak waytam abaluk, gacsan raddi, afak keenik esserak akah gacsan innaa kee hoxa keenih gacisak elle agaarada. Barseeni, esseroora seecaah, barteenit, raddi gacisak gexisaanama.

Barseeni: Dagal siinih xayyooweh sugeh yan namma numih walalak maca ceddeenii?

[Barteenit: Kaxxam meqe massakaxxa leeh, baxxaqqa le gurra iyyanam xiqaana]

Barseeni: Kaxxa meqe gacsa, Walal addat siinit yuqussube qangor may yan?

[Barteenit: Yeey yanih, ceelalloh nableh nan waqdi, qaaqa, gulgulu iyya qangor yoh maqaddoowo iyyaanam xiqaanah]

Barseeni: Tawalal siinih elle xayyoowe gurra maca tekkeleenii?

[Barteenit, tawalalak iroh baxaabaxsa le raddi gacsaanam xiqan]

Barseeni: Ta nammayak temeetem iyyaay, elle yemeetem iyya kinnim may ceddeeniih? Mannalaay?

[Barteenit: Yeey cedneh, temeetem macammadaay, elle yemeetem Acmada. Akah kinnim, yemeete num assalaamaqleykum iyyaah suge num yakuqeeh, tohih sabbata iyyaanam xiqaanah]

Barseeni: Tawalalal, yaabak culmak mawqa dacriseenim siinit celtaa? Mannalaay?

[Barteenit: Yeey, net celtah, akah kinnim, yaabak culmal salaamatak qembiseeh, ellacabol gadda sitta gacisak yumurruqeenimih sabbata iyyaanam xiqaanah]

1.4. **SIDOCHAYTOH EXXA:** KAWSA (30 Minit)

3^{hattoh} Ayro

Asaaki barittoh ximmooma

- Kawsa
- Kawsak elle barittoota bisaanama.

1.4.1. KAWSI MAAKAMA (5 Minit)

1. Taamitekal dadalaanam xiqaanam siinit may celtaa?
2. Taamat gexe kalit takku xiqtam maca siinit celtaa?

3. Meqe caddo maadnuh abnam faxximtama maca siinit celtaa?
4. Taamitekala dadle mara may taaxigen sin dariifal
5. Taama uma taamaa kee meqe taama lem siinit celta?
6. Sin dariifal taamite waan taamay, waaso le may taaxigen?

1.4.2. KAWSÍ GEXSITI (15 minit)

“Taamitekela hambareeranama” iyya ammuntal xayyoowe kiraate barteentik anay addah hayya hayteenih kulli num siinnih yakriyeemi.

TAAMITEKAL HAMBAREERANAM

Dumah yen daban dannaba deqsita buqree buqre abeeni yen. Usug ummaan is buqre yabqureenimil cawlekal taamitak yen. Ayrok, ayrok teena, Bunkatoo kee Ceerisa deqsitta garoqti allak buqre yabqure dannabat inti keenik radde. Usug buqre elle aba aracal kaal malseenihi, Bunkato qalek derret yan dabbat gacca iyyeh, Deero qideeh, “qiiy, qiiy” iyyeh yoo cata, yoo cata, axcuk deeriseeh, yan waqdi, Dannaba isi taamal nacurta le taama abeynak teneemih sabbatah, abak suge taama soolissa heeh, akket tekkem macaay, kaa catâ gidih wonnah yerde waqdi, Ceerisa kaadu ciggilli heeh buqre edde abak suge awurwak tiyak teena kaak garaqqa heeh, Dannaba Bunkato fanah elle gufekkel “akki yaalo macaay, maca kot tekkeeh?” kaak iyye. Bunkato inki awurut buqre yabqure num uble kaak iyye.

Dannaba buqre fanah wagga hee waqdi, kay awurwak inki lac anawaamat rade. Tokkel gawra fanah yerdeh yuduure waqdi, Bunkato raaqe awur kaak garqe. Tokkel dannaba kaxxam cakkumteeh, takkay immay, kaxxam akah madanano. Duyye beytem ken kennim yismiteeh, tibba iyyeh, elle sugga iyyeh, gersi saaku magaalal qadaagâ booxal yongooroweenih, taama fanxa kaak iyyen. Tokkel Dannaba kaxxa gaddalik teneeh, ken yexeegeeh, oson kaa maxaggoonuuy, “taamat anu sin heeyyo” keenik iyye. Akah iyyennaah, buxah ken beyya heeh, kaxxa kalqat ken culussu heeh, taamat ken hayya hee.

Tamakkel taamitaay, tama qarik addat yan golik addat lakqô kazna tanîmay, dacrisa keenik iyye.

Tokkel xiineeniih, maaciseeniih, taama elle abaanamal, garqah hambarer le Bunkato lakqo edde tan arac tan xayyowwa iyyeh, too golit gaba rubba hee wak golit sugte lakqo amol afol (Maashiin) sugeemih sabbatah gaba mogoyul kaak yirgiqeeh, tamah ableweeh yan Ceeris akke yoo cabtaa iyyeeh, nama gaba inkih edde culseeh, nama gaba inkih kaak tiggiriqqe. Tamakkel keenit tekkem oson duma aben uma taama keenil tuduurem yeexegeh yan kataysis ken gufte kasaara luk sinni buxah yuduuren.

1.4.3. KAWSEENIH CEDAANAM (10 Minit)

Barseeni: Tahak gubal siinih xayyowteh tan “taamitekal hambareeranama” iyya kawsa, kawisseeniik lakal akak ceddeenimih esseroora gacsetton. Ta esseroora gacisaanah tanin waqdi, barseeni, esseroora siinih akrayuk isin ceela gacsa ankacisseenih tanin kiraatek ugut abak gacisa.

BARTEENITIK TAAMITA

- A. “Taamitekal hambareeranama” yaanam macaay? Ceelalloola ugusak elle agaaraday, gacisa.
- B. “Cawlekal taamitak yen” iyyaanam maca siinit celtaa?
- C. Dannaba abak suge taama soolissa heeh akah gexem macaay?
- D. Dannaba awurwa kaak beyte garaaqa gee waqdi, tibba keenik akah iyyem maca siinit celtaa?
- E. Dannaba taamat ken elle hee aracal lakqô kazna kah heeh cabem macaay?
- F. Ceeris kee Bunkatok nanu maca baritnam xiqnaa?
- G. Dagal neh xayyooweh yan kiraatek maca baritnam xiqnaa?

1.5. **FEREY HAYTOH EXXA** AKTUBIYYA (40 Minit)

4^{hattoh} **Ayro**

Asaaki barittoh ximmooma

- Aktubiyya
- Baxaabaxsa le ayyuftitte yaktubeenimi.
- Qangor figda

1.5.1. TAAMAH AYYUFTITTE (10 Minit)

Barseeni: Taamah ayyuftitte lafaluk namma exxah kurrumta. Tohuuy, biiroh caddol yaktubeenih yanin ayyuftaa kee numtin amô taamah ayyufta yakken. Biirok yaktubeenih yanin ayyuftitte yaktubeenih yanin waqdi, numtin amoh ayyuftak baxsa edde leemih biirok elle tewqeh tan ixxima edde haak tawqeeh, tonnah numtin amoh naktubeh nan ayyufta tekkek ixxima mali. Nammayak inkih elle yaktuben innih afkan ahak gubal kattaata. Tah yaanam uxxuuk, nableh nan waqdi, **Madab** ayyufta iyyaanam doolat taama abeeni gersi doolat biiroh ruuba farmoy mahtamaay,ixxima kee feera wara inkih le ayyufta madab ayyufta deqsitta. **Madab sinni** ayyufta yaanam: kaadu, kataysa kataysah ruuba mahtamaay,ixxima kee feera wara sinnim madab sini ayyufta deqsitta.

Kassiisi:

Baxaabaxsa le ayyuftitteh ceelalloy, barseenitih baxxaqissah tani barteenit inkih elle cedam xiqá gurrá axcih dagar erkenna leh yan maabbaa kee mabalak inkih tqabi le barteenit cubit haak keenih akrayuk, ayti taqabi le barteenit foocat haak sabbuural keenih aktabuk keenih baxxaqis.

Barteenit: Qokol faxa barteenit qokolak sittak baritak, barseeni sabbuural siinih heeh yan baxxaqisso sinni xaftaaral korisak, barseena elle faxximtannal hangi kaah acayuk kaa kattaata. Horta, hortah gacak, biiroh ayyuфта yaktubeenim kee mariiy, marah abaluk sitta massoosaanam faxximta.

BIIROH AYYUFTA

Dagah amoh muhri

Ixxima: _____

Ayro: _____

_____h

(Magaala) _____

Caagid: _____

_____.



Salaamatta luk

Sumaqa _____

Migaq kaxxabba fan

(Qaaqa)

Miic: 1.5. Biiroh ayyuftih ceelallo

1.5.1.1. NUMTIN AMÔ TAAMAH AYYUFTA (10 Minit)

Numtin amoh taamah ayyufta akak iyyanam inki num taamâ gorantoh yaktube kutbeytay isih leh yan fayxi kee xiqto elle baxxaqisa kinni. Ta ayyufti mangoh yan oytitteey amlime samlissuh dudda le ascossa kee baxxaqsa addat le yan. Taama baxxaqsih ayyufti inki num mannah tan barittoh caddoy, baritto qaynatay, caalatay, abak raag kee fayxi inkih addat le ayyufta.

1.5.1.2.ASSABALTAH CEELALLO

Barseeni: Tasaaku takkel siinih xayyowteh tan assabaltah ceelallok ugutak, kulli barteenit taceelallok ugutak, buxâ taamah isih faxan amuntal, assabalta yuktubeenih akah baahan innah abak, abeenim num, numuh keenik miizaanisaanama.

ASSABALTA

Ayro: _____

Ay/Bar/Ayd/Kol/Qaf/A/ exxa

Aysaqiita

Anu haakito qali deqsita. Barittoh caddo yok nammay haytoh degriiy, Qafar af kee feerayso- wag exxak 2010 ityoobiyah liggidih lowok dooqaysime. Anu a ayyufta akah aktubem aysaqiitak barseeniit aydakanih kollejik Qafar afih exxa ayro 2/12/2013 teyyeqe taamah maysaxxaga yoo arcibissa radmooma lem ixmiqek geera. Anu sidooca sanatih abak raag kee mangoh tan meqem abittoh egalalih sumaqtitte liyo. Tonnaah kaadu faxe daarifal faxe caalatih gubat taamitamih xiq kee xiqto liyoh, sin taama geek kaadu yol taceen qaaqak awqeyyomul kilbal innil luk xayi uddurih addat xaagu siinik qambaala.

Sin wakliitay Haakito Qali

1.5.1.3.FARMOH AYYUFTA (10 Minit)

Farmoh ayyufti madab sinnih yan gital axcih, namma mari sittah yaktubeh yan edde yanin caalaataay, faxaanam kee ken caalat elle esseran sinam fanat yakku xiqah yan kattih tan farmô tabaatabsa.

FARMOH AYYUFTA

Goble Allaasa

Samara 33B

Samara logya magaala

Moomina Qali

45 boloh amo

Logyi magaala.

Massakaxxale Goble:

Fiirik yalli salamatta yok kootafay axcuk, mannah tanih macalay axce. Nammayak a ayyufta akah aktubem munkaq meqe rihim geyteh ruffe inteh ruffa innem, qarusow qari koh barkattoway, galale qari yakkay, labha le qari yakkay, qasaala meqe qasaalay kacanuuy xuwaw kee racmattaay, barkatak temmegg yalli koh abamih qaago koh liyo. Geerak massakaxxale seecoy ku rimih yoh abteh sugtek fanak kaxxam gibdi caagidiiy akak korsite waa yoogemih taagah temqoh seecol geytime weemih korsit sinni qaafuta koo essera. Toh kaaduy taama saqalah yok yan num missoyna nek yoofeh yan taqabih calli fidga yakke abak-raag tabatabsa abnuh doorit sinni dirki yol qidak gabbi Afrika fan yoorubeenimih sabbata. Tonnaleemik amakkaquk rihimit kok matram maxiqiyyomih taagah massakaxxay caddile haykanisso koo yok koo taafay axce.

Faxeennal yalli qusba rihim meqe rimiy qasal maaqane le koh yakkem kee saafar meqe kakanuk yemegge safar koh abay axce.

Ku wadaytooy, Moomina Qali.

1.6. QANGOR KURAABIYYO (10 Minit)

Barseena: Tasaaku takkel nabluwaynam, qangor baxaabaxsa le weelol axcih, seceenaay, abnaay, abni gurraay, weeloo kee yascassitte, wagsiisah yan qangooruk kulli qangara, le ammuntih gubal aktabuk ablenno.

1.6.1. BARTEENITIK TAAMITA

Barseena: Ahaak gubal yan qangor kee kalah qusba qangor edde osisak dagal akah abneh nan innah buxâ taamah beyak kulli qangara le aracat haanam aba. Bicseenih baahaanah yaninin, buxâ taama keenik miizaanisak akah numtin amoo kee hortah akah baxxaqisan innah abtam faxximta.

- | | | |
|--------------------|-------------|------------|
| a. Raatisso | e. Abuudu | j. Kuriyya |
| b. Gandaado | f. Qasbi | k. Maknaya |
| c. Xooquh
xiina | g. Booltá | l. Mexxata |
| d. Cawal kalti | h. Abnisso | |
| | i. Lowsiisi | |

QANGOR KURAABIYYOH GACSA

- | | | |
|----------------------------|------------------------------|-------------------------------|
| a. Raatisso----- [Abna] | | |
| b. Gandaado---
[Weeló] | f. Qasbi—
[Seceená] | j. Kuruyya--- [abni
gurra] |
| c. Xooquh xiina
[Weeló] | g. Boolta--- [Abni
gurra] | k. Maknaya---[
Seceená] |
| d. Cawal kalti | h. Abnisso—
[Abna] | l. Mexxata---
[Seceená] |
| e. Abuudu
[Seceená] | i. Lowsiisi---
[Abna] | |

1.7. **KONoy HAYTOH EXXA** YABTI-RAKIIBO (30 Minit)

5^{hattoh} **Ayro**

Asaaki barittoh ximmooma

- **Yabti-rakiibo**

Yabti rakiibo akak iyyanam yaabak exxexiiy yab qimbok xonfgolo afak elle tawqennak qangor xisneh fanat yan gexsit kinni. Ta kitaabak ta qasril nabluy waynam wadirit kafa. Qimbol wadirit kafa maca kinnimih maqna waginnah nan waqdi: wadirit kafa akak iyyanam qangarak baxux maqnak wadirit ossa digloyta.

1.7.1. **WADIRIT KAFA**

Ceelalloh yab iyyanam qangarak baxux maqna kinni wak qangarak ossotinah itte inta exxa kaadu digloyta deqsitta. Ta qangarak wadirit kafe kee focat kafe takke exxa qangrâ digloyta deqsitta. Ta digloytah qangarat ossa exxa maqna taacem kee acee waytamah tan.

Yabitte

Wadit kafa qangarak baxux maqnat ossa digloyta kinni wak baxa baxsale sababittah ossa. Toh kaadu qangarak abni warguuy, gurraay, caalatitte kee mannal tekkeh ma wak tekkem edde baxxaqisnuh mangom edde nantifiqe. Wadirit kafa namma aracal kurrumta tohuy gurrayse kee yaymaggi.

WADIRIT KAFA ABNI WARGU YASCESSUH

Baxux maqna	Digloya/ kafa
Gex	gexeh
Gex	Gex <u>ah</u>
Am	Amate <u>le</u>

Wadirit kafa abni gurral luk	
Kib	kibi <u>yya</u>
Kina	kinsi <u>yya</u>
Kat	kati <u>yya</u>
Ced	cedi <u>yya</u>
Cab	cabi <u>yya</u>

1.8. FOXO KIBAH ESSEROORA

Ciggiila qarwali addat yan qangor akah faxxima aracat hak maxco mafo faxo lekke kiba

taamâ golil	Cugaysô saqala	Makcâggur
Taamâ sartan	Bisu	Melleb

1. Anu taama geyuh _____ feeraytoysam faxximta.
2. Taama mexxet le taama takkuh _____ yanim faxximta.
3. Yemmexe uwwi yemmegemih taagah _____ daffeysaanam tayse.
4. Anu xalul taqabi yok akah raaqem _____ uwwaytuk yemegge.
5. Inkih tan taama abeenitih _____ massosnam taamah addat keenit bodda qawwalayla daggossa.
6. Nanu masnaqal linoh nan uwwaytuk _____ milaagnam ni uwwaytuh mexxat ossinamal kaxxa doori allele.

RADDI

1. Cugaysô saqala	2. makcâggur	6. Bisu
3. Taamâ golil	4. Melleb	5. Taamâ sartan

MAFDAGAH AMÔ GACSA

Tahak dagal taamah abnissoo kee xalu itta mafdagah gubal siinih xayyowteh sugteh tan, baxaabaxsa le kiraatey, axcih ankacsi kiraatey, qunxaaneytaa kee taamá iyya ammunti bartenit ta ankacisi kiraatek sidiica gurral axcih ankacsak aakamaay, ankacsi gexsit kee ankacsak cedeenim elle bartan exxak sugte. Kawsah kaadu tonnaah taamitekal hambareeraanama iyya ammunti kaadu bartenit ta kiraatek kawisak sidiica gurral axcih kiraatek aakamaay, kiraatek gexsit kee kiraatek cedeenim elle bartaanaah, elle bartan exxak sugte. Tonnaah kalah kaadu namma numih fanat gexsitaah yan taamâ mablâ-garayih gurral xayyooweh yan bartenit yaabiyyi cirfat isik elle dadlisaah, kiraatek tewqeh tan baxaabaxsa le gurral massowteh tan esseroora elle bartaanaah, elle agaarak kak bartenimit elle yaabaanaah, baxaabaxsa le ayyuftitte elle yaktuben gurraa kee ceelalloolat axawah haak elle nableh sugne.

Tonnaah ellacabol baxaabaxsa le luddittel qangor kuraabiyyo abaanam kee yabti-rakiiboh addal kaadu wadirit kafa baxaabaxsa le gurral elle nubleh sugne mafdagah sugte.

NAMMAYHAYTÔ MAFDAGA

2. 21HAYTO ADABANIH CERFATITTE

Mafdagah hadafitte:

Barteenit ta mafdaga barteeniik lakal yaalloonuwaan xiqto

- Numtin amoh abak raag baxxaqisaanam xiqelon.
- Meqe angaaraw cirfatal yaabanam xiqelon
- Yikriyen kutbeyta uxuxxossaanam kee dadlisaanam xiqelon.
- Kutbeyta yaktubeenim kee kusaaqisaanam xiqelon.
- Baxaabaxsa le kutbeytâ weelo makeelisaanam kee yaktubeenim xiqelon
- Qangarah exxaaxii baxsaanam xiqelon.

Baxxaqsu:-

Labatanna kee inik haytoh adbaanih cerfatitte akak iyyanam sahda 21 hayto daabanal barittam faxximta cerfatitteey, ta dabaanal sahdayti yaaxaguh manot axawah kak tan cerfatitte. Ta adbaanal ta cerfatitteeh ixigga yallenim doorit sinni dirki innam xiqnah. 21 haytoh adbaanih cerfat baad caddol akak geytimah yan daddal kee milaagih addat isinni maglab haysitoonuy, baad qidaddot gabat agle yalloonuh faxximtama cerfat kee ixigga. Ta cerfat kee ixigga addat mango gaddalitte cerfatitte adatle.

2.1. **INIKHAYTOH EXXA:** ANKACSI KAWSA (40 Minit)

1^{hattoh} Ayyaama

ANGAARAWA

1^{hattoh} Ayro

Asaaki barittoh ximmooma

- Ankacsi kawsa
- Kawsak tewqe elle barittoota bicsaanama

2.1.1. ANKACSI MAAKAMA (15 Minit)

Ankacsi mabla naharal fayramisaanama

Barseena: Asaaku siinih akrayuwaam, “Angaarawa” iyya ammuntal xayyoowe, ankacsi kiraate siinih akriyek naharal isin isih kak taaxigeenimit elle yabtan ankacsak naharal aakam esseroora gacsetton. Naharsi namma essero anu siinih gacissa heeh, raqteh tan esseroora too weelol isin gacsetton. Naharsi essero “**Angaaraw kak yaanam maca yaanamaay?**” Ta esserok asmat nakriyeek lakal geennom takkay immay, net celtaamat yaabak gacsenno. Angaaraw kak yaanam faxe qaynatal yakkay axcih maxcoh yakku, astah yakku, sehda farmo sittak elle cedda migda innam xiqnah.

Barseeni: Taway anu siinih elle gacsennal kataytah tan esseroora anu siinih akriyeyyoooh, isin gacsetton. Angaaraw sehдах madoori lem siinit celtaa?

[**Barteenit:** Angaaraw leh yan doori kaxxam mangooh, wohuk tut yabnek, sehda sitta bartoonuu kee sittin qokoluuy, sittaluk aaliyyaay, num kinni num kaak yaaxigoonuh kaxxa doori le iyyaanam xiqaanah]

Barseeni: Miic wagitak kiraate maca wagsissam kee macat yabtam baxxaqisa.

[Barteeni: Baxaabaxsa le gacsitte gacsaanam bictah]

Barseeni: Maakina qaynatih anagaaraw yanim siinit celtaa?

[Barteeni: Baxaabaxsa le gacsitte gacsaanam bictah]

Barseeni: Sehdâ fanat meqe angaaraw yanu elle xiqam mannaay?

[Barteeni: Baxaabaxsa le gacsitte gacsaanam bictah]

2.1.2. ANKACSI GEXSIT (15 Minit)

Barseeni: “Angaarawa” iyya ammuntal xayyoowe kiraate barseeni baxaabaxsa le teknoolojih mansoofal qulak ken ankacsiisama. Barteenit, ta ankacsak lafa, lafa le, qangor abbaxuk, sinni xaftaaral hayya heenih elle agaaradaanama.

ANGAARAWA

Angaaraw akak iyyaanam kaxxam fantaaxaw maqarrosanamal doori le cerfata. Ta angaaraw mango gurrall yanim takkay immay, lafaluk foocaa kee foocah aban angaaraw kee der rikek angaaraw mansoofat xoqaysimak aban angaaraw nablem xiqna. Angaarawak tuxxiq kaadu, uddur kee geytol rakuh tanimi. Angaaraw boola, mangoh tan taqabitteey udduruk uddurul kaxxa taqabi katassa. Tonnah iyyanam taqbi yenka tekkek numuk teena lih edde walal iyyan, farcat tekkek, rooka tekkek kalah tanih tanim isil xayii wadaytuh waris tonnah angaaraw kaadu mangoh tan caalatitteh fidga baaham xiqqa cerfata. Angaaraw sahdah fanat yan akkal dadlissanamal kaxxa doori digram xiqqa.

Angaaraw mango tuxxiqithey sahdah mano milaagam xiqqa. Sahdah mango gurrall tangoorowe toh kaadu nammay yakkiy, mangintiina kee kalah tanih tan gurrall angaaraw aban. Tah kaadu sahdah assenti manol oytah tanim takku

taama gexgexsit takku tanih tanim sittat elle tabsan gita kinnim kee sahda mano milaaguh kaxxa doorile.

Mangom baadal angaraw tuxxiq maca kinnimit radeh yan ayyunti agaaraw cogdaadi baarisak badaay barril inkih edde yangoorowen afoofay qaran gubak qaran gubal tan sahdaay, buxaxii kee canka maritteta, tellemo abeenit yasgoorowe ayfafayitte bicisak xayyosan.

2.1.3. ANKACSAK CEDEENIM (10 Minit)

Barseeni: Tahak gubal siinih xayyowteh tan “Angaarawa” iyya kawsa, kawisseeniik lakal akak ceddeenimih esseroora gacsetton. Ta esseroora gacisaanah tanin waqdi, barseeni, esseroora siinih akrayuk isin ceela gacsa ankacisseenih tanin kiraatek ugut abak gacisa. Naharsi essero sittalih taamitta innah raqteh tan esseroora too gurrall gacsetton. Naharsi essro, Angaarawak tuxxiq maca siinit celtaa? Angaaraw sahdah fanat yan akkal dadlissanam kee sinam meqennal sitta yaaxagoonuh, kaxxa tuxxiq le innam xiqnah.

Barseeni Angaaraw maakina gurrall yakkee?

[Barteeni: Baxaabaxsa le gacsitte gacsaanam bictah]

Barseeni: Angaaraw manô milaaguh kaxxa doori le iyyan waqdi, maca yaanamaay?

[Barteeni: Sehda faxe waqdi, manô gexsiti addal abaanah yanin angaarawak sittak bartaanam kee aaxaguk sugeweem ayrook, ayroh angaarawal bartoonu xiqan.]

Barseeni: Baadal angaaraw dadalak elle yemeetem mannaay?

[Barteeni: Baxaabaxsa le gacsitte gacsaanam bictah]

BARTEENITIK TAAMITA

1. Angaaraw mango calwayitteh figda elle baaham xiqam mannaay?
2. Ta angaarawa iyya kiraatek maca kak ceddeenii?

2.2. YAABIYYAA KEE KAWSA (40 Minit)

2^{hattoh} Ayyaama

2^{hattoh} Ayro

Asaaki barittoh ximmooma

- Yaabiyya
- Kawsa
- Kawsak tewqe elle barittoota bicsaanama


2.3. NAMMEY HAYTOH EXXA YAABIYYA (5 Minit)

Barseena: Asaaku elle yabnuwaynam, kimal baritne qasir wagsissaamal yaabenno. Kimal maca baritneh sugnee? Bartenit kassitak yabtah tan baxaabaxsa le ximmooma sabbuural keenih aktabuk keenih baxxaqisak elle agaarada.

[Bartenit: Baxaabaxsa le gurral raddi gacsaanam xiqelon.]

Barseena: Namma, namma numuh ken haak, inki ammuntal akah walalan innah abaanam kee fasli addal gersi marah ceelallo yakkem xiqqa yab abah yan num arcibisak yab akah abannah absisaanama.

[Bartenit: Yaabah yan numuh, hangi akah acayuk ankacissaanam faxximta]



2.4. SIDOCHAYTOH EXXA: KAWSI MAAKAMA: (5 Minit)

Barseena: Asaaku ta aracal siinih xayyowteh tanim kawsa kawissaanak naharal sinnih elle akak taaxigeenimit elle yabtan aakam esseroora gacetton. Ta esseroora gacissaanak naharal, naharsi essero sittalih gacissa hayneh raqtem isin gacetton. **Naharsi essero, Qusba qasrih mettibannu iyyan waqdi maca yaanamaay?** Ta essero gacisnah nan waqdi, qusba qasrih mettibannu kak yaanam, duma baxaabaxsa le gurral gabak abak sugne taamoomi sissikuk edde abna mansoofa innee gacisnam xiqnah.

Raqteh tan esseroora barseeni keenih akrayuk barteenit raddi gaba ruubak gacsaanam faxximta.

Barseeni: Qusbaqasrih mettibannu kak yaanam matumaay?

[**Barteenit: Baxaabaxsa le gurral gacsaanam xiqelon**]

Barseeni: Qusba qasrih mettibannittek tuxxiq kee tû kaloot maca siinit celtaa?

[Barteenit: Baxaabaxsa le gurral gacsaanam xiqelon]

Barseeni: Isin qusba qasirih mettibaannittek matumat xoqaysimtaanaa? Macahaay?

[Barteenit: Baxaabaxsa le gurral gacsaanam xiqelon]

2.4.1. KAWSI GEXSIT (15 Minit)

Barseeni: Qusba qasrih mettibannu” iyya ammuntal xayyoowe kiraate barseeni inki waqdi anay fayya heeh keenih kawseek lakal, barteenitAnay ayyaaqe kalah qagaaqagitak isih dibuk yakriyeenim kee Hortah yakriyeenimiiy, qangor maqnaa kee maxcâ maafol Hortâ walalak yakriyeenimi.

QUSBA QASRIH METTEEBANNU

Baad dadalaak away edde yan caddo akah gufem mettebannuu dadlisak yemeetemi. Away kullî kel edde naffoofe raadiyooy, Televiziiniiy, makinaay, tayyaraay, baxaabaxsa le elektrik duyeeeyaay, maaqoo kee maqabah edde xoqaysimna leeh nee tanfiqe duyeeeya inkih qusba mettebannih xalu.

Qusba qasrih metteebannih dadalak giffi axcuk tambulleem, kompewter kee tet dagarat loowoh tan aaloota. Kompewter, duma sehdayti misinkaca edde taqabba inteh baahak ten cisab kee massow, inkih inki dagiigat kibewaa waktih addat bicissa hayteh xayyossa aalata. Toh dubuk hinnay, sidiicaah/affara qari kibak ten taama maxxat le gurral inki qarih addal mango qaynatih ayfaafay, inki adda geyak geytiman. Qusba qasrih metteebannitte kaxxam mangom takkay immay, kompiter dagal akah innê nah taama elle takke faayilitte, kaxxam mango.

Kompiter harxi weer kee softi weerik xissiiima. Harxi weer kak yaanam, gaba xagtu duudda tet kee tet loowoh tan aaloota. Softweer kak yaanam gabâ xago sinni kompewter elle taamitta barnaamijitte. Kopewter rakiiboh akak yan

xaagi tabaatabsih Teknooloojih aaloota inkih qusba qasriih mettebaannittet raqta.

2.4.2. KAWSAK CEDEENIM (15 Minit)

Barseeni: Ahak dagal siinih xayyooweh sugeh yan kiraate kawisseenik lakal akak ceddeenimih esseroora agcsetton. Ta esseroora gacisnah nan waqdi, namma gurral gacisnam xiqnaah, tohum, saanih esserok raddi, kawsak addak kak nayyaaqe esserooraa kee kinal kak gacsaanam xiqan esseroorah tan. Takkel nablu waynam nammannal inkih nablem gabbatenno. Naharsi essero fanah gacnek, Qusba qasrih mettebannitte baadah dadal elle takkem mannaay? Ta esserok raddi saanih kawsak gorrisnah nan waqdi, kawsak qembô rortal geynam xiqnaah, takkel iyyaamah, qusba qasrih metteebannu udduruuk, uddurul aysaasuk yemeetenimi innek gacisnam xiqna.

Barseeni: Qusba qasrih mettebannittek giffi itteh tambulleem matiyaay? Macahaay?

[Barteenit: Giffi itteh tambulleem kompiteeri iyyeenih gacsaanam xiqaanah]

BARTEENITIK TAAMITA

Kassiisi:

Dagal esseroora kawsii addak elle ayyaaquk gacisneh nan gurral raqteh tan esseroora gacisa. Barteenitih inkih saami keenih acayuk akah gacsan innah abaanam kee erkenna le barteenit hangit haak esseraanam faxximta.

1. Qusba qasrih mettebannitte qusbaamah sehdayti baxah bathe tuxxiq macaay?
2. Kompiterik namma exxah kurrumta kak iyyam macaay?
3. Sidiicaah, affara qari kibak ten duyye inki qarih gacsaanam sinaamak taamâ saami daggoysaanamat nek maculataa? Mannalaay?

2.5. AKTUBIYYA (40 Minit)

2^{haytoh} Ayyaama

3^{hattoh} Ayro

Asaaki barittoh ximmooma

- Ankacsi kawsa
- Kawsak tewæ elle barittoota bicsaanama

2.6. **FEREY HAYTOH EXXA**: AKTUBIYYA (10 Minit)

Barseeni: Ta tiyantu bartenit barsah yan waqdi, qusba qasrih metteebannut/technology/ xoqaysimak barisam faxximta. Tonnaah, moxeelih tan maritteh biography/ceelallo tekkeh tan marittek ux-manoh aydaadu baaha keenik inxix] yuktubeenih akah baahan innah baahaanam faxximta.

Iskiripti yaktubeenim kee yaktubeenim kusaaqisaanama.

Qaalamal qemboh addah baadal taybullii (Tele vision) filo tayler faransi worzi deqsitah yan 21 karmat yan num bicsam xiqe. Tanum bicseh yan baadal taybuulli awayyih uddur nbleh nan baxaabaxsa le gurral bicseenih nablek inkih yookome numu. Tahak дума dumÎ kameerat xoqaysimak qubul, qubul le miicittet xoqaysimak tangagayye miicitte axcih vixyoh caddol bicsam qembise.

Awrobbah Liggidih Loowok 1926 kee 1831 fanat baxaabaxsa le qusbam hadlah yan marak aben taama keenik elle qalalisaanaah, keenik elle kusaaqisan udduruk sugteeh, ta filo taylor sugga itteh tan baadal taybulliitte A.L.L 1934 inkih qusba gurral elektrooniksi siiratal korise.

2.7. **KONOHAYTOH EXXA: YABTI-RAKIIBO** (30 Minit)

MAXCÂ MAAFOH ADDAK ABÓ BAXSANAMIH GEXSITI.

Barseeni: Asaaku baritnuwaynah nanim yabti-rakiibok maxcâ maafoh addak abo baxsaanamih gexsit bartenno.

Kassiisi:

Barteenitih, baxxaqissah tan waqdi, sabbuural keenih aktabuk, dagar erkenna leh tan barteenit hangit haak dagar asgoyya luk keenih baxxaqis. Tablem xiqewaytah tan barteenitih, keenih baxxaqqimtuh, keenih tuktubem keenih akarayuk, keenih baxxaqis.

Maxcô maafu sidooqa exxal xissimta

Tohuuy:-

- Abooy,
- abinaa kee
- Maafenal kurrumana

Sahlaan abo kee sahlaan maafeena

Ceelalloh:-

Qali	gexeh
Sahlaan Abo	sahlaan maafeena

Ciggiltah tan esseroora Dagal tan ceelallok ugut abak gacisa.

- Macammad yemeete
- Haakito wallite
- Acmad yooqobe

Migaq ciggile kee maafeyna

Ceelallo: 1

Migaq ciggile	Maafeyna
Usug	Yemeete

Barseeni: Ciggiltah tan esseroora dagal tan migaq ciggiilee kee maafeynah ceelallok ugut abak sittalih taamitenno.

Kassiisi:

Barteenit gabat aglel, kulli barteeni gaba ayyaaquk, barseeni ken essera essero gacsaanama.

[Barseeni raddi sabbural keenih aktabuk keenih baxxaqisam faxximta]

Migaq ciggile kee maafeyna		
	Migaq ciggiile	Maafeyna
Oson yokmen	Oson	yokmen
Is dalteh	Is	dalteh
Kaah bee	Kaah	bee
Anu gexe	Anu	gexe
Ken been	Ken	been

Maxco maafok aboh caalat baxasanama.

Abo akak iyyanam maxcâmaafoh addat abina abah yan numu.

Ceelalloh:-

Faatuma agiroh tan barteeni.



Abo

Ahak gubal tan maxcâ maafook abo kak baxisak uktuba

- Is kaxxam qaxmeqe kutbe le.
- Oson walalan wak baadi xawlon.
- Ni manoh meqe ayfaf lem technologit yantifiqeenimi.
- Kaa kee yoo sittaluk walalak sittal lino mabla milaagneh.

MAFDAGAH AMÔ GACSA

Tahak dagal 21 toh adbanih cirfatitte itta mafdagah gubal siinih xayyowteh sugteh tan, baxaabaxsa le kiraatey, axcih ankacsi kiraatey, angaarawa, iyya ammunti barteenit ta ankacisi kiraatek sidiica gurrall axcih ankacsak aakamaay, ankacsi gexsit kee ankacsak cedeenim elle bartan exxak sugte. Kawsah kaadu tonnaah qusba qasirih metteebannu iyya ammunti kaadu barteenit ta kiraatek kawisak sidiica gurrall axcih kiraatek aakamaay, kiraatek gexsit kee kiraatek cedeenim elle bartaanaah, elle bartan exxak sugte. Tonnaah kalah kaadu ayyuntiinô fantaaxawaay, 21 haytoh adbanih cirfatitte wagsissa ammuntittee kee afiitah angaarawal barteenit yaabiyyi cirfat isik elle dadlisaah, kiraatek tewqeh tan baxaabaxsa le gurrall massowteh tan esseroora elle bartaanaah, elle agaaradaanaah,

Tonnaah ellacabol baxaabaxsa le luddittel qangor maqnissoo kee yabti-rakiiboh addal kaadu maxcâ maafoh addak abo baxsaanamih gexsit elle nubleh sugne mafdagah sugte.

SIDOCHAYTÔ MAFDAGA

3. KAARIBI

Mafdagah hadafitte

Barteenit tamafdaga barteenik lakal yaalloonuwaan xiqto:

- Kaarib maca kinnim yaaxigeenim xiqelon
- Kaarib taqbi maca kinnim bartelon
- Kaarib qaynoota baxxaqisaanam xiqelon
- Ankactuuy, kiraatee kee yaktubeenim akak bartelon
- Yemeexege ammuntal kutbeyta yaktubeenim xiqelon
- Kiraateh addat yamaate qusba qangor maqnisoonu xiqelon
- Qangooruk irô maqnaa kee addâ maqna yaaxigoonu xiqelon.
- Sahlin Maxcâ maafoofo xisaanam xiqelon.

Addâ fakootu:-

Kaaribi akak iyyaanam sahdayti baxih qaafiyatal raat cabtam xiqtaa tumammiy, sahda elle radoowuh faxootuk ugutak edde asana kinni. Taa ossotinah xagaanah yaaquben tumammi kaadu yaaqubeenimih aniiy yakmeeniih ani takke tumammi kinni. Ta tumammi kaadu umaadoba akah deqsittam dagarah faxximta xaagetik iroh ossotinah aquube kee akme yakken tumammiy, misinkaca milaagtam xiqta.

3.1. **INIKHAYTOH EXXA**: ANKACSI KAWSA(30 Minit)

1^{hattoh} Ayyaama SIGAARÂ WALFI

1^{hattoh} Ayro

Asaaki barittoh ximmooma

- Ankacsi kawsa
- Kiraatek tewqe esseroora bicsaanama

3.1.1. ANKACSI MAAKAMA(10 Minit)

Barseena: Asaaku siinih akrayuwaam, “Sigaarâ walfi” iyya ammuntaal xayyoowe, ankacsi kiraate siinih akriyek naharal isin isih kak taaxigeenimit elle yabtan ankacsak naharal aakam esseroora gacsetton. Naharsi namma essero anu siinih gacissa heeh, raqteh tan esseroora too weelol isin gacsetton.

Naharsi essero “Kaarib kak yaanam macaay?” Ta essero waginnah nan waqdi, faxe qaynatih walfiy sehda edde raddu xiqtak kaaribi innam xiqnah. Raqte esseroora anu siinih akrayuk raddi isin gacsetton.

Barseeni: Mango mari kaaribit kak culam mangih maca sinit celtaa?

[Barteeni: Baxaabaxsa le gacsitte gacsaanam bictah]

Barseeni: Sin dariifal mangih sinam taymaggee kaarib qaynat macaay? Macâ sababahaay?

[Barteeni: Baxaabaxsa le gacsitte gacsaanam bictah]

Barseeni: Kaarib sinaamal kataysa taqbiq uyxuxxa haysay isih taaxigeenimit yaaba?

[Barteeni: Baxaabaxsa le gacsitte gacsaanam bictah]

BARTEENITIK TAAMITA

- A. Kaaribi iyyan waqdi, maca, maca addat lem siinit celtaa?
- B. Sigaarâ walfi mannal sinam yabbixem siinit celtaa?
- C. Sigaara sehdayti baxih qaafiyatal taqabi katassam siinit may celtaa? Mannalaay?
- D. Sigaara katassu xiqtah tan qaafiyat taqabik isih taaxigeenimit yaaba.
- E. Sin dariifal sigaarak gexxaamah, taqabik yan mara may taaxigen? Teexegeenik maca loonum baxxaqisa?
- F. Sigaarâ walfi luk sugeh cabe mara may taaxigen? Away mano keenik maca celtam baxxaqisa?

3.1.2. ANKACSI GEXSIT

“**Sigaarâ walfi**” iyya ammuntal xayyoowe ankacsi kiraate barseeni, bartenitih yakriyeh yan waqdi, xongolo fayya haak namma adda yakriyeemi Bartenit kaadu Kawsak naharat inkih hangi akah yaceen innah keenik abaanama

SIGAARÂ WALFI

Mangom qunxaaneyti sigaara yaaqubenim biso maxco akkaluk edde asan uma qaada. Woh dibuh hinnay, mangom qunxaaneyti sigaara yaqubeenim keenik naba mari yooqobek sah kaxxam aylahitak geytiman. Takkay immay sigaara uma qaaday sale huma kinnim kee mango qaafiyat taqabi katassa. Sigaara yaqubeenim deflih gaabulo biyaakay, maasoy biyaakay, amo berraay, dagar taqaabiiy, xer uddurih kacuwuuy, qabli umaanee kee kalah tan dalkookiiy uma raat sahda manol cabtaah, raba fanah sahda beyta katassa.

Tonna leemik amakkuquk sigaara yaqubeenim uma qaaday cabeh meqe. Amanol sahdaytuk gadda akak innam qaafiyat kinnimih taagah sahdayti biyak kaal katassa uma adoobak isi debram faxximta. Inki num sigaara yaaqubeh yan waqdi, biyaakam dibuk sinni qaafiyat kaallih tanih tan kay buxah maraa kee too kay dariifal enni ittah tan maritte inkih biyak gadda takke. Tohiih taagah buxal isik qunxaamay, nabam inkih sigaara qaafiyatal katassa taqabi barsaanam faxximta.

3.1.3. ANKACSAK CEDEENIM

Barseeni: Tahak gubal siinih xayyowteh tan “**Sigaarâ walfi**” iyya kawsa, kawisseeniik lakal akak ceddeenimih esseroora gacsetton. Ta esseroora gacisaanah tanin waqdi, barseeni, esseroora siinih akrayuk isin ceela gacsa ankacisseenih tanin kiraatek ugut abak gacisa. Naharsi essero sittalih taamitta innah raqteh tan esseroora too gurrall gacsetton. Ankacsak ceddeenimih esseroora namma gurrall gacisnam xiqnah. Tohumu, saanih kawsak addak

saanih gacsan esseroo kee amolladih kinal gacisnam xiqna. Takkel namma gurrall inkih abluk gacsetton. Naharsi essro, Qunxaaneuytak mango gaba sigaara yaquubeenim maca akkaluk yaaquubeenii? Tahama mango qunxaaneyti, bisô maxcoo kee dadal akkaluk, yaaquben innam xiqnah.

BARTEENITIK TAAMITA

Ciggiltah tan esseroorak Ankacisseenih tanin kiraatek ugutak afak gacisa

1. “Keenik naba mari yooqobe sah aylahitan” iyya waqdi, maca yaanamaay?
2. Sigaara yaaquubeenim mabiyak sinaamal katassaa?
3. Amanoh bagul sehdayti baxak kaxxa gaddi macaay?
4. Amôladih ta kiraatek maca cednam xiqnaa?

3.2. YAABIYYAA KEE KIRAATE (40 Minit)

1^{hattoh} Ayyaama

2^{hattoh} Ayro

Asaaki barittoh ximmooma

- Yaabiyya
- Ankacsi kiraate
- Kawsak tewqe esseroora bicsaanama

. NAMMEY HAYTOH EXXA: YAABIYYA (10 Minit)

Barseeni: Ahak gubal tanih tan baxaabaxsa le miicittek ugutak keenit elle xoqaysiman gurraa kee miic yascasseh yaniimil agaarad gexisaanama.

Barteenit kaadu ta miicittet tiya tiyah, edde yaabak, horta, hortah gacac elle agaarak, kak cedeenim barteenit focal gudgudul eweqqa iyyeenih aliilih xayyos abaanama.



Miic: 3.3. Miicitte haanam kee wohul yaabanama

3.3. SIDOCHAYTOH EXXA: KAWSI MAAKAMA

Barseeni: Takkal siinih xayyooweh yan gaat kaarib kee buxâ qaaqa iyya takriyeenik naharal, aakam esseroora gacsetton. Naharsi essero sittalih gacissa haynaah, raqte esseroora barseeni essero akarayuk, barteenit raddi gacsele. Qemboh essero, Gaat kaarib aki kaaribik baxsa lem siinit may celtaa? Gaat kaarib gersi kaaribik baxsa elle lem sikrat mali may qedaddo kee ayyuntiinoh fantaaxawal kaxxa taqbi katassu xiqqa iyyeenih gacsaanam xiqan.

Barseena: Gaat kaaribit sehda mannal raddam siinit celtaa? Macahaay?

[Barteeni: Baxaabaxsa le raddi gacsaanam xiqelon]

Barseena: Gaat kaarib sehdal kataysam xiqah taqbi maca siinit celtaa?

[Barteeni: Baxaabaxsa le raddi gacsaanam xiqelon]

Barseena: Gaat kaarib buxâ qaaqa elle bayisu xiqam maca siinit celtaa?

[Barteeni: Baxaabaxsa le raddi gacsaanam xiqelon]

3.3.1. KAWSI GEXSIT

Barseena: “Gaat kaarb kee buxâ qaaqa” iyya ammuntal xayyooweh yan irate barseeni yakriyeh yan waqdi, barteenit hangi akah acuwwa heenih ankacisaanam kee maabbak taqabi le barteenit foomat haak keenih yakriyeenim faxximta.

GAAT KAARIB KEE BUXÂ QAAQA

Geem xage deqsita inki numuy, gaba kaak xaginnaanim inki ayro aba yen. Usug gaat makum qembise saaku kataysiisiy gaat takmeh afal caxxa, caxxa, kaal acayuk elle radem takkay immay, elle akamuk yemeeteemil dagar kaak yibbixeeh, sinnih lakqoh xaamma heeh yakmem qembise. Ta geem xage, gaat makum edde qembisem, karma kaak labaattannaytot tan saakuk tenem kee buxa magaalak xayikket luk yeneemih sabbatah kulli ayro xuguuguluh kaa akamuk yen. Tamakkel yeneeniik, absuma rihim kaak gufteeh, absumal kaa rihmiseeniih, qasaala le num yekke. Loqo magaalal asak, bar issi absumah buxah orobak yeneeh, absuma lab baxa kaah xaltee, barrah ullaalo kaah kay buxah mari abba heeh, faxximma intam kay buxah mari kibak yeneemih taagah teetik yablem woo gide akkuk manaanna.

Ta absuma nammey haak kaah xaltee, awki ibah gexam qembise saaku isi absuma bet kaak iyyeeniih, kaah yeceeniih buxah orbisite.

Tama aracal barrah awdaafah wadar konoy teetih bahha heeh, kedok gabamgaabossa heeh, wadar labaatanna teetih baaheh buxa le num yekke. Geem xage buxâ qaaqa kaa tibbixem takkay immay, maaca wadar leeh

gexaah, tohuk gaba kala waqdi, tama gaatih kaarib kaa yabbixeh yan waqdi magaalal gexak magaalal icdirra iyyeh yamaatem baahe.

Qadaagah ayro amaatinnaan saaku reytá, reytá beyak, abuuduh beyak suga gaatih mekla edde abba haa waqdi, buxah faxximtaamah dukkaanak abuuduh beyak, wadir gersi qadaagal nammay baahak too buxaa kee gaat abud edde kalla haah gaba foyyah raaqaah, buxak qadaagah beenim tohut taadeeh, urruu kee buxah inâ qarrad kalu edde abam gabat maraqaay, urruu kee barra qarradah dagaral saro keenik embexxa itteh calaaget gexaanah usug kulliyaro gaat yakmem margaaqo. Ayrok ayrok teena, buxal safar kateeh, usug bar magaalal elle cerriteeh, urri leggaye kalu cuggaanê buxak qaxbaxxa keenik baahak yiddirireenih kaah sugen. Geem xage buxah yemeete waqdi, sugtem xagga heeh, tekkem kay buxah iná kaah warisseeh, tamakkel sitta weeniih, ceerih buxah gexxeeh, ken yaymaqoonuh tet kee kay buxah mara tongooroweh tanim yubleeh, yan caalat keenih warisseeh, too caalat geem xageh dagaral geenimih sabbatah kedoh kaah seecak edde suge qellatak yawquh ka kaa digaaleeniih, Tohuuk wadir geem xage abak suge umam taamay, gaat yakmeenim, mangoomuk snam aylahissam baritak axcih, diiniiy, qedaddooy, naddaafattaay, amo beyal buxâ waalaanamih gexso edde tanim cedak too saakuuk wadir gaatak yewqeeh, buxâ qaaqak elle faxximtannal yawqe num yekkeeh, is kee issi buxah mara waalaanam too ayrol gaba kalte.

3.3.2. KAWSAK CEDEENIM

Barseeni: Tahak dagal siinih xayyooweh sugeh yan gaat kaarib kee kay umaane iyya kawsak kawisseenik lakal kak ceddeenimih esseroora gacsetton. Ta esseroora saanih kawsak gacissan esseroora kee kinal isih elle taaxigen gurral gacissan esseroorah tan.

Barseeni: Geem xage gaat elle qembisem mannaay? Ta esseroh raddi saanih kawsak elle geynah nan innal, kataysis afat caxxa, caxxa kaah haak sarra sinni lakqot xaamitam qembisak tokkeek elle radeeh qembise.

Barseen: Geem xage gaat edde yakmem qembisem karmak magideey?

[Barteenit: Karmak edde qembisem labaatannaytot yan saakuk ten]

Barseeni: Gaat kaarib qasaala finqisam xiqam siinit may celta? Mannalaay?

[Barteenit: Barteenit kawsak iroh baxaabaxsa le esseroora gacsaanam xiqanah]

Barseeni: Geem xageh aydaaduk maca baritnam xiqnaa?

[Barteenit: Barteenit kawsak iroh baxaabaxsa le esseroora gacsaanam xiqanah]

Barseeni: Gaat kaarib kee gersi kaarib qaynootak maca lafittam siinit celtaa?

[Barteenit: Barteenit kawsak iroh baxaabaxsa le esseroora gacsaanam xiqanah]

Kassisi:

Barteenit gacsah yan baxaabaxsa le radditte sabbuural keenih aktabuk ken elle agaaram faxximta. Erkenna le barteenit qokolak inkih elle yaaxagoonu xiqan gurral keenih baxxaqisa.

3.4.NAMMEY HAYTOH EXXA: YABTI-RAKIIBO (40 Minit)

1^{hattoh} Ayyaama

2^{hattoh} Ayro

Asaaki barittoh ximmooma

- Qangor
- Yabti-rakiibo

Barseeni: Ahak gubal tan esseroorak “A” gubal tanih tan qangor kee muduqqaqi kiraatek ugut abak “B” gubal yan qangor kee muduqqaqit ramaddossoonuh, anu “A” gubal yan qangooruk, nibro siinih seecah an waqdi, “B” gubal yan qangor kee muduqqaqit ramaddoysa.

A

1. Afal
2. Labaatannaytó
3. Xuguugulu
4. Rihmisen
5. Qasaalá
6. Ullaalo
7. Orbisite
8. Awdaafah
9. Icdirra
10. Calaage

B

- A. Midirih
- B. Buxah iná
- C. Digbisen
- D. Furrayniino
- E. Kassowwa
- F. Yembexe sara
- G. Xalte barrah aban miqno
- H. Sittâ lakleh
- I. Buxah beete
- J. Naharal

RAMADDOS GACSA

1. J 2. D 3. H 4. C 5. B 6. G 7. I 8. A
9. E. 10. G

QANGOR KEE MUDUQQAAQI MAQNISAANAMA (10 Minit)

Barseena: Ahak gubal yanih yan qangor maqnisnah nan waqdi, kulli qangaral agaaradak, barteenitih sabbuural aktabuk baxxaqisam faxximta. Tonnaah taqangoorih maqnisso barteenit gabat aglel takkem faxximta.

Kassiisi:

Barteenit barseeni keenih elle baxxaqisah yan gurral cedeeweenim kak esserak sinni daftaral yaktubeenim faxximta.

QANGOORU	MAQNISSO
1. Absumá	Abbâ maqanxah baxá
2. Gufeh	Maadeh
3. Gabam gaabossa	Kobxissa
4. Qarrad kalu	Sarsiyya
5. Gabâ foyya	Tû-sinna
6. Safara	Buxak maaqiddah aban gexo
7. Cerriteh	Buxah morbinna
8. Qellata	Hoxa/Galti
9. Sittaweenih	Mabicinnon
10. Waalanna	Tut rike cabaanama/Aylahu
11. Walfi	sahdak adaral raat cabtaama
12. Ossotina	walfit aban taturu
13. Astooti	sahdak dagaral tambulle
14. Madqak iro	madqal ane sinnim abaanama
15. Hirgo	sattafanah baahiyya

3.5. **FEREY HAYTOH EXXA**: AKTUBIYYA (15 Minit)

Baxxaqsiyyi kutbeyta:-

Barseeni: Baxaabaxsa le kutbeytah qaynoota tanim inkih akah naaxige inna haay, tasaaku ta kutbeytak baxxaqis kutbeyta kinnim kee tet ceelallo nablem gabbbatenno.

Kutbeyta akak yaanam sahdaytuuy, arac kee duyeeeyat yakrie marah ceelo baxxaqisaanama. Yakriye marat yableenih innah, yaabbeenih innah, tammoyaanaah innah, kaadu suruy saanah innah, xagaanah innah ta weelol sinaamah xayyooyseenik baxxaqsiyya deqsitta.

➤ **Sahdayti ceelo baxxaqisnuh tuxxiq le migaaga.**

Karma:

awka, idaltu, furraynu, numu, barra, baxuwwa, idalto, ww....

Fooi exxa: qarsa, inti, minini, sana, ayti, afa, sokto, deben ww..

Dagar exxa: amo, filla, tobdo, iba, feeraara, gaba ww...

Dagooru: burqi, laysa,

Sara: jacket, suufu, shamiiz, surre, kebel, koofiya, qimaama, samaranda ww...

Bila: filli bila, feranto, ayti dahada, baada,

BARTEENITIK TAAMITA

Ta dagal siinih xayyowteh tan baxxaqsi kutbeyta naktabuh edde xoqaysimnam faxximtah tan ceelaloolak ugutak inki baxxaqsi kutbeyta aktabuk barseenal xayyoosa.

3.6. **KONOY HAYTOH EXXA**: YABTI-RAKIIBO (15 Minit)

YASGALLI QANGOORU

Ah akkiy...woh akki	Ah hinnaay... woh hinna	Kee	Ah dibuk hinnay... kalah
Ken nammay inkih	Takkay ikkah	Tohah sabbtah	Takkay immay,

Barseeni: Tadagal qarwali addat yan yasgalli qangor maxcâ maafot haak ablenno.

1. Qalii barittok kak raaqem biyaakiteh akkiyy, baaxol anewayi
2. Caalima kah amaatewaytem buxâ deddar hinnaay,

Kassisi:

Barteenit baxaabaxsa le yasgalli qangoorut xoqaysimak maxcâ maafot akah bicsan innah barteenitih saami acayuk, barteenit fasli addah taamah abak sinni xaftaaral akah yaktuben innaa kee ellacabol barseenalluk sabbuural keenih aktabuk elle ken agaaradisam faxximta.

Ahak dagal qarwali addal siinih xayyooweh yan fantaaxaw qangooruk amakkaquk maxcâ maafot edde xisak aktuba.

- a. _____
- b. _____
- c. _____
- d. _____
- e. _____
- f. _____
- g. _____

MAFDAGAH AMÔGACSA

Tahak dagal kaarib itta mafdagah gubal siinih xayyowteh sugteh tan, baxaabaxsa le kiraatey, axcih ankacsi kiraatey, sigaarâ walfi, iyya ammunti barteenit ta ankacsi kiraatek sidiica gurral axcih ankacsak aakamaay, ankacsi gexsit kee ankacsak cedeenim elle bartan exxak sugte. Kawsah kaadu tonnaah gaat kee buxâ qaaqa iyya ammunti kaadu barteenit ta kiraatek

kawisak sidiica gurral axcih kiraatek aakamaay, kiraatek gexsit kee kiraatek cedeenim elle bartaanaah, elle bartan exxak sugte. Tonnah kalah kaadu baxaabaxsa le kaarib (walfi) caagiida tascasseh tan miicittel yaabaanam kee elle agaaradaanam kee yaabiyyi cirfat isik elle dadlisaah, kiraatek tewqeh tan baxaabaxsa le gurral massowteh tan esseroora elle gacsanaah elle agaaradan exxak sugte.

Tonnah ellacabol baxaabaxsa le luddittel qangor maqnissoo kee yabti-rakiiboh addal kaadu yasgalli qangor kee ken ceelalloola elle nubleh sugne mafdagak sugte.

FEREYHAYTÔ MAFDAGA

4. QADRORTI CELSIISENTA

Mafdagah hadafitte

Barteenit ta mafdiaga barteeniik lakal yaalloonuwaan xiqto

- Qadrorti celsiisenti maca kinnim aaxigelon
- Qadrorti celsiisentih qaynoota bartelon
- Qadrorti celsiisentitte yaktubeenim xiqelon
- Hayyeeyoonaa kee ixig-ixigak baxsa bartelon
- Hayyeeyoonak fakim kee alifu bartaanam xiqelon
- Ixig-ixigak tonnaah fakim kee alifu bartelon
- Baxaabaxsa le qadrorti celsiisentitte gabbaaqaanam xiqelon
- Qadrorti celsiisentih caalootaa kee ken baxsaanam xiqelon
- Kiraateh addal xayyoowa qangooruk iroo kee addâ maqna yaaxigoonu xiqelon.

QADRORTI CELSIISENTA

HAYYEYYONA

Mascassa:

Hayyeeyona kakyaanamak addâ fakoot abnek raceena asmat akak sinnim takkeh axcuk gabbaaqan yaaba. Hayyoyyooni ceele waytaamal mango. gabbaagu aba num yubleh innah edde gacam Luk warsa iyyenta. Ankacsa marah kaxxa furkacat kee wahanah warsan. Tonnaah hayyoyyoonaa sugteemiy horaak horal tabak temeeteimmiy gabbaaqan kinnimih tagah aliilisso feerayso wagak exxak teena kinnih innama xiqnah. Tonnaah kaadu mango migaq akah aban. Tenem tene iyyen, dumah tenem leh iyyen. Ta hayyeeyona kaadu kilbatti dariifal Tenem teyyen, baqadul maaqi maqu/ maaqu immay maaqi yeneyyen.

Ceelalloh; - gabbaaqu abe “dumahaa iyyen” axcuk yaaba

Ankacisa mari kaadu “Hayyeeh” axcuk ankacsa.

4.1. INIKHAYTOH EXXA: ANKACSI KAWSA (40 Minit)

1^{hattoh} Ayyaama Yangulaay Damaqtuu kee Wakri

1^{hattoh} Ayro

Asaaki barittoh ximmooma

- Ankacsi kawsa
- Ankacsi kawsak tewqe elle barittoota
bicsaanama

4.1.1. ANKACSI MAAKAMA (10 Minit)

Barseena: Ta hayyeeyyoonaa kiraatey siinih xayyowteh tani takriyeenik naharal sinnih akak taaxgeenimit yaabak, aakam esseroora gacsetton. **Naharsi essero,** Miic wagitak kiraate maca wagsissam kee macat yabtam baxxaqisa

[Barteenit: Baxaabaxsa le raddi gacsaanam xiqelon]

Barseeni: “Yangulaay Damaqtuu kee Wakri” itta hayyeeyyoonaa toobbeenih may taaxigen.

[Barteenit: Baxaabaxsa le raddi gacsaanam xiqelon]

Barseeni: Ta hayyeeyyoonak farmo maca siinit celtaa?

[Barteenit: Taturteh taniimih nadaamitaanam xiqtam aalle sinniimi iyyeenih gacsaanam xiqelon]

Barseeni: Ta aluwweh angaaraw maca siinit celtaa?

[Barteenit: Baxaabaxsa le raddi gacsaanam xiqelon]

4.1.2. ANKACSI GEXSIT (15 Minit)

Barseeni: “Yangulaay Damaqtuu kee Wakri” iyya ammuntal xayyoowe ankacsi kiraate barseeni, barteenitih yakriyeh yan waqdi, lafa, lafa le ximmo, akah yaktuben innah abam faxximta. Barteenit kaadu barseeni keenik elle iyyah yan gurral hangi akah acuyya heenih ankacisaanam kee butta, buttah gacak elle agaaradaanam faxximta.



YANGULAAY, DAMAQTUU KEE WAKRI

Dumah yangulaay, Damaqtuu kee wakri sidocuk Siitallih idaalitte iyyeeniih, ittalih sugeeni’yyen. Yaqam wakri essero xayyoy seeh, yangulay idaltuh yanilih yaabe:

Atu qunxa-mariinol abe wayteemiy tah abinniyoy kak ittaah, edde namma kalbittamaay lito macaay? Kaak iyye wakri.

Liyoh wallah! Dumahaa, danan le num suge. Magrib qarik derret yaloole danan bari yakke waqdi kaa culseyyok yatto loolay axcuwaa iyye num. Anuuy bari nagay yakkeeh, dite nagay yoh gactah gide axcuk sassa exceeh, qambaalak suge. Elle caboh le num yemeeteeh, too danan yok culseeeh, uxih too danan too waqdi qidaamal bar kaa attakammem xiqak enem ascube. Amah yot umah iyye yanguli.

Wakri Yanguli lakal essero damaqtul hee:

- Hay, Damaqtow, atu kot umaamay uxih edde namma kalbitta maay lito? Iyye yaqam wakri.

- Wallah liyoh ayrok teyna buqreh adda culla exch daroyta hirigga hee waqdi kabacca oobbeeh, sinam yot temeeteh tan exch kaqteeh, daroyta baaxol qideeh iroh ewqe. Anu oobbem silayti yesgeyye daroh xongolok sugte. Kaadu qaqteeh, geeri daroyta hirge waqdi kaadu kabacca oobbeeh, kaqteeh ewqe. Oobbem silayti yesgeyye daroh xongolok sugte. Hirgeh suge daró kaadu baaxol yok radde. Ellecaboh buqre dacrisa awki yot yemeteeh, tuxage kalah yoo diiriye awki yoo diiriye kalah, inki daroyta attakamme weem kaxxam yot uma iyee damaqti.

Damaqtuu kee yangula ellecaboh essero wakril hayte:

- Yaqam wakrow, kot umam neh warisey! Kaak itte Damaqtuu kee yangula.
- Wallah,anu qunxa-mariinol tah abinniyoy kak axceemiy yot uma mayyu.Immay taway siiniy qunxa-mariinol abtaanam faxxiimak tenem idoolinnal edde umam lih Yalli yoo idoolisem yot umah tan yexce'yyen wakri.

Yimdirabaay,

Kum dirabaay,

Yallihim numma.

4.1.3. ANKACSAK CEDEENIM (15 Minit)

Barseeni: Tahak dagal siinih xayyowteh sugteh tan yangulaay, damaqtuu kee wakri itta hayyeeyyoonaa ankacisseeniik lakal kak ceddeenimih esseroora gacsetton. Naharsi mafdagoogil akah inneh nan innah, namma gurrall axcih saanih kawsaa kee kinal gacissan esseroora edde anele. Ta esseroorak naharsi essero fanah gacnah nan waqdi, Damaqtow, atu kot umaamay uxih edde namma kalbitta maay lito? Iyya waqdi maca yaanamaay?

[Barteenit: Tah yaanam qanagarak nablem “edde namma kalbittam” itta qangara ablenno, tah yaanam, abiiyyoy wonna hinnay, abewanniyoy itteh edde nadaamitta maay lito yaanama iyyeenih gacsaanam xiqan]

Barseeni: Yanguli lakal damaqtul essero haytem iyyaay?

[Barteeni: Essero haytem wakri]

Barseeni: Anu oobbem silayti yesgeyye daroh xongolok sugte” item iyyaay?

[Barteeni: Damaqtu]

Barseeni: Yaqam wakri ellacabol maca keenik iyyee?

[Barteenit: siiniy qunxa-mariinol abtaanam faxxiimak tenem idoolinnal edde umam lih Yalli yoo idoolisem yot umah tan keenik iyye]

Barseeni: Ta hayyeeyoonak maca barittaanam xiqteenii?

[Barteeni: Baxaabaxsa le radditte gacsaanam xiqelon]

4.2. **NAMMEY HAYTOH EXXA**: KAWSA (40 Minit)

1^{hattoh} Ayyaama

2^{hattoh} Ayro

Asaaki barittoh ximmooma

- kawsa
- kawsak tewqe elle barittoota bicsaanama

4.1.1. KAWSI MAAKAMA(10 Minit)

Barseena: Kirdalii kee tet abba iyya kiraate takriyeeniik naharal isih akak taaxigeenimit elle yabtan aakam esseroora gacsetton. Naharsi essero, Kirdalii kee abbah aydaadi maca siinit celtaa?

[**Barteenit: Baxaabaxsa le raddi gacsaanm xiqelon**]

Barseeni: Kirdali maca abtem siinit celtaa?

[**Barteenit: Baxaabaxsa le raddi gacsaanm xiqelon**]

Barseeni: Kirdali abba maqaynatih num siinit celtaa?

[**Barteenit: Baxaabaxsa le raddi gacsaanm xiqelon**]

[*Barseeni: Barteenit inkih gabat agle akah haytannah abam faxximta*]

4.1.2. KAWSI GEXSIT (15 Minit)

Barseeni: “Kirdalii kee abba” iyya ammuntal xayyooweh yan kiraate kulli maasayyah mabla misinkacal amôladisak ikriya. Barteenit kaadu barseeni keenik elle iyyah yan gurral hangi akah acuyya heenih ankacisaanam kee butta, buttah gacak elle agaaradaanam faxximta.

KIRDALII KEE ABBAH AYDAADU

Dumah, Caalima deqsitta awká tene’yyen. Tet inah qammih baxi buxah keenik yemete. “Ta qaxumaaneh anna lem iyyin baxaay?” Iyye. Ina qarik tewqeeh, kaalih yabteh: “Amah yibaxa bas! Ah macah ittaah? Amaqangara koo kassiiseyyo bas ayrok teyna!” Kaak itte.

- “Wallah,yi maqanxay ku baxa koo celtah matan. Anu qaxumaaneh anna le baxat kok faxam mayyuk isih daffey!” Iyye.
- “Maxcin! Amah Koo kassii seyyok,” itte.

Usuk usuulla iyyeh, isih teetik gexê yen.

Ama awká tembeh iyyen. Guubul kaxxam qaxah geeri meela niyatta hayta qax miqa tekke'yyen. Tet abih baxi tet faxeeh, abbah warseh iyyen.

- “Y’abbaw Caalima yoh ab!” Iyye abbak.

Kay abba tet inay kay qammih baxah tani kee abbal gexeh iyyen.

- “Yi qammih baxáy baxá kok rihimih fannah nan,” teetik iyye.
- “Yaah? Dumah teetik ittem hawwentee asaaku? Tet fayxih yol temeetee? Asaaku tet geytek foyyah tet mageyta.” kaak itte
- “Maca kok exceeh?” Iyye usuk duma iyyem habbeeleh
- “Ku baxat faxam mayyu iyyaanam yok ittem hawwentee?” Kaak itte.
- “Maxaciyyo,” iyye.

Usuk dumah iyyem sumaq sissa kaal hayte:

- “Yibaxa faxxek, laah tet liyo, kaak” itte.

Usuk buxah yuduureeh, baxak iyyem leh iyyen:

- “Yibaxaw, anu dumah excem luk sugeeh, **13 ca** karmak duma digirih afak yok tewqe qangarah taagah kabbah maqanxa baxuwwa laah liyo yok itteeh. Tet baxak kalah ---Abuusi kok mangohuk, abaxuwwak koo raaqisah. Atu faxxek marin absumal laa koh acuwwa heeh, koo digbiseyyo” kaak iyye.

Awki abbak iyyem leh iyyen:

“Yabbaw marin absumal yoh tagdayuwayta laa caalimal yoh mekelaay,

- Anu Caalimak raaqaamak rabam yoh taysek, y’abbaw marin absumá mafaxak, yoorihmis! -Anu Caalimak kalih sayyoh qasaala mafaxa” iyye.

Abba abam waagiseeh, ama laa yeceeh, baxa digbiseh iyyen. Caalima bagut haysitteh, xalteh iyyen. Is ama xalaayal rabteh iyyen. Abba tooboke awkáh “kirdali” migaq abe’iyyen. Usuk inaay abba kah yekkeh yeynebeh iyyen:

“Anu yi kirdali agbi gubat mahaay, Caalimak agabu maciggiilisa”
axcuk yene’yyen.

Usuk digib cineeh, baxá yeynebeh. Ama awka inak lafitak raqqa itte qaxah ,abiino esserteh iyyen. Abba tet inal yecee laa elle faxam keenih warseh iyyen.

“Aleey, absumál laa yaceenim qaadah nek raqtam faxxah taniih, laa manacaa” axcuk cineenih iyyen.

-Tet abba laa maleh tet rihmisaanam kaadu cineh iyyen. Kirdalik abba gaatal rade’yyen. Is magaala laahi can limoh beytaah, abbah faxxa haam edde baahak tene’yyen. Isih kaadu faxxa haytam edde abitak tene’yyen. ama lakqot. Is gaat akak xaamta furrayni kaxxam tet yikcineeh,gaat lakqo maleh teetih yaceeh, tet rubsuusaah, mangom teetih abaah, sara teetih xamaah,elle caboh umaanet tet culseh tet yoysoommeh iyyen. Kirdali teedeqeh, amah isik tubleh tan waqdi ama furraynul gexxeh.

“Wallah, tamah yot tekkeeh, eedeqeh,kaak itte” iyyen.

Usuk woo waqdi “ablenno” iyyeesh, teetik yaddeerem baaheeh, deraafek xaagu teetik abe’yyen.

Sinam “a baxuwwa macah digbe waytaah?” kaak axcuk tene’yyen.

“Wallah tama baxuwwak abba rihimih maggo laa elle faxa” yyen.
Tohuk wadir, lito xalay yim kinniimih asmat ankek litooh? Exceeh,
wonnal teetik esseqqe, axcuk yene’yyen.

Is abtam wayteeh, abba lih yabteh iyyen?

“Wallah,y’abbaw tamah yot tekkeeh gaat koh akak baahak suge magaala duubali koo kiciyyoh yok axcuk sugga iyyeh taway yoo cineeh tamah tan” itte.

Tet abba kaxxam yinqibeeh,tet abiino ah kaak tabbeemik tet qidda, is kaadu qidda haam malise” iyyen. Girat rudas hayya heeh, teetih yemeeteeh,

garbo tet beyam faxa waqdi is meesitteeh, qarik awqe cinteh iyyen. Too waqdi abih baxay“maaluk eelli ham inkih acuwwa heeh, inni absumal rihmeyyo” iyyeh yemeete amo keenik yewqe’yyen.

“Wallah, laak atu y’abbah maqanxal teceem aceeh, Kirdalil rihmah” iyye awki.

“Kirdali teedeqem toobbeeh afti asaalah yoh temeetee?” Iyye naqabu luk.

Sissiuk gira yeykeleeebeeh, too numut heeh, ibat kaak radde’yyen. kirdali wariggitteeh,mudduume inâ saqlih baxih bagul tinnikisse.Wariggat xalay teetik fanak caxteeh,sinam keenil gaabobteeh, idaltu cateniuh iyyen. Kirdalih inâsaqlih baxi “bagut leemih teetik maraaqa” axcuk teetil rihmeeh,kirdalih abba kee kirdalih rooci tokket waddimte’yyen.

1^{HAYTOH} Elle baritto

4.5. KAWSEENIH CEDAANAM (15 Minit)

4.1. Ciggiltah tan esseroora kiraatek ugutak kutbeh gacisa.

Barseeni: Kirdalii kee abbah aydaaduu“Kirdalii kee abba” iiyya ammuntal xayyooweh yan kiraatek ugutak kiraatek maca ceddeenimih esseroora gacsetton. Naharsi essero, “anu caalimak raaqamak rabam yoh tayse ittem iyyaay? Macahaay?

[Barteenit: Tet inah saqlih baxa iyyeenih gacsaanam xiqan]

Barseeni: Kirdali tet inah saqlih baxi maca teetihyakee?

[Barteenit: Baxaabaxsa le radditte gacsaanam xiqelon]

Barseena: Kirdali abbaa kee girdalik rooci elle waddiimem ellacabol macaay?

[Barteenit: Baxaabaxsa le radditte gacsaanam xiqelon]

Barseena: Kirdalii kee abbah aydaaduk baritnam xiqnam macaay?

[Barteenit: Baxaabaxsa le radditte gacsaanam xiqelon]

2^{HAYTOH} Elle baritto

4.2. Ciggiila qangooruh sitta celta maqna acayuk gacisa

Barseeni: Anu “A” gubak nibro siinih seeceyyooh, isin Kiraateh addat yan qangor kiraatek ugut abak “A” gubal yan qangor “B” gubal kenik sitta celta maqnisso kenih gorrisak ken ramaddoysa

A.

1. Anna lem
2. Tembeh
3. Guubu
4. Rihimi
5. Duma
6. Baxuwwa
7. Tagdayu
8. Fulussa

B.

- A. Sooniba
- B. Tatre waktu
- C. Tah celtam
- D. Mekeltu
- E. Lafitta
- F. Udurruteh
- G. Dadalteh
- H. Bookáliita

RAMADDOS GACSA

1. C
2. G
3. I
4. J
5. B
6. H
7. D
8. E
9. A
10. F

Ciggiila essroora kiraatek ugutak diraaba axcek Numma axce tika

1. Caalima faxak sugtem marin numu.
2. Ku baxa koo celtah matan ittem inâ saqlih baxa.
3. Anu inni absumak maraaqa ittem awki abba.
4. Caalimak absumah teetik raqtam teetik qammih baxa.
5. Awki abba qangará qideh sugem 10 sanatak duma
6. Caalima abba tet akah digbisewaak sugem maali fayxi

DIRAB KEE NUMMAHESSEROORAH GACSA

1. Diraaba
2. Diraaba
3. Diraaba
4. Diraaba
5. Diraaba
6. Diraaba

4.6. ANKACSI KAWSA (40 Minit)

1^{hattoh} Ayyaama

1^{hattoh} Ayro

Asaaki barittoh ximmooma

- Yaabiyya
- Aktubiyya

4.7. NAMMEYHAYTOH EXXA YAABIYYA (30 Minit)

Barseena: Bartenit hota, hortah ken haak nammay, nammay akkuk ciggiltah tan ixig-ixiga, iyye num kee gacsa num akkuk midaamiduh gud gudul akah xayyoosan innah abam faxximta.

Bartenit, ixig-ixigak culmaa kee mawqal iyyaanam naharal ken nagay geysiisak yaakumik ciggiilil elle yaabanam faxximta.

Kassiisi:

[Ta bartenit gud gud fan abta mawqa dagar erkenna le bartenit edde mawliissam kinnuk dagar erkenna le bartenit elle yanin aracal keenil

xayyoowinnaan barteenit ken qokolak edde akah yaaban innah keenih abaanam faxximta.]

Addâfakootu:

Ixigaaxiga - kak yaanam sugeet sabhalal digirik tiyak teena kinni. tonnah ta digir aliilih siita esserak esser kee gacsi gurral mariiy, maral esserak mariiy, marah gacisak aban digiiriyi horaay horal tabak yemeeteh yan digiri.

Tonnaah kaadu kaxxa mari/xaleena qunxa marak esserak keenit aban digir kinni. tonnaah ta digir abaanah yanin waqdi inik buxah mari hinnammay cuggaane inki qarih afal gaaboowak siita esserak abaanama. Ta digir mangih bar saqak orobbuuy, agxeexak gaba kalla haan waqdi kinni. Ceelalloh: Esserah yan num, “**ah ixigey**” Axcuk, fidga kee ascaabe faxxa esseroora essera waqdi, Ankacsa num “**Yaaxigeenim baahey**” iyyaah, kaa essere esseroh raddi yacee.

Ah ixigay?

- Arduuk aseeh yok raaqe cintek ixigay?
G. silaalo.
- Data alay data garbot taloolek ixigay?
G, Inkaqta
- Ku inah qarih ruugul koo weeqi sak ixigay?
G, Liiqi
- Kok ayse kal koo weeqisak ixigay?
G, qiiri
- Carri bar qasuk yok raqteeh maaci bar qaduk yoh sugtek ixigay?
G, gombodu
- Gadalu le kaaqunta kixigay?
G, afa

- Qado laak fanat tan qasa sagak ixigay?
G, arraba
- Buxah amoh qibnaytuk ixigay?
G, caara
- Oogore Oogore warroote yoh cintek ixigay?
G, lee
- Eyredde eyredde eleele cinek ixigay?
G, bakar bakaara
- Geera kak abbixe saga qayso yok seltak ixigay?
G, maayta/macassa/maqadde
- Qaran maxagaay baaxo maxagak yoh ixigay?
G, laahigayse/ gaysa
- Lagaq lagaqay daaba korak yoh ixigay?
G, laahi lageegu
- Qaraanat af leeh baaxot af lek yoh ixigay?
G, nuufe/muufe
- Loowe loowe loowo kak aaxige cinek yoh ixigay?
G. cutuuku
- Data iday qado xaylo gubat le yoh ixigay ?
G, dabna kee kacoowu/ data bunih yabnaa
Kee Figgoonu
- Gexaak assaah gexaak xintaah acle / taqbe waytaamak ixigay?
G, lee/ weeqaytu
- Galbo kak kale saga soolak raqtek ixigay?
G, rara kak kalen qari
- Inkih inki gide take toobokok ixigay?
G, kibrit cooxu

- Moddim maliiy qadammo/ qadambo takmek ixigay ?
G, Dorrahi
- Salafat miyay le qado ricdok ixigay?
G, Erba
- Iroh tewqek addah oobe waytam ixigay?
G, Karma
- Can akak nakaanaah cado kak akme waanam yoh ixigay?
G, Ina
- Kuub /Alfi culussaah kuntuuba culse sinnim yoh ixigay?
G, Xuune boodo
- Naqbuh aagure waytaah kakanuh fugte waytam yoh ixigay?
G, Xaltani
- Inki ina maxaltaay inki bis lek yoh ixiga?
G, Mutuku
- Inki ina maxaltaay inki qamal lek yoh ixiga?
G, Urru
- Kakanuh koo cabe sinniih naqabuh koo bee sinnimk yoh ixigay?
G, Izraaqili/ Raba
- Tascasseeh /woykaamatablik yoh ixiga?
G, Feera
- Niqibtoh innah taagureeh kicintoh innah takkuqehik yoh ixigay?
G, Koorra /karammo
- Inkinnah lifiq makaltak ixigay?
G, Kuta

4.8. FERÉY HAYTOH EXXA: AKTUBIYYA (10 Minit)

Ahak gubal siinih xayyowteh tan gabbaaqi maasayyah ceelallok ugutak baxaabaxsa le maasayyah qaynoota barteenit hortah gacak yaktubeenim faxximta.

Gabbaaqi maasayyah ceelallo

Enek haytô footimat en saaku qunxa urruk manguk neneeh,kaadu mango udduura gabâ digir abak nen.Ayrok teena footimah addal awki yok naharat korsil daffa yeh suge.Tokkel yaa-aracak ugut excee,usuk cine waqdi qeebi gabâ gabah nek rade.Tohuk ugutak barseeni sugeweemih taagah kaxxa arow sittat abne.Tohuk wadir xabba nee heeniih,barteenit awlayti baaxoh idoola fanah nee bee.Sarrak idoola ni fanat yabteeh qunxa urri mango hoxa baahaah,qafu sittah intaanam meqe iyyen.Tokkel nanu oggolleeh qafu sittah inne.Ellacaboh fanat nek gacte idoola nee tesmeeqeh.

4.9. KONOY HAYTOH EXXA: YABTI-RAKIIBO (30 Minit)

3^{hattoh} Ayyaama

1^{hattoh} Ayro

Asaaki barittoh ximmooma

- **Yabt-rakiibo**

Maxcô maafô digilu

Digiluh tan tan maxcâ^maafô akak yaanam;-dudda sinni maxcâ^maafô y aafe wayteh iyya, hinnammay, kaadu currik ane sinni maxcoy solsiinooa leeh, lafnabi warak qimbissaah, idyâ ximmo amot axawah le kinni.

Digili maxcâ^maafô:-aafe wee yaabak hinnammay kaadu gitat ane sinni solsiinooak taabukem kinni.digili mangih abeena kee abna luk masuga.

- Digilu kee maxcâ^maafôh fanat yan baxsa ahaak gubal ablenno.

	Maxcâmmaafô	Digilu
1.	Abeena kee abna inkih le.	Abeena kee abna mali.
2.	Cuso duddaluk qaddossa.	Cuso duddaluk maqaddossa.
3.	Yakriye mara mabadissa.	Yakriye mara badissah.
4.	Currik tan.	Currik matan.

TENGELE MAXCÂMAAFO

Tengele maxcâ^maafô: namma currik tan takkusâ fanat solsiinooah astooti fan keenik radekal boxooxocoh tankuttube waqdi kinni.

- **Tengele m/maafô elle massoysan cogdaadi sidoc takke.**

1. Idya^ximmot xoqoysimaanama.
2. Catuffaa kee yasgalli qangoorut xoqoysimaanama.
3. Ximmo le catuffat dubuk xoqoysimaanama.

Ceelalloh:-

- kimal barittok raaqeh; aqakkaane yol taturteh.
- Kimal barittok raaqeh. Aqakkaane yol taturteh.
- Kimal barittok raaqeh,to hih sabbatah aqakkaane yol taturteh.

Kassiisi:-

- Ximmo le catuffa (;) yasgalli qangor mafaxsisaa.
- Catuffa (,) yasgalli qangor faxsisaaah, yasgalli qangooruk afat tamaate.

MAFDAGAH AMÔGACSA

Tahak dagal qadrortah yan celsiisenta itta mafdagah gubal siinih xayyowteh sugteh tanik axcih hayyeyyoonah exxal, baxaabaxsa le kiraatey, axcih ankacsah hayyeyyoná kiraatey, yangulaay, Damaqtuu kee wakri, iyya ammunti barteenit ta ankacisi kiraatek sidiica gurral axcih ankacsak aakamaay, ankacsi gexsit kee ankacsak cedeenim elle bartan exxak sugte. Yaabiyyah kaadu tonnaah, ta qadrortah yan celsiisentak tiyak teenah tan ixig-ixiga nablu xiqneeh, Kawsah kaadu tonnaah kirdalii kee abba iyya ammunti kaadu barteenit ta kiraatek kawisak sidiica gurral axcih kiraatek aakamaay, kiraatek gexsit kee kiraatek cedeenim elle bartan exxak sugte. Tonnaah kalah kaadu aktubiyya wagittaamal kaadu gabbaaqi maasayyah ceelallo kee tonnah ta ceelallok ugutak akah yaktuben inna nablu xiqneeh sugne exxak sugte

Tonnaah ellacabol yabti-rakiiboh addal kaadu maxcâ maafô digiluu kee tengele maxcâ maafô kee ken ceelalloola elle nubleh sugne mafdagak sugte.

KONNOY HAYTÔ MAFDAGA

5. QIBNAYTIINOO KEE KONNABNA

Mafdagah hadafitte

Barteenit ta mafdaga barteenik lakal yaalloonuwaan xiqto:

- Qibnaaytiino maca kinnim bartelon
- Abaak raag sittat tabaatabsaanam xiqelon.
- Qibnaytiinoo kee tet konnabna baxxaqisaanam xiqelon.
- Yabti gexgexsit edde bartaanam xiqelon.
- Kutbe yaktubem kee amo kak gacsaanam xiqelon.
- Kutbee kee yaabak addatinô baarisiyya bartaanam xiqelon.
- Yaabiyyal angaaraw cirfat isik yaysiiseenim xiqelon.
- Qibnaytiinot axaw lem kee konnabna kak cedaanam xiqelon.
- Qangor kee maxcâ maafoofa baxsa meexaanam diqelon.

Addâ fakootu:-

Qibnayfiino-akak yaaham buxa marak, iroh, baaxok iroh, qusubih yemeeta sahdayhit aban sabhallal kee hanawisiyya. Ta hanawil, buxah keenil yemeeteh takku, buxahamol kaa geyoonu qusba namuh aban massakaxxâ gexso.

Qibnaytiinoh addat massakaxxay, hannisiyyaay, xaaguuy, makmok maaqabooy, w onna wonnah tan hanawisiyyi gexsit addatlemi. Qafar ayyuntih xaqul qibnaytiino madqat axawah taniimiy, teymeeqek ayyunti xaqul kaxxa nihir leeh toysommek madqal digaala lakat le qaadah abnissok lafale nihir leh tan exxa teetik innu xiqna.

5.1. ANKACSI KAWSA (40 Minit)

1^{hattoh} Ayyaama
QAFAR AYYUNTI LEH YAN QIBNI KONNABNA

1^{hattoh} Ayro

Asaaki barittoh ximmooma

- Ankacsi kawsa
- Ankacsi kawsak tewqe esseroora bicsaanama
- Yaabiyya

5.1.2. ANKACSI MAAKAMA (10 Minit)

Barseeni: Ta Qafar ayyunti leh yan qibni konnabna iyya ammuntal siinih xayyooweh yan ankacsi kiraate siinih kawsak naharal aakam esseroora sin essereyyooh, sinnih elle taaxigen innaa kee kak taaxigeenimit yaabak gacisa. Naharsi essero, Qafar qaadal qibnaytiino kak yaanam macaay?

[Barteenit: Tah yaanam buxâ num akke waah yan numuh abaanah yanin konnabna iyyeenih gacsaanam xiqaanah]

Barseeni: Qibnaytiino ayyuntah madoori lem siinit celtaa?

[Barteenit: Baxaabaxsa le raddi gacsaanam xiqaanah]

Barseeni: Sin dariifal baxsa le qibinah aban konnabna may tan?

[Barteenit: Baxaabaxsa le raddi gacsaanam xiqaanah]

Barseeni: Qibnaytiino dariifaak, dariifal baxsa lem siinit maay celta?

[Barteenit: Baxaabaxsa le raddi gacsaanam xiqaanah]

Barseeni: Sin dariifal qibnaytiinol yemeexege mari yen.

[Barteenit: Baxaabaxsa le raddi gacsaanam xiqaanah]

5.1.3. ANKACSI GEXSIT (20 Minit)

Barseeni: “Qafar ayyunti leh yan qibni konnabna” iyya ammuntaal xayyoowe ankacsi kiraate barseeni baxaabaxsa le teknooloojih mansoofal qulak ken ankacsiisaama. Barteenit, ta ankacsak lafa, lafa le, qangor abbaxuk, sinni xaftaaral hayya heenih elle agaaradaanama.

Kassiisi:

Mabul kee maabbak taqabi leh tan barteenit ummaan waqdi, ken garit tan barteenit ken akah qokolan innah abaanam habbaalewaynay.

QAFAR AYYUNTI LEH YAN QIBNI CADA/KONNABNA/

Qafar ayyunti leh yan qibnaytiinô massakaxxa dariifaak, dariifal dagoo baxsa lem takkay immay, mango dariifal elle yangooroweenih yanin qibanytuh aban konnabna nableh nan waqdi, buxá le numuk muxxi kaxxa massakaxxaa kee konnabna kaah aban. Qafar ayyunti qibnaytuh leek maaqoh caddol, buxali xagaamak yayse gurral geenik canaay, subaacaay, tonnah cadoh kaadu ubconto keenih asgaaduk kaxxa qibini cada keenih aban.

Taham dagal akah innê nah Qafar ayyunti baxaabaxsa le dariifal qibinah aban konnabna keenik baxsa lem bictah immay, amôladih beynah nan waqdi, taysem inkih xiqqa haanamal qibinah aban. Tonnaah, yakmeeniih yaaqabeenim dibuh hinnay, fiddimah caddol kaadu tayse fido qibinah haanaah, tohum walluuy, natqiiy, ww... tan baxaabaxsa le kaxxam masangaleh raacatta taceem xiqta fido keenih haan. Qibina dibuukiyak kaa walalisaanaah, buxak gexah yan waqdi kaadu, wadbitam faxa arac kee tokkeh fanat satqitaanaah, bakaaritaanamak sakayii kee keebo keenih haak ken rubsuusan.

Amolladih qibnaytiino Qafár addal dibuh baxah addal gexak yameete numuh aban caddii kee konabnat taadem hinnay, gexak yemeeti qibnayti woo ku xexxaaral kah faxximma inta ascossa kee kalalu kaah abaanah

yaysillimeenim addat le kaxxa qaadâ nihiriy Qafar ayyunti leh yanik lafa le exxa

5.1.3. **ENEK HAYTOH EXXA**: ANKACSAK CEDEENIM

Ciggiltah tan esseroorak Ankacisseenih tanin kiraatek ugutak afah/aliilih gacisa.

Barseeni: Ahak dagal Qafar ayyunti leh yan qibni konnabna iyya ammuntal siinih xayyooweh sugeh yan ankacsi kiraate ankacisseeniik lakal, kak ceddeenimih essero gacsetton.

Barseeni: Qibnaytiino qafar ayyuntih addal baxsa may le?

[Barteenit: Baxaabaxsa le radditte gacsaanam xiqelon]

Barseeni: Qafar ayyunti qibnaytuh leek maaqoh caddol abam macaay?

[Barteenit: Kawsak iroh baxaabaxsa le radditte gacsaanam xiqelon]

Barseeni: Qibinah maaqiddak kaxxi fidok mannah keenih abaana?

[Barteenit: Baxaabaxsa le radditte gacsaanam xiqelon]

Barseeni: Qibinah sakayii kee keebo keenih haak ken akah rubsuusanam macaa?.

[Barteenit: Baxaabaxsa le radditte gacsaanam xiqelon]

Barseeni: Ta dagal neh xayyowte kiraatek maca baritnam xiqnaa?

[Barteenit: Baxaabaxsa le radditte gacsaanam xiqelon]

5.2. **NAMMAY HAYTOH EXXA**: YAABIYYA (10 Minit)

Barseeni: Qibnaytiino wagittaamal walalaanaah, qadaaqadaa kee dooren ammuntal abak raag sittat tabaatabsaanama.

Barteenit: Dooren ammuntal footima nammâ kel baxisak qadaaqada gexisaanam kee Xayyos kee itta barsiyyal abaanama.

5.3. KAWSA (40 Minit)

1^{hattoh} Ayyaama NIHÍR NAGRA

2^{hattoh} Ayro

Asaaki barittoh ximmooma

- Kiraate
- Kiraate tewqe esseroora bicsaanama

5.3.1. KAWSI MAAKAMA

Barseeni: Ahak gubal siinih xayyooweh yan nihir nagra iyya amuntal siinih xayyooweh yan kiraatek aakamal naharsi esseroora gacsetton. Naharsi essero fanah gacnah nan waqdi, sittalih gacsenno Abba baxah nagrah cabu xiqam maca siinit celtaa?

[**Barteenit: Baxaabaxsa le radditte gacsaanam xiqelon**]

Barseeni: Nihir nagra iyyan waqdi, maca yaanam siinit celtaa?

[**Barteenit: Baxaabaxsa le radditte gacsaanam xiqelon**]

Barseeni: Abba baxat meqe nihir elle tabisu xiqam mannaay?

[**Barteenit: Baxaabaxsa le radditte gacsaanam xiqelon**]

Barseeni: Sinni abak raagak ugutak gersi marak geyten meqe nihir may liton?

[**Barteenit: Baxaabaxsa le radditte gacsaanam xiqelon**]

5.3.2. ANKACSI GEXSIT

Barseeni: “Nihir nagra” iyyah yan ankacsi kiraate, barseeni barteenitih yakriyeh yan waqdi, anay fayya heeh, yakriyem faxximta.

Barteenit : Baxaabaxsa le kiraateh qaynootat xoqaysimak yakriyeenim faxximta.

NIHÍR NAGRA

Callato kaxxam qibnaytiinol yimixxige numuk ten. Ta num kaa orbah yan qibinak isih xiqqa haamal kaxxa konnabnaa kee arciba keenih abak yen. Qarrado deqsita lab baxay abba haamal kaxxam kaa cataah, kulli abinal kaa kataata luk yen. Ayrok, ayrok teena, qarradoh abba lakmiseeh, kay bossah yamaateh yan mara arcibisaanaah, oggolaanam baxi taama tekkeeh, abba abak sugga iyyem abak raaqe. Qarrado abbâ gaba qunxih raaqiseh sugeemih taagah kaxxam edde mabaditinnaay, meqe qibni cada keenih abak ken rubsuuse.

Qarrado kay saaqah xiina numuk tenem takkay immay, kaal yamaateh yan baxaabaxsa le maritteetah walal kee ascossak ugutak isi baxa qarrado barittot kaa heeh, tohuk xaqut kaadu sinni lacihiim edde abitak yen. Ta awki digbeeh, isi buxa haysiteeh, baritto gambik abaah, buxâ qaaqa kaadu gambik kaa tibbixe. Ayrok ayrok teena mango qibinay xer baaxok yemete kaa silaale wak, kay buxah iná haanawi xaanuh xer daqar gexxeh sugteemih taagah, ta qibinah maca abu waamih cisab kaa yibbixe.

Toh kaadu qibinah faxximta hanaawi abe weenik cami leemih taaga. Qarrado migaaqah biyaakitak yenemih taagah qibina hanaawisam kaxxam ruffa kaa haak ten. Takkay immay, kay buxah iná suge wayteemih, qibinak tibba maxaccoy, isih duudam keenih abak ken hanawisam gabbateh. Takkay immay, hanaawi sinni buxa noori malim qibni silaalol cedu xiqe.

5.3.3. SIDOCHAYTOH EXXA: KAWSAK CEDEENIM

Barseeni: Ahak dagal siinih xayyooweh yan nihir nagra iyya kiraate kawissek lakal kiraatek ceddeenimih esseroora gacsetton. Naharsi essero anu siinih gacseyyoooh, gersi esseroora anu siinih akrayuk, raddi kak afak gacsetton. Qemboh essero, Callato baxa nagriseh cabem macaay? Ta esseroh

raddi nableh nan waqdi, qibinah abaanam faxximta massakaxxaa kee meqem kaban kaa nagriseh cabe iyyaanam xiqaanah.

Barseeni: Qarradoh abba akah rabem macaay?

[**Barteenit:** Kaa yibbixeh yan lakimah amrih rabe]

Barseena: “Qarrado abbâ gaba qunxih raaqise” iyyan waqdi, maca yaanamaay?

[**Barteenit:** Kawsak iroh baxaabaxsa le radditte gacsaanam xiqelon]

Barseeni: Hanaawi qarrado maca takkee?

[**Barteenit:** Kay buxah ina]

Barseeni: Ta kiraatek maca baritnu xiqnaa?

[**Barteenit:** baxaabaxsa le radditte gacsaanam xiqelon]

Kassiisi:-

[Barteenit ta esseroora gacsah yan waqdi, inkih gabat agle akah haysitan innah ken uguugusaanam faxximta]

5.4. AKTUBIYYA (40 Minit)

2^{haytoh} **Ayyaama**

3^{hattoh} **Ayro**

Asaaki barittoh ximmooma

- Aktubiyya
- Kawsak tewqe esseroora bicsaanama

5.5. **FEREY HAYTOH EXXA** AKTUBIYYA

YASGALLITTET MAXCÂ MAAFOH ADDAT XOQAYSIMAK
YAKTUBEENIMI

Ceelalloh:

1. Qalii kee Wagrís inki adda temeete.
2. Kaasim gexeemih **taagah** Qadawká orobte.

Takkay immay	Wohuk muxxih	Kalah kaadu
Sabbatah	Taagah	Nammay inkih

Ahak gubal tan esseroorak fakut yan aracat gitah yan yasgalli qangoorut xoqasimak foxo kiba.

1. Qibnaytiino kee kunnabnal_____ Qafar ayyuntih nihiritte.
2. Anu biyaakitak sugeemih_____ maaqo dagam maxiqinyo.
3. Faatuma xer baaxoh safarak temeteemih_____ kaxxam halakatitte
4. Cuseen gaalah gexem, _____ wadar edde wagta.
5. Taban haytô footimah barteenit boolale barteenit caten_____ caafatal barnaba mara edde caten.
6. Barseeni fasli waqlat culak barteenitik aqakkaane abeeh._____ buxâ taama edde keenih yuble.

FOXO KIBAH ESSEROORAH GACSA

1. Nammay inkih
2. Sabbatah
3. Taagah
4. Takkay immay,
5. Kalah kaadu
6. Wohuk muxxih

5.6. KONOY HAYTOH EXXA YABT-RAKIBO

Barseeni: Asaaku takkel nablu waynah nanim yabti-rakiibok is xiqta maxcaa kee is xiqe sinni maxca ablenno.

Kassiisi

[Barteenitih abtah, faxe qaynatih baxxaqsuu kee oson ggacsaanah yanin raddi inkih sabbuural keenih haak sinni xaftaaral akah yaktuben innah ken kassisaanam mahabbaalin.]

IS XIQATA MAXCA KEE IS XIQE SINNI MAXCA

Maxca akak iyyanam namma maxcoy is xiqta exxa kee is xiqe sinni exxal kurrumtay sittal rakuh tani. Isih is xiqata maxca maxca akak iyyanam qangor xisoosay abo kee abina addat tabbixeeh duddale maqna aceesinni. Tonnah is xiqta maxca akak iyyanam maxco maafu exxak teena isih is xiqqa hayteh duddale maqna/ afkan tace waqdi.

Ceelalloh: Qali yemete wak, anu xiinit suge.

Kassiisi

Ta dagal tan ceelalloh Qalii yemete wak iyyanam isih soltam madudday ossotinah afkan faxxa maxca. Tonnah “Anu xiinit suge.” iyyanam isih is xiqak soltam xiqta maxcoh exxa. Toh akah kinnim ximmot xikka inteh is xiqak solta wak maqna / afkan taceem xiqta.

Ceelallo 2:-

Dudda sinni maxca	Dudda le maxca
Yi maqanxa yabte wak	Usuk tibbat suge
Nunu elle wallamal	Kullim bicak ten
Gexeh immay	Uduureh

[Barseena: Ta baxxaqsu sabbuural keenih akitabuk batreenit sinni xaftaaral yaktubeenim]

BARTEENIT TAAMITA EXXA

Ahak gubal kataytah tan esseroorak Dudda le maxcâ kee dudda sinni

maxcâ baxisak uktuba

- | | |
|--------------------------------------|--------------------------------|
| a. Anu kiryaate akah kicinyom | g. Gexak sugeeno. |
| b. Duddale ixxiga faxama | h. Usuk yamatem fanah, |
| c. Is kaxxam takriyeemih sabbatah | i. Barittol meqe ximmo bahte. |
| d. Oson gexanak dumal | j. Yanna buxal sugte |
| e. Hayyeyoona barteek wadiril | k. Kaxxam tikriyek |
| f. Qafar Af kaxxam yol
xabbocowwe | l. Barittol meqe xalu bahetto. |

Isih is xiqe maxca akak iyyanam qangor xisneenay abo kee abna addat le. Ta qangor kaadu isih dibuk soolam maduuda. Ta maxcooci mango innal kurrumtah tohuuy abnigurray, weelô gurray kee migaqal kurruman.

Abni gurrah maxca abna taybulleh tascasse maxca.

Cellalloh:

- a. Qali gufe wak
- b. Buss qambalam maxiqiyyomih taagah
- c. Ayro bukka intam fan,
- d. Temqoh amma intam fanah
- e. Maaqo xammocowtamak naharal

Elle barito

Ciggiltah tan maxcâ maafok dudda sinni maxca kak doorak gubat diilta/fiira/
kak haysa

- a. Faxe num iyyamah, excemik madaara.
- b. Koo hinnay ku awlayti yaamatemih; magexa.
- c. Is faxennah intaamah, madaara tetil maaba.
- d. Ayro tewqe wak, usug xiinit suge.
- e. Xiinit suge wak, alqi qari yol yoogore.

f. Buss qamballam maxiqiyyomih taagah, ibah gexe

MAFDAGAH AMÔGACSA

Tahak dagal qibnaytiinoo kee konnabna itta mafdagah gubal siinih xayyowteh sugteh tanik qibnaytiino maca kinnimiiy, tonnah, baxaabaxsa le kiraatey, axcih ankacsah Qafar ayyunti leh yan qibni cada/konnabna/ iyyah yan ammuntal siinih xayyooweey, yaabiiyyah kaadu tonnaah,

Qibnaytiino wagittaamal walalaanaah, qadaaqadaa kee dooren ammuntal abak raag sittat tabaatabsaanam kee Dooren ammuntal footima nammâ kel baxisak qadaaqada xayyos kee itta barsiyyal abaanam faxximmtam nablu xiqneeh, Kawsah kaadu tonnaah, nihir nagra iyya ammunti kaadu barteenit ta kiraatek kawisak sidiica gurrat axcih kiraatek aakamaay, kiraatek gexsit kee kiraatek cedeenim elle bartan exxak sugte. Tonnaah kalah kaadu aktubiyya wagittaamal kaadu Yagallittet Maxcâ maafoh addat xoqaysimak yaktubeenimi.nablu xiqneh sugne exxak sugte

Tonnaah ellacabol yabti-rakiiboh addal kaadu is duudda maxcaa kee is dude sinni maxcaá kee ken ceelalloola elle nubleh sugne mafdagak sugte

LECEY HAYTÔ MAFDAGA

6. SUGEET IXXIGAA KEE QAADAH ABNISSO

Mafdagah hadafitte:

Barteenit ta mafdaga barteenii lakal yaalloonuwaan xiqto:

- Yanil walalanam kee ankacsaanam akak cedele
- Yanitte ankacisaanam kee walalak, cubbile agaarad abelon
- Ankacisaanam kee ankacisak gacsanamih dudda akak bartelon
- Yabannam kee xongolisanamih dudda akak gabluselon
- Yabiyya kee angaraw cerfatitte gablussa taamomi akak geelon
- Kutbeyta yakriyeenih, kusaaqisanam
- Maasayya kutbeyta akak barte lon
- Maqarle caagidil kutbeyta aktube lon
- Booxal yubleenim meqennal aktube lon
- Af yaanam qangor ixxiga kee maqna kinnim uybulluy
- Edde xinta dadlis
- Inki qaynatih qangor sittal fiiris

Addâfaootu

Sugeet ixxiga kak yaanam inki ayyunti abuk raqtihi sinni num kee lacaay, dariifaay, tonnah inkih yan ayyunta edde catu xiqqah, edde xoqaysimu xiqqah yan horaak, horal tabak temeete ayyunti isih leh wuli saynis kee qasri baritto sinnim loonuh yanin ixxiga yaanama, Ceelalloh nableh nan waqdi, qabaarak elle raaqan gurraay, toomem elle yaymaaqaen gurraay, caacay milaaguu kee baxaabaxsa le num kee lalal taqabi katassu xiqqah tan caabiida naharal kalaalaanam kee toofek cilli kah abaanamal rakuu tan ixxiga.

6.1. ANKACSI KAWSA (40 Minit)

1^{hattoh} Ayyaama

QAADÂ DAYLA

1^{hattoh} Ayro

Asaaki barittoh ximmooma

- Ankacsi kawsa
- Ankacsi kawsak tewqe elle barittoota

6.1.1. ANKACSI MAAKAMA(10 Minit)

Barseeni: Qaadâ dayla iyya ammuntaal siinih xayyooweh yan ankacsi kiraate nakriyeeh ankacissanak naharal aakam esseroora gacsetton. Naharsi esserooh fanah gacnah nan waqdi, Qaada iyyan waqdi maca yaanamaay?

[Barteenit: Baxaabaxsa le gacsitte yaceenim xiqelon]

Barseena: Qaadâ daylaa kee qasri daylak baxsi macaay?

[Barteenit: Baxaabaxsa le gacsitte yaceenim xiqelon]

Barseena: in dariifal qaadâ daylah edde xoqaysiman tumammek taaxigeenimit yaaba

[Barteenit: Baxaabaxsa le gacsitte yaceenim xiqelon]

Barseena: Qaadâ dayla elle bicsan innak taaxigeenimit yaaba

[Barteenit: Baxaabaxsa le gacsitte yaceenim xiqelon]

6.1.2. ANKACSI GEXSIT (15 Minit)

Barseena: “Qaadâ dayla” iyya ammuntaal xayyooweh yan akacsi kiraate barseeni yakriyeh yaan waqdi, barteenit keenih yakriye kiraate 1 yak 5 hortah ken haak akah ankacisan innaa kee xayyoowe ammuntaal esseroora akah ginan innah abaanam faxximta.

QAADÂ DAYLA

Sehdayti baxi qembook ilaa tawayâ fan mango taqabih tan caagiida baxaabaxsa le gurral afdaguk yemeete. Baxaabaxsa le gital, baxaabaxsa le biyaakitteh, kalaluu kee daylah yakke diwaat bicisaanaah, edde xoqaysimak yemeeten. Taqaynatal bicseenih yanin diwaatat abaanah yanin dayli qaadâ dayla deqsita. Ta qaadâ dayli Qafar ayyuntih addal uxi yan barah, edde xoqaysimak geytimaanaah, baxaabaxsa le gurral kaa bicisak edde xoqaysimaanaah, toh axcih, leet ixbiyya heenih, yaaquubeenimiiy, qertah isit ruubaanamaay, dagar edde yaskuteenim kee tumma/atukka heenih dagaral haanamaay ww... taniimih yan. Tonnah baxaabaxsa le duyeeeya asgalluk bicsan.

Ta daylat numuk biyak elle aninnaanah gurral edde xoqaysimanaah, ceelalloh, Qafar ayyunti mangom edde xoqaysimah yan cooxuk, alaytó kak iyyan caxá nableh nan waqdi, baxaabaxsa le biyaakitteh daylaa kee kalaluh edde xoqaysiman. Tonnaah, qertah kaadu, baxaabaxsa le coox kee tumamme asgalluk, ginni utkah innah tanimik qertah sinnit ruubak edde dayliman.

Amôladih nableh nan waqdi, ayyunti addal baxaabaxsa le gurral edde xoqaysimaanaah yanin qaadâ dayla missô gital kusaaqisak kak haanam faxximtah tan caddoo kee maweelol taysem kusaaqal rakitak kak geenik qasri daylah kaxxa doori leh tanim baxaabaxsa le missô tuutatxago qadossa

6.1.3. INIKHAYTOH EXXA: ANKACSAK CEDEENIM (15 Minit)

Barseeni: Tahak gubal siinuh xayyowteh tan ankacsak ceddeenimih esseroora afak gacsetton. Naharsi namma essero sittalih taamitta ineh, raqte esseroora, siinuh kawisak gacsetton. Qemboh essero, Qaadâ daylak kalaaluu kee daylah yakke diwaat elle bicsaanam mannaay? Ta essero gacisnah, nan waqdi, baxaabaxsa le gurral kaa bicisak edde xoqaysimaanaah, toh axcih, leet ixbiyya heenih, yaaquubeenimiiy, qertah sinnit ruubaanamaay, dagar

edde yaskuteenim kee agurra/tumma heenih dagaral haanamaay ww...
taniimih yan.

Barseeni: Qaadâ daylih diwaatak kaxxa taqabih tanim macaay?

[Barteenit: Qadad kak hununuh amixxigewaamih sabbata]

Barseeni: “Qaadâ daylak numuk biyak elle aninnaanah gurral edde
xoqaysimaanama” iyyan waqdi maca yaanamaay?

[Barteenit: Kaah faxxiima dayla kay biyaakal kaah yaceen]

Barseeni: Qertah ruuban daylat akah xoqaysimaanam macaay?

**[Barteenit: Ginni utkah innah tanimik qertah isit ruubak edde
dayliman iyyeenih gacsaanam xiqan]**

Barseeni: Missô tutaaxago qaadâ dayla wagittaamal maca iyyeeniih?

[Barteenit: Barteenit baxaabaxsa le gacsa gacsaanam xiqan]

6.2. YAABIYYAA KEE KAWSA (40 Minit)

1^{hattoh} Ayyaama

2^{hattoh} Ayro

Asaaki barittoh ximmooma

- Yaabiyya
- Kawsa
- Kawsak tewqe elle baritoota bicsaanama

6.3. **NAMMAY HAYTOH EXXA**: YAABIYYA (10 Minit)

Barseeni: Baxaabaxsa le Qafar ayyuntak qaadah abnisso wagsiissa
abnissoosa wagittaamal, ummattâ mabla gaaboysaanam kee buxah taamah

keenih acayuk footimal akah xayyoosan innah abaanam kee Barteenitik yaabiyyi makcâ gur akah dadlannah sissikuk akah yaaban innah abaanama.

6.4. KAWSI MAAKAMA: (5 Minit)

Barseeni: Tahak gubal siinih xayyooweh yan makaabanna iyyah yan kiraate takriyeenik naharal sinnih akak taaxigeenimit elle yabtan kiraatek aakam esseroora gacsetton. Naharsi essero, Makaabanna kak yaanam macaay? Ta essero raddi barteenit baxaabaxsa le gurrall gacsaanam xiqelon.

Barseeni: Makaabanna gexsit mannal yanim may taaxigen?

[**Barteenit: Barteenit baxaabaxsa le gurrall gacsaanam xiqelon**]

Barseeni: Makaabannaa kee malbo baxsaa kee ken tasgoorowem macaay?

[**Barteenit: Malbo kak yaanam makaabannah addat aban madqâ gexsiti iyyeenih gacsaanam xiqan**]

Barseeni: Makaabanna doolat dastuurih madqat booddam siinit may celtaa? Mannalaay?

[**Barteenit: Barteenit baxaabaxsa le gurrall gacsaanam xiqelon**]

Barseeni: Makaabanna elle gexsit abah isih tubleeniih may taaxigen? Tubleenik gexsit kak maca ceelam baxxaqisa?

[**Barteenit: Barteenit baxaabaxsa le gurrall gacsaanam xiqelon**]

6.4.1. KAWSÍ GEXSITI (10 Minit)

Barseeni: “**Makaabanna**” iyya ammuntal xayyooweh yan kiraate barteeni aakam esseroora essereek lakal barteenit, naharal sinnih yaaxigeenimiy, edde yaabinih sugeeni yaysitiloonuuh, lafa, lafale ximmooma akak abbaxuk hangi akah acuwwa heenih kattaatanama.

KAWSA

MAKAABANNÁ

Makabanna Ta qunxa tiyantih addal makaabanna maca kinnim kee makabanna wale maca kinnim ablenno. Makabanna akak iyyanam macay?

Makabanna ma wale leeh inta namma esseero ugut bak maca kinnonum kee Qafar addal makabanna gexsit mannah yan yakumik ciggil luk sugem Ablenno. Qafar ayyuntih addal makabanna deqsitta gexso tan. Makabanna akak iyyanam Qafar Qarrê gitak malboh marrowak akkinnan tekkok figda elle aban gexsiti. Makabanna Qafar ayyunti kaxxam elle kaxxiinita gexsitiy, ayyunti addal madqah rammitanam kee cakkih cakkisitanam, numut tekkem takku lacat tekkem elle yafdigen gexsit.

Ta Qafar addal makabanna mangô nal gexsiisanam kee baxabaxsale caddol gexsiisan qaada. Ta makabannâ fidga kaadu kulli caddol makabanna desitta gexsol fidga geytam kee makabon malak misah aninnaan tabik calli elle yafdigeen. Tah innah nan waqdi Qafar ayyuntih addal tekko akkinnanih gidel fidga geyak sugte. buxah abbak qimbissa hanam taqabih calliyaceenim/ yafdigenimih qaaqa luk sugem kee isih af edde weem yellek kedoh abbat tabisak bisoh intem kaadu caxah abbati baxaabaxsale daqooritik elle gaabowwak yefferenim kaadu kaalibik teenak qarkayto fan orobak sugte.

Makaabanna wale akak iyyanam Qafar ayyuntih addal kaxxam massakaxxale gexsitiy Qadliino le kurim ramidih le. Tah yanam Qafar ayyuntih addal xer udduruh sitta elle geyak xissiten saalam xisneh maro . Makabanna saalam edde baarisan gexsitiy wale kinnim kee xeflih Qafar addal hadliminnan kookaxaw edde yafdigoonuh edde xoqaysiman maro gexso. Qafár ayyuntih garil sugte sugeet gara iyyanam ayyunti addal loowo sinni adbanitteh sugte cakkitanaah, cakkisitanamih qaaday baxsaluk suuget deqsita ayyuntay, Qafar deqsitah garil suge.

Ta garitte mangom mango qunxaanryti Qafár ayyuntih addal garay akah garrowanaah, akah gabbisana masuginna yanam bictah. Tonnah kaadu Cayla kuraanam yanamay qasril (**power delegation**) akak iyyana masuginna

iiyanam bictah takkay immay, Qafar ayyunti kulsale qaaday, elle kaxxinitan luk sugen innam xiqnah toh akah kinnim kaadu nabsi faxit axawah haak hinnay, ayyunti addal tan numma maca akak celtam sekkacacisanamat axawah haak yableenim faxxintam kinni

6.4.2. **SIDOC HAYTOH EXXA:** KAWSAK CEDEENIM (10 Minit)

Barseeni: Tahak dagal siinih xayyooweh suge makaabanna iyya kiraate kawisseenik lakal kak ceddeenimih esseroora gacsetton. Ta esseroora elle gacissoonuwaytaanam namma gurraay, toh axcih saanih kiraateh addak raddi kah gorrisaanam kee amôladih isih elle taaxegen gurral gacissaanam akkele. Barseena: Makaabannal numut tekkem hinnay, lacat tekkem edde yafgiden” itta mablak maca baritnam xiqnaa?

[**Barteenit:** Qafar madqa kullim inkih addat lem kak baritnu xiqna]

Barseeni: “Qafar ayyuntih addal tekko akkinnaanah gidel figda geyta” maca yaanam siinit celtaa? Ceelalloola edde haak, elle agaarak baxxaqisa.

[**Barteenit:** Kawsak iroh baxaabaxsa le gurral gacsaanam xiqelon]

BARTEENITIK TAAMITA

Ciggiltah tan esseroorak dagal elle gacisak sugneh nan gurral rate esseroora gacisa.

1. Qafar ayyunti makaabannaa gexsiti yaceen arac maca ceelaah?
2. Makaabanna salaamah le tuxxiq macaay? Ceelallo edde haak baxxaqisa
3. Amô ladih takiraatek maca baritnam xiqneeh?
4. Makaabannak kulsa le gabaa kee qaku le gammih tubleenimit yaaba?

Barseeni: Ahak gubal yanah yan “A” gubal yan qangor kee muduqqaqi “B” gubal yan qangor kee muduqqaqit kiraate rakiibo abak ramaddosoonuh anu

“A” gubak nibro seecuwaah an waqdi, “B” gubak gacsa kah doorak ramaddoysa

A

1. Wale
2. Figda
3. Af edde weem
4. Maro
5. Ramidi
6. Cakkitiyya
7. Cakkisiyya
8. Kookaxaw
9. Xeflih
10. Sekkactu

B

- A. Buxuxu
- B. Koboxu
- C. Sittin waaya
- D. Mangih
- E. Cogda
- F. Cilli
- G. Qagu
- H. Madqah xayyoysiyya
- I. Madqah ramitiyya
- J. Kay caylak dagah taniimi

RAMADDOS GACSA

1. E 2. F 3. J 4. B 5. A 6. I 7. H 8. C. 9. D 10. G

6.5. AKTUBIYYA (40 Minit)

1^{hattoh} Ayyaama

3^{hattoh} Ayro

Asaaki barittoh ximmooma

- Aktubiyya
- Yabti rakiibo

6.6. **FEREY HAYTOH EXXA:** AKTUBIYYA (20 Minit)

Barseeni: Ahak gubal siinih xakká iyya amuntih gubal siinih xayyowteh tan kutbeytak ceelallok ugutak kutbeyta yaktubeenimi.

XAKKÁ

Xakká kak iyyan digir Qafar leh tan doklak digirwak tiyak teena kinnuk, ta digir namma qaynatah yan. Tohuuy, loqô xakkáa kee barti xakkál tamixxige. Ta digir elle digraanah yanin inna waginnah nan waqdi, naharaak digiruwa mari loowol muggaqsimaanah, tokkeek elle digroonuwaan booxá dooran.

Thuk lakal dooren booxaytuk amokteenal boodo cotaanaah, ta coten boodok qembissa heenih booxak gersi amô fanah labaatanni maaqattah deddartil missah fiiraytu fiirisak, coten boodok kulli gammi namma cusulih raawil maroh fiira haan. Boodok afal namma cusuluk addaarewaa caxxay, kaxxam anabbewaah, kaxxam aqanxewaah gabat kak heen num haan. Ta numuk namma gambit kay qaxoh yan mara kaak haan. Ta num ibak gomboh gacca iyyeh, too boodok afak qambisah yan waqdi, gersi boodoh afal yan numcaxxat yaatuke. Booxaytuk namma amol arkeenah aracal fiira hayyaay, caxxa hee kee xeet kobxisii kee qado saroy allak tambulle elle hayi yakken. Tohuk lakal kaadu namma qaxak qaxiiy, isi arkeena mahaysitaanay, inki arkeena haysitaanaah, booxak arkeena elle tan amô kalih amol xakká qiddimta. Ta qidaanah yaniinim qado caxxa akkiiy, lafá akke takke booxak aki amol sollu iyyeh numuk teyni booxak aki amo fanah isih leemiik qambisa.

Tohuk lakal digra mari inkih xakká elle qambisimte gabû fanah qawtaah, arkeena fanah yarden. Raqqa iyye mari inkih xakká qambise num gagbaanaah, qambise num arkeená fanah dadhaah, ellacabol xake kaa abbixek xage yekkeenik, saga kaak finqqittaah, wanna hinnay,yuftuceh arkeená gabah xagek, saga baahem deqsitta.

Ellacaboh sittah fanah gacisnah nan waqdi, xakka qaxaaqaxoh digran Qafar ayyunti leh yan doklak digiewak tiyak teena kinnih tanim kee ta digir gersi digirwak muxxi kaxxam madqa kah dacrisak digreweenik digir finqitaah, ta digirik saga orobtem deqsittam bicsen arkeena gabah xagaanama.

ELLE BARITTO

Kutbeytak ugutak sinnih taceelallok ugutak kutbeyta yaktubeenimi. Isih yuktubeemi kee gitah tanik waytam isih is massoysaanam absiisaanama.

6.7. **KONNOY HAYTOH EXXA:** YABTI-RAKIIBO (20 Minit)

Barseena: Ahak gubal tanih tan yabti-rakiibo barteenitih baxxaqissah tan waqdi, baxxaqsu sabbuural keenih aktabuk, barteenit sinni xaftaaral yaktubeenim faxximta.

Kassiisi:-

Barseeni: *Barteenitih sabbuural aktabuk keenih baxxaqissah tan waqdi, erkenna le barteenit elle geyu xiqá gurrá tuktubem keenih akrayuk/kawisak keenih baxxaqisaanam mahabbaalina.*

Cemerrak maxcâmafo:-

Kak xissimtam currik tan maxcâmafo kee nammay kee wohuk amo takke qokol maxcâmafof xissima.

Ceelalloh:-

- a. Qali kee qabdu waqlat biiro cultem takkay immay anu ken mageyyo.
- b. Waqlak raqteh temeetek, makiina kok tatrele.

Sahlin maxcâmafo

Sahlin **maxcâmafo** akak xissimta rakiiboh exxa. Is inki abeena kee inki maafeyna tabbixé maxcâmafo kinnih tan waqí, xeflih sahlínuk xissimta.

Ceelalloh:-

Baabur udurrotteh. (Sahlin maxcâmaafu)

Ahak dagal tan ceelallok ugutak cemerraaki maxcâmaafu kee Sahlin maxcâmaafu

Xisak uybullaa.

Cemerrak maxcâmaafu:-

- a. _____
- b. _____
- c. _____

Sahlin

maxcâmaafu

- a. _____

- b. _____

- c. _____

MAFDAGAH AMÔGACSA

Tahak dagal Sugeet ixxigaa kee qaadah abnisso itta mafdagah gubal siinih xayyowteh sugteh tanik baxaabaxsa le kiraatey, axcih ankacsah Qaadâ dayla, iyya ammunti barteenit ta ankacisi kiraatek sidiica gurral axcih ankacsak aakamaay, ankacsi gexsit kee ankacsak cedeemim elle bartan exxak sugte. Yaabiyyah kaadu tonnaah, Baxaabaxsa le Qafar ayyuntak qaadah abnisso wagsiissa abnissoosa wagittaamal, ummattâ mabla gaaboysaanam kee barteenitih buxâ taamah keenih acayuk footimal akah xayyoosan innah abaanam kee Barteenitik yaabiyyi makcâ gur akah dadlannah sissikuk akah yaaban innah abaanama. Kawsah kaadu tonnaah makaabanna iyya ammunti

kaadu bartenit ta kiraatek kawisak sidiica gurral axcih kiraatek aakamaay, kiraatek gexsit kee kiraatek cedeenim elle bartan exxak sugte.

Tonnah kalah kaadu aktubiyya wagittaamal kaadu kutbeyta yaktubeenim kee tonnah ta ceelallok ugutak akah yaktuben inna elle nablu xiqneh sugne exxak sugte Tonnah ellacabol yabti-rakiiboh caddol kaadu cemmerraaki maxcâ maafoo kee sahlín maxcâ maafó kee ken ceelalloola elle nubleh sugne mafdagak sugte

MALCIN HAYTÔ MAFDAGA

7. TASGALLE BARITTO

Mafdagah hadafitte

Barteenit ta mafdaga barteeniiƙ lakal yaalloonuwaan xiqto:

- Fakut tan masayya ankacisaay kib
- ankacisay isi mabla elle ucuy
- yaabak addatiino baaris
- baxabaxsale ayyuntiino madabittel yaabay walala,
- baxabaxsale mabloomi maaqis
- kaatib kee addatiiono fantaaxaw ikriyaay, baxxaqis
- Dooren ammuntal kutbeyta yaktubeenimi.
- Wadirit kafaa kee foocat kafa baxisaanama
- Yabi-rakiiboh xisneenat xoqaysimaanam.

7.1. ANKACSI KAWSAA KEE YAABIYYA(40 Minit)

1^{hattoh} Ayyaama BARITTO KULLI ALQIH

1^{hattoh} Ayro

Asaaki barittoh ximmooma

- Ankacsi kawsaa
- Ankacsi kawsak tewqe esseroora gacsaanama
- Yaabiyya

7.1.1. ANKACSI MAAKAMA(5 Minit)

Barseeni: Tahak gubal siinih xayyooweh yan baritto kulli alqih iyya ankacsi kiraate ankacissaanak naharal aakam esseroora gacsetton.

Naharsi essero fanah gacnah nan waqdi, Baritto kulli alqih iyyan waqdi,

maca yaanam siinit celtaa? Tah yaanam urru nadol, lon dagar erkennal ken kure kalah inkih ken barisnam faxximta yaanama iyyeenih gacsaanam xiqaanah.

Barseeni: Sin buxah addak magidek barittot taniinii?

[Barteeni: Baxaabaxsa le raddi gacsaanam xiqelon]

Barseena: Sin dariifal Dagar erkenna leelaa kee sayyo barittot le gabat agle maca celtaa?

[Barteeni: Baxaabaxsa le raddi gacsaanam xiqelon]

Barseena: Bartaanam maca xiqtam siinit celtaa?

[Barteenit: Bartaanam yan qasri luk meqennal gexxu nee xiqsissa iyyeenih gacsaanam xiqelon]

Ankacsi mabla fayramisaanama

- A. Miic wagitak kiraate maca wagsissam kee macat yabtam baxxaqisa.
- B. Say baxaa kee lab baxah aban wadaadan sin dariifal baxsa may le? Ceelallo edde haak baxxaqisa.

7.1.2. ANKACSI GEXSIT (15 Minit)

Barseeni: “**Baritto kulli alqih**” iyyah yan ankacsi kawsa, barseeni barteenitih yakriyeh yan waqdi, lafa lafa le ximmoomak kassiisenta abbaxuk hangi akah acuwwa heenih ankacisaanam faxximta.

BARITTO KULLI ALQIH

Baritto kulli numuh inki gid takkeeh, sahdah inkih inki gidel yeeceenim faxximta sahdayiino gara. Ta baritto kulli num geyam faxximtaam kinnimih taagah inki gide yakkeeh, inki gid yakke saami barteenitih yaceem xiqa baritto gar geyaanam faxximta. Ni baaxol mango alaaqa baxabaxsale taqabitek gexxaamah baritto geewanamih taqabi yambulle. Tah kaadu baritto buxaaxi kee xaleena leh tan mabla gexxama axcih say baxa baritto buxa fan beewanamay, Nado inki intit ablewaanamih mablaa kee ayyuntiinô nihiritteey, madqaa kee aamantitte sayyok bartaanamih garat keenik gexe

kalit yakke. Tahak ugutak qembô barittoh buxaak ilaa fayya le caddoodal bartah yan say marih qadad daggoowak yemeete. Buxâ mari inki ayyuntiinoh angaaraw kak qembisa fanteena kinni way nado inki gidek ableway, leh yan ayyuntih addal garat keenik elle yaaqiteenim kee elle aytikumusanam tambullee. Tonna kinnuuk, xaltani lab xaylo agirtaay, sayyo kaadu tu xiqe sinni marat ken loowaan. Lab urru faylisaanaah, qoklaanaah, faxeemit haysitaanah yanin gabat agle fayya haanaah, fasli addal bartaanah yanin waqdi, barittô gabat agle anbad le gurral haysitoonu kaxxam ken cattan takkay immay say marat darre cabanamay, dagar ergella leh yan urru baritto buxaaxil oson lon taqabi hangit haak ken hanaawise waanamay, footimah addal keenih faxximah yan barsiyyi cogdat xooqaysime waanam kaxxam taqabih tanbulleh tanimi.

Ta taqabitte calli geytuh kaadu umman buxah mari say baxa takku lab baxa takku, erkenna taallu, kalah yan caalatak gexxaamah urruk baritaanamih gar waasanam waso le tiya. Barteenit qadli lee bartiyya geyaanamih siirat geeyanamal gubay daga takke ayyunti exxaaxi inkim edde akkaluk taamittam faxximta. Baritto buxaaxil ergella le urruh baxsale hangi yaceenim faxximta. Ceelalloh,baritto buxaaxi xisan wak ken hangit haak xisaanamay, barsan wak kutbeeba tatossa keenih baxxaqale gurral barsaanamay, abbiyyi taqabi le barteeni foci korsi fan baahanamay tah kalah tan meqem abittoota addat lemi. Tahak ugutak barteenit bartaanamat inki gid yakke gar lonumih taagah nadooy, erkennaay, duddaa kee akah tanimil ken baxse kal baritaanamih saami keenih fakaanam faxximta.

7.1.3. ENEK HAYTOH EXXA: ANKACSAK CEDEENIM (15 Minit)

Barseeni: Ahak dagal siinih ikriyeeh, toobbeenih tanin, baritto kulli alqih iyyah yan ankacsi kiraatek ceddeenimih esseroora gacsetton.

Naharsi essero, Baritto wagsiisaak ni baaxol mangih yambullee taqbi macaay? Ta essero barteenit baxaabaxsa lennal gacsaanam xeqelon.

Barseeni: Barittô buxal say marih qadad akah dagom macaay?

[**Barteenit: Ayyunti xaqul say baxa barsaanamal loonuh yanin mablá iyyeenih gacsaanam xiqelon**]

TAAMITA

Ciggiltah tan esseroorak Ankacisseenih tanin kiraatek ugutak afak gacisa

1. Buxâ mari inki ayyuntiinoh angaaraw kak qembisa fanteena iyyan waqdi maca yaanamaay?
2. Barteenit qadli lee bartiyya geyaanamih siirat geeyanamal maca abaanam faxximta?
3. Sayyok bartaanamih garat keenik gexe kalit takkem macaay?

7.2. NAMMAY HAYTOH EXXA: YAABIYYA (5 Minit)

Barseeni: barteenit Aakam ankacsak maca yubleenim kee maca cedeenimit yaabaanam kee Celsiisenti gurral yaabanama.

Barteenit: Qemboh baxxaqiseenih yanin caagidil hortah agaarad kee walalal gexisaanama.

7.3. KAWSA (40 Minit)

1^{hattoh} Ayyaama

2^{haytoh} Ayro

Asaaki barittoh ximmooma

- Kawsa
- kawsak tewqe esseroora gacsaanama

7.3.1. KAWSI MAAKAMA

Barseeni: Ahak gubal siinih xayyooweh yan kiraate kawissaanak naharal aakam esseroora gacsetton. Naharsi essero sittalih gacissa hayneh raqteh tan esseroora too ceelallo bicsetton. Qemboh essero fanah gacnah nan waqdi, Hadaf le say num iyyan waqdi, maca siinit celtaa?

Barseeni: Sin dariifal gersi marah ceelallo yakkem xiqá maray meqe caddo maade maay taaxigen? Barseenalih edde agaarada.

[**Barteenit: Baxaabaxsa lennal gacsaanam xiqan**]

Barseeni: Lito hadaf aracat koh gacuh mannah yan macal abaanam faxximtam siinit celtaa?

[**Barteenit: Baxaabaxsa lennal gacsaanam xiqan**]

7.3.2. KAWSIGEXSIT

Barseeni: “**Hadaf le say num**” iyyah yan kiraate, barseeni barteenitih yakriyeh yan waqdi, lafa lafa le ximmoomak kassiisenta abbaxuk, Sittalluk bartiyyi makcâ gurul fasli addal elle agaaradak yakriyeenim faxximta

HADAF LE SAY NUM

D.r Faatuma Qalo Qafar Rakaakayak ferey haytô rasuk Teeri daqaarak Digdigah awdal tooboke. Faatuma ta dariifal say baxá barsaanamal woo gideh kibal aallewah yan ayyuntih mablak assassaqquk Digdigak barittoh gexak suge lab urrih lakat sasot maaca ina teetik wadar gexxa waqdi, inâ lakat wadarat gexxam cella hayteh makitta inteh gexak ten.

Woo urrih afal waroori baxsaanam baritteek lakal buxal baxaabaxsa le duyyeh dagaral tunkuttube kutbe taktubem teetik yuble tet abba barittot koo haamal lab urruk gace raarteh matan, iyye qanxixxe waraakitil tuktube kutbe wagga heeh. Tama faatuma tet abbaa kee dariifâ mari teetih akah axcuk yenê nah “Yi faffiy amey” amey iyyeh amol gaba teetik hayya heeh, beera barittoh urrulihi koo ruubeyyo iyye. Maaca barittô buxah maysaqarrâ duyyee

kee elle barittuwayta dafaatir teetih xaamma heeh, lab urruhih tet beeh, barittot tet culse.

Teeruk magaalak 30 km xeerih tan digdigah awdak ibah gexak baritak ten. Woo saaku 11 karmat ten. Tamannal ibah gexak ferey hayto footimak gaba kalte. Too saaku tet darifal qemboh barittok ta caddo maadde say num takku xiqte. Sinni abbaa kee dariifâ marah too caddol elle kutbe kak faxaanam keenih aktabuk ten. Tama abto faffi kaxxam sinam kicniih calmeqe awka tet abut xiqte. Tet ixgga haytam inkih teetih lon kakanuh, Qalô faffiy axcuk teetih axcuk yenen. Faffi konoy haytoh footima barittuh Samaral sugte tet inah maqanxah buxah gexxeeh, tet inah maqanxa samara sayyô xintimah barittoh buxal tet culusse.

Tama aracal ilaa taban kee nammay elle baritteek lakal, 12 footimal kaxxam fayya le xalu baahak Addis Ababah Jaamiqatak doktireet baritto kixxus Pawloosul malcina sanat gaba kalteek gamadal fayya le ximmo baahak doqaysimtu xiqte. Dubtek Riiferaal Hospitaalat taamah gacak meqe qasbiy, is kee isi buxah mara inkih meqe manot haytu xiqte. Barril sugte tet inaa kee abbay barril sugte magaala oobissaay, ken istiraacissa hayte. Tah taybulleem say baxa barsiteenik numuk gace waytah taniimi. Tonna kinnuuk, Kulli num fafi gufte caddo say baxa maadisuh barsitaah, saamit tet matrisitam faxximta.

7.3.3. SIDOC HAYTOH EXXA: KAWSAK CEDEENIM

Barseeni: Ahak dagal siinih xayyooweh sugeh yan hadaf le say num iyya kawsa kawisseeniik lakal kak ceddeenimih esseroora gacsetton. Naharsi essero, Dr. Faatuma elle toobokem mabaaxooy?

[Barteenit: Qafar Rakaakayak ferey HAYTO rasuk Teeri daqaarak Digdigah awdal tooboqe.]

Barseeni: Faatumah abba barittot tet elle heem mannaay?

[Barteenit: Tet fayxi yuble waqdi tet culse]

TAAMITA

Ciggiltah tan esseroorak tikriyeenih tanin tanin kiraatek ugutak afak gacisa

1. Tet buxah marak muxxi dariifâ mari tet akah kicinuk yenem macaay?
2. Faatuma sinni qasbi haysitteh, is duudde saaku maca abteeh?
3. Ahak dagal neh xayyooweh yan faatumah aydaaduk maca baritnam xiqnaa?

7.4. AKTUBIYYA (40 Minit)

2^{haytoh} Ayyaama

3^{hattoh} Ayro

Asaaki barittoh ximmooma

- Aktubiyya
- Yabti rakiibo

FEREY HAYTOH EXXA: AKTUBIYYA

Gabbaaqi kutbeyta yaktubeenimi.

QEYSAA KEE TET INÁ CINDALI

Caysami qeysa kaxxam baritto fayxi luk ten. Is mangoh yan udduurah tet abba lab xaylo barsaanamak sah tet barsaamih fayxi malim cedde. Tokkel Qeysa qunxuk tenem takkay immay kaxxa geysis kee agirinnay buxal kaxxam teetik yassokoteni luk ten. Ayrok ayrok teena esserteh yinay yabba yoo barsaamih niya akah allewaam macay kak inte.

Tokkel tet ina musuyya inteh yibaxay say baxa barittamah lem maliiy, ni ayyuntih addal soolisen uma qaadodiiy say baxá barittol woo gide yakke

xaluh bahtam maliiy, barittô buxal nek finqitele yaanamih mascaba loonumih taaga immay yi qeysay atu faxxek ku abba akah yaabiseyyooh, baritto buxal koo akah yaysaarrennah kaah warseyyok ayti kum teetik inte. Qeysa kaxxam farcittih yinay koo mawacarroysak ama barittol firqawaytooy ceelallo takke akkenyooh, koo kaadu ni ayyuntih addal ceelallo takke ina koo abeyyo inteeh inah ayti kuma tece.

Tokkel caysami qeysa barritto buxá fan daqaaranamal tet ina Cindali kaa geysisseeh baritto buxa fan tet daqaare. Qeysa kaadu barak laqol culte xagna daabissuh xin waak abteh tan barittol woo barittoh buxa hinnay dariifal tan barittoh buxaaxil ceelallo yakke xalu bahte. Qeysa kaxxam niic kee abaanamih fayxiy, caalat maqaane kee footimah adda qimbot culaanamay, footimah addal takke baritto kaxxa gabat assagolla le say numuy fiqmaa kee bartenit inkih kicna tekke.

Illacabol barittok gaba elle kaltêkel inkih tan bartenit kee footimih caddol fayyale xalu baahak sayyo barisaanamal kibal luk suge wee ayyuntih addal ceelallo tekke. Qeysa dooqaysoh aracal fayu teeceh inkih tan xaalena sayyoo kee labha barsaanamal isinnih xalen xaylok boolaa kee kulsa able kalah xaylo baritto buxaaxi fan ruubanam ken xaylok baanadaminô garak raakibô kinnim keenih qaddosse.

7.5. KONOY HAYTOH EXXA: YABTI-RAKIIBO

Yabti exxaxi baxis

Yabti rakiibo leh tan maqnat dibuk taadiyem hinnay, ahaak amol(a) edde yabneh nan yabti rakiiboh caddol yab ittataxuye kak inneh nanik fayya ta caddol maqna tace qangor xeqsitta. - **Seceeyna'**:Seceeyna' kak yaanam sahdaay, alluwweey, aroocaay, duyyeeyah elle seecan migaaqa.

SEECEEYNÁ KOONA ARACAL KURRUMTA:

Seeceeyná	Ceelalloola
1. Cagalan seeceyna	Mucammad, Qali, Faatuma, Zeynaba, Addis Ababa, Afrikah Gaysa, ww taniimi.
2. Yangalen Seeceyna:	Numu, Barra, Baaxo, Rasu, Daqaara, Makiina, Reyta, Caxa, Sinaama, Agabu, Labha, Gaala ww..
3. Kobox Seeceeyna	Polisi, Saqa, Sinaama, Alluwwa ww... tanii
4. Duyye Seeceena :	Korsi, Tiliphoonu, Kalama, Kalam irsaasa, Kaqaada kee Birta...
5. Qellittaamih Seeceena:	Ixxiga, Kasa, niya, Kacanu, Naqabu Cubbi kee Kassiti.

WEELOOLA

- ✓ Qasah,
- ✓ datah,
- ✓ Xeerih,
- ✓ qunxah,
- ✓ fidinih...

ABNA

Kak yaanam maxcoh addat abinah tascasse qangara. Tonnaah abni amo beyak abna yaanam 3 wargu taybullemi. Too kay wargitte baxsa luk:

- ✓ Edde nan warguuy,
- ✓ Yen warguu kee
- ✓ Yamaatu waa warguuy.

WARGU		
YAN WARGU	YEN WARGU	YAMAATUWAA WARGU
Anu iskooluh gexah an	Anu kimal emeete.	Anu Samara beera gexeyyo
Is awak koo fan tamaateh tan.	Curriya baritto selteh.	Candiya acarra baritto aallele.
Macammad maaqo yakmeh yan.	Qarramis buxah gexe.	Qali asanatih addat aduure le.
Usuk xiinik away ugte.	Urri yokmeenih gexen.	Moomina beera doqaysimele.

ABNIGURRA

Abnigurra kak yaanam, abnah, weelok, geeri abnigurra salta qangara.

Ceelalloh:-

1. Abna salta waqdi:

- Usuk meqennah digre.
- Faras nabam terde.
- Is waqlat tuduure.
- Usuk raageh yemeete.
- Macammad sissukuk yok gexe.

2. Weelo Salta Waqdi:

- Cammadi nabam meqe numu.
- A maaqo kaxxam tamu meqe.
- Badda hununuh koonaa saaqatah gufenno.

3. Geeri abnigurra salta waqdi:

- a. Oson kaxxam meqennah digren.
- b. Kay faras nabam nabam terde.
- c. Tet inâ saqal nabam nabam meqe numu.

ELLE BARITTO

Abnigurri leca qaynatah yan

- A. Gurri abnigurra.
- B. Arac abinigurra.
- C. Uddur abnigurra.
- D. Udurrah abnigurra.
- E. Waadoh abnigurra.
- F. Esser abnigurra.

MAFDAGAH AMÔGACSA

Tahak dagal Qadar itta mafdagah gubal siinih xayyowteh sugteh tanik baxaabaxsa le kiraatey, axcih ankacsah qadar baxxaqsuu kee makeelo iyyah yan ammuntal siinih xayyooweey, yaabiyyah kaadu tonnaah, qadar xisneh cirfat axcih kak xissiimah yan muduqqaqi elle nablu xiqneeh, Kawsah kaadu tonnaah, baaxô qadara iyya ammunti kaadu barteenit ta kiraatek kawisak sidiica gurral axcih kiraatek aakamaay, kiraatek gexsit kee kiraatek cedeenim elle bartan exxak sugte.

Tonnaah kalah kaadu aktubiyya wagittaamal kaadu xabcin qadaritte yaktubeenim elle nablu xiqneh sugne exxak sugte. Tonnaah ellacabol yabti-rakiiboh addal kaadu **qangor migaaqittet tammagge wak abah yan ossitinaani** kee ken roorisak kulli tiyah le ceelallo haak elle nubleh sugne mafdak sugte.

BACAAR HAYTÔ MAFDAGA

8. QADARA

Mafdagah hadafitte

Barteenit ta mafdaga barteenik lakal yaalloonuwaan xiqto

- Ankacsaanam kee kutbel rakitak mabla yaceenim
- Yunkuttubeh yan qadar rakiibo abak agaarad gexisaanam.
- Qadar yakriyeenim kee gaaboysaanam
- Xabcin qadar yaktubeenim kee exxa, exxah yaktubeenim.
- Qadar addat qangor xoqayso baxxaqisaanama

8.1. KAWSA (40 Minit)

1^{hattoh} Ayyaama

QADAR BAXXAQSUU KEE MAKEELO

1^{haytoh} Ayro

Asaaki barittoh ximmooma

- Kawsa
- kawsak tewqe esseroora gacsaanama

8.1.1. ANKACSI MAAKAMA(10 Minit)

Barseeni: Tahak gubal siinih xayyowteh tan aakam kiraateh esseroora, takriyeenik naharal aakam esseroora gacsetton.asmat kak nikriyeek lakal sittalih ablenno. qemboh essero fanah gacnah nan waqdi, Qadar yaanam macaay? Qadar kak yaanamYaabak dooren yaaba iyyeenih gacsaanam xiqaanah.

Barseena: Qadarak xisneh caalat may taaxigeeniih? Barseenah warisa

[Barteena: Baxaabaxsa le raddi gacsaanam xiqan]

Barseeni: Qadar kiraate qadrorti kiraate baxsa lem may siinit celta? Elle agaarada

[Barteena: Baxaabaxsa le raddi gacsaanam xiqan]

8.1.2. ANKACSI GEXSIT (15 Minit)

Barseeni: “Qadár baxxaqsuu kee makeelo” iyya ammuntal siinih xayyooweh yan ankacsi kiraate kulli maasayyah mabla misinkacal amôladisakankacisa. Barteenit kaadu barseeni keenik elle iyyah yan gurral hangi akah acuyya heenih ankacisaanam kee butta, buttah gacak elle agaaradaanam faxximta.

QADAR BAXXAQSUU KEE MAKEELO

Qadar tutaaxago baxaabaxsa le tutaaxago, baxaabaxsa le baxxaqsu akah teceem takkay immay, mangih sitta elle geyan ximmo nableh nan waqdi, Qdar baxaabaxsa le tekkookak ugut abak abaanah yanin, Ayyuntak, ayyuntiinô gexsit yaysubulleh, baxxaqisam xiqa. Ayyunti loonuh yanin qaadaa kee manoh caalatak ugutak keenit toomem kee keenit temqemiiy, niyaatanamaay, tonnah faxaanam edde baxxaqisan. Qadar, Qafar abba hayta digirway, afeytaay, gabat-ilooy, rigdee kee karambo inkih aallek, aallewayta waaneh addat inkih geytima.

Qadar, ahak naharal kah innê nah, xiso leeh, keefaf leeh, ginniimeeh, gaaxime yaabâ kal, qad-rortah yan yaabay faxinnaan innal, edde yaabaana hinna. Qadar gersi yaabak/kutbek elle baxsima weeloh tu gactek mexxatle qangor xisne qaxmeqe le. Toh yaanam umman waqdi qadar qangor yaakumik-ciggiilil daffeysak qangor dooro kee yabti mexxat akak dacrisaanam faxximta

Qadar elle yakriyeenim, qembô muduqqak ellacaboo kee nammey hatto muduqqak qembol dagoom sool axcuk, tonnaah, rortak ellacabol kaadu nagay ufuy rubba haak yakriyen. Ta namma muduqqah fan kaadu, catuffat baxisak beyna.

Amôladih nableh nan waqdi, qadar inki caagid meqe gurrall baxxaqisaah, edde radisam kee uguugusaah, tonnaah, inki caagid baxxaqqa le gurrall yaybulleemiih xiqto le.

8.1.3. ENK HAYTOH EXXA: ANKACSAK CEDEENIM (15 Minit)

Barseeni: Ahak dagal siinih xayyooweh sugeh yan qadar baxxaqsuu kee makeelo iyya kawisseeeniik lakal kak ceddeenimih esseroora gacsetton. Ta esseroora ahak duma akah inne nah namma qaynatal axcih saanih kawsi addak gacissan esseroora kee kinal/ammoladih kak taaxigeenimit yaabak gacissan esseroorah anele. Barteenitih saami acayuk, barseeni keenih akrayuk afak gacsaanam faxximta. Qemboh essero, Qafar abba hayta digirwak, qadar edde geytimam maqaynatih digirwaay?

[Barteenit: Mangih argaadee kee gabat ugra eelli haa doklak digirwat inki geytimah iyyaanam xiqqanah]

Barseeni: Qadar gaaxime yaaba iyyan waqdi, maca yaanamaay?

[Barteenit: Baxaabaxsa le raddi gacsaanam xiqan]

Ciggiltah tan esseroorak Ankacisseeeni tanin kiraatek ugutak afak gacisa

1. Qadar aki yaabak elle baxsimam macaay?
2. Qadar elle yakriyeenim mannaay?
3. Qadar yikcineenim kee yinqibeenimil aban. Iyyan waqdi maca yaanamaay?

8.2. YAABIYYA (40 Minit)

1^{haytoh} Ayyaama

2^{haytoh} Ayro

Asaaki barittoh ximmooma

- Yaabiyya

8.3. NAMMAY HAYTOH EXXA: YAABIYYA

Barseeni: Ahak gubal siinih xayyowteh tan qadar elle xissimah yan gurraak amakkaqak, hortah, hortah gacak elle agaaradak, tonnah qangor kak kusaaqisak elle yaaba.

Mango adda qadar naktubeh nan waqdi mangi, mangi, yanbulleeh yan taqbi qadarak muduqqa takkeh gideh hangi aceewaanam. Toh yaanam inki qadar naktubeh nan waqdi, elle xissimam xiqah yanim, inki muduqqaay, Namma muduqqa kee sidiica muduqqa takkem xiqtah.

INKI MUDUQQA LE QADARIH CEELALLO

Yiinay yi baaxoy,
An kok elle raaqaah,
Kok yoo qelaagissam,
Qigdu matan yiinay
Yiinay yaqassiinay
Kok faxximmataamah
An koh fida akkeyyo.

- ✚ Ta qadar kaa nakriyeh nan waqdi inki qaynatih anayat xongolisimak gexah yan qadara.

NAMMA MUDUQQA LE QADARIH CEELALLO:

Num manol raagek, ablewaam mali.
Sayyo cismi luk sugteeh, cismi lem mali
Wakti garqaa kee, dirabli lem nable
Raceyna sinni xaaguy, yembeggee nable
Num manol raagek, ablewaam mali

Ta qadar kaadu inki muduqqa le qadarih innaah kaa nakriyeh nan waqdi inki qaynatih anayat xongolisimak gexah yan qadara. Takkay ikkah baxsi keenik namma muduqqa le qadar nammay inkih inki rortih addat leh yaniimi. Ta qadar yakriyeh yan mari isih abah innal yakriyem xiqah yan qadara.

SIDIICA MUDUQQA LE QADARIH CEELALLO:

- Hallo tanii, gexak nemeeteh, gexennoh.
- Nagasse, Hallokalih marak ,mafaxa
- Mamaata, Hallokalih marak , mafaxa
- Ku yab, aytih oobba yol yekke, daabaliy.
- Boolol away, dagar xagoh, koo lafaana.

(Raceyna: M.A. Al jowhari)

8.4. KAWSAA KEE YAABIYYA (40 Minit)

2^{haytoh} Ayyaama

2^{haytoh} Ayro

Asaaki barittoh ximmooma

- Kawsa
- kawsa tewqe esseroora gacsaanama
- Yaabiyya

8.4.1. KAWSI MAAKAMA (10 Minit)

Barseeni: Tahak gubal xayyooweh yan qadar kiraate takriyeenik naharal aakam esseroora gacsetton. Ta esseroora sinnih kak taaxigeenimit elle yaabak gacissan esseroora. Qemboh essero, Baaxô qadar tobbeenih may taaxigen.

[Barteenit: Baxaabaxsa le raddi gacsaanam xiqelon]

Barseeni: Baaxô qadar macah aban qadar siinit celtaa?

[Barteenit: Baxaabaxsa le raddi gacsaanam xiqelon]

8.4.2. KAWSI GEXSIT (15 Minit)

Barseena: “Baaxô qadar” iyya ammuntal siinih xayyooweh yan qadar kiraate qangor kee kaalayta kak dacrisak anay fayya haysay ikriya. Barteenit ambad le gabat aglel midaamiduh akah kawisâ nah abaanam faxximta

BAAXÔ QADARA

Qawwaarisa kok nakkek xagana
Kol koo mano gannaamak xagana
Koo gersi marat kallak xagana
Kol rooci meqerraamak xagana
Koo beedi fida abnaamak xagana
Xintooy, bohoyut raqnak xagana
Neegas guqulut kallak xagana
Waalii, gita koh genxak xagana
Koo kee kubicah sollak xagna
Elle cabô num nek anuk xagana
Koo beedi fidabnaamak xagana
Kol nee gine rabbih xagana
Koo gubnay agal le abnak xagana

KACNÍ QADARA

Sokkar innah afat bokok ya moddin liy
Foroddinal radda caysamaliy
An kumaxhaxah hawwa, hawwisam baahe
Dabeelinnah aleekisak gexam baahe
Moynob inna hum axce, nabsi yok koo waa
Yok tabar bagi yaaba siinik af yaaba
Yok raq iyya maraw sinim maral raqtay,
Yok xin iyya maraw sin inti xin waytay.

8.4.3. SIDOC HAYTOH EXXA KAWSAK CEDEENIM (15 Minit)

Barseeni: Ta dagal siinik xayyooweh suge kacni qadar kee baaxô qadarak kawisseeniik lakal kak ceddeenimih esseroora gacsetton. Qemboh essero, Baaxô qadar maakina muduqqak xissiima qadaraay?

[**Barteeni: Barteenit baxaabaxsa le radditte gacsaanam xiqelon**]

BARTEENITIK TAAMITA

1. Maakina rorta leeh
2. Baaxô qadar kee kacni qadar nakriye waqdi kaalaytâ baxsa may le
3. Namma amuntal inkih xayyooweh yan qadarih addal qusba qangor may yan?
4. Ta qadarak qangor dooroo kee xiso maca celtaa?

8.5. AKTUBIYYA(40 Minit)

1^{hattoh} Ayyaama

2^{haytoh} Ayro

Asaaki barittoh ximmooma

- Aktubiyya
- Yabti rakiibo

8.6. FERÉY HAYTOH EXXA: AKTUBIYYA

Barseeni: Baxaabaxsa le ammundittel, tahak gubal siinih xayyowteh tan ceelallok ugutak, xabcin qadaritte aktabuk, axcih kacni qadaraay, naqabuuy, kassitiy, buraay, agiiranni qadaraay, ww tan gitittel qadar maca kak raqtem kee inki qadar kibam faxximtambek waytem numtin amoo kee hortah gacak barseenal xayyoosa.

Tahak gubal sinih xayyooweh yan tirtirah qadar xayyoosan waqdi, ankacsa mari/yable marak qarrantu qidaanaah, xagar kee misinkaca uguugusak leh yan hadafih bagul akah qidaah, rabanâ gida

Ceelalloh:-

TIRTIRÁ

- ✚ Qaran kakkaqoo,
- ✚ Baaxoh abeesa,
- ✚ Cafit gexxa giraa,
- ✚ Kabqî nangallii,
- ✚ Akah abannalii,

- ✚ Nee makal kaalina,
- ✚ Nan rabak saadna
- ✚ Arká maagoowele
- ✚ Qayxiixa weeqele

Ta tirtirah addat yan qadar waginnah nan waqdi, agiru faylissaah, bexxa wacarrissaah, baaxô konnabnaa kee kakanu sehdat culussa.

8.7. KONOY HAYTOH EXXA YABTI-RAKIIBO

Barseeni: Takkel tasaku nabluwaynam yabti-rakiibok, qangor ossotina, sittalih ablenno. Anu sabbuural aktubeh an qangor sinni xaftaaral aktabuk yoo kattaata.

QANGOR OSSOTINA

Qangor ossotina akak iyyanam qangarak baxux/ ramid maqanak baxabasale gurrall korta waka. Tah kaadu qangarak mango gurrall koram korta waka, toh kaadu migaqitteey, abni gurraay, weelo kee abina. Qangor elle ossimam warguuy, loowoy, nadooy, anayitte kee kalah tan sababitte.

Qangor migaqittet tammagge wak abah yan ossitinaani

Dibuh yan migaqa	Mango migaqitte
Danana	Danoona
Reyta	Wadara
Ida	Illi
Idaltu	Idoola
Ina	Inoonti
Maqanxa	Maqanxiixi
Qale	Qaleela
Kalu	Kalitte
Bada	Baditte
Kooma	Koomami

Garbo	Garaba
Daqara	Daqooru
Gita	Gittitte

**ABNA WARGUT AXAWAH HAAK ELLE KORAM KORA INNIH
CEELELLOLA**

Am	Yemete	yamaate
Gex	gexah	gexeh
Ced	cedah	cedeh
Ukum	akme	okmeh

ABNI GURRAL QANGOR ABAH YAN OSSITINA

Sissik	sissikuk
Ered	arduk
Am	amaatuk
Ikriy	akriyuk
Uqub	aqabuk
Soonu	soonitak

WEELOT XOQAYSIMAK GANGOR ABAH YAN OSSOTINAANI

Qasi	Qasuk
Qadi	Qaduk
Xer	Xeeruk
Ceer	Ceerit
Qeero	Qeerot
Qaku	Qakulih

TAAMITA

Barseeni: Tahak gubal yan qangor bartenit fasli addal akah bicissah tan innah, numtin amol sinni xaftaaral aktabuk barseenal akah xayyoosan innah abaanama

Migaaqitteh addal qangor abah yan ossotina wagsiisak Ciggila qangoruk gitah tan qangarah gubat diilta hayis

1. wakri (wakarwa / wakritte)
2. ala (alwa / alluwwa)
3. sahdaytu(sahda/ sahdatte)
4. Inti (Intiita, Intitte)
5. Qari (Qaritte, Qarwa)

MAFDAGAH AMÔGACSA

Tahak dagal Qadar itta mafdagah gubal siinih xayyowteh sugteh tanik baxaabaxsa le kiraatey, axcih ankacsah qadar baxxaqsuu kee makeelo iyyah yan ammuntal siinih xayyooweey, yaabiyyah kaadu tonnaah, qadar xisneh cirfat axcih kak xissiimah yan muduqqaqi elle nablu xiqneeh, Kawsah kaadu tonnaah, baaxô qadara iyya ammunti kaadu bartenit ta kiraatek kawisak sidiica gurral axcih kiraatek aakamaay, kiraatek gexsit kee kiraatek cedeenim elle bartan exxak sugte.

Tonnaah kalah kaadu aktubiyya wagittaamal kaadu xabcin qadaritte yaktubeenim elle nablu xiqneh sugne exxak sugte. Tonnaah ellacabol yabti-rakiiboh addal kaadu **qangor migaaqittet tammagge wak abah yan ossitinaani** kee ken roorisak kulli tiyah le ceelallo haak elle nubleh sugne mafdak sugte.

SAGAL HAYTÔ MAFDAGA

9. INKITTIIHOT AMOLE MAGGINTINAANE

Mafdagah hadafitte

Barteenit ta mafdaga barteenii lakal yaalloonuwaan xiqto

- Ayyuntiiionô daarifa ankacsanam kee baxxaqisanam
- Xabcin walalitte kee agaaraditte ankacsanam kee gabatssagolla
- Barteeni abakraagat yaabanam kee qedaalisanam
- Yaabak adda maqna kee salamatta mekelisaanam
- Baxaabaxsale kiryaate qaynatat xoqaysimanam
- Kubeyta qeedalisanam yaktubeenim kee
- Kubeeba caddooda roorisanama
- Yobben qangor maqnisaanam kee yakriyeenim

9.1. ANKACSI KAWSA (40 Minit)

1^{hattoh} Ayyaama INKIINOL SITTALIH TAAMITANAM

1^{haytoh} Ayro

Asaaki barittoh ximmooma

- Ankacsi Kawsa
- Ankacsi kawsak tewqe esseroora gacsaanama

9.1.2. ANKACSI MAAKAMA(5 Minit)

Barseeni: Ahak gubal siinih xayyooweh yan inkiinol sittalih taamitaanama iyya ankacsi kiraate taabbeenik naharal aakam esseroora gacsetton. Qemboh essero fanah gacnah nan waqdi, Inkittiinoh addat baxsa iyyan waqdi, maca yaanamaay?

[Barteenit: Baxaabaxsa le radditte gacsaanam xiqelon]

Barseeni: Baxsa sittak assakaxxuk, sittalih gexsitaanam maca xiqtaa?

[Barteenit: Baxaabaxsa le radditte gacsaanam xiqelon]

Barseeni: Sin dariifal, baxsa luk baxsa sittak assakaxxuk sittalih taamita mara maay taaxige?

[Barteenit: Baxaabaxsa le radditte gacsaanam xiqelon]

9.1.1. ANKACSI GEXSIT (15 Minit)

Barseeni: “**Inkiinol sittalih taamitaanam**” iyya ammuntal siinix xayyooweh yan ankacsi kiraate anay fayya heeh, yakriyeemi. Barteenit ambad le gabat aglel lafa, lafale qangor kak abbaxuk hangi akah acuwwa heenih ankacisaanam faxximta.

INKIINOL SITTALIH TAAMITANAM

Ceelem kee Goobaze baxabaxsale kedooy, rasuu kee missoyna. Oson umman sittalih taamitan. Oson kaadu baxsale qaaday, af kee ayyuntiinô caalat lon. Oson mango taamomi sittalih taamitanaah, ummaan waqdi, kaxxam sitta yassakaxxeen. Toh kaadu mablaay, dagaraay, Afal inkih baxsa loonumuh sitta assakaxxuk sittalih taamitan.

Sahdak mablâ baxsaleh, baxaabaxsale innal yableenim sugtiyy raqti kinnih tan waqdi, mablâ baxsa iyyaanah yanin waqdi, kaxxam mango ceelalloola ugsaanam nel faxeewaam takkeh. Tohumuk, abbaa kee baxa kinni wakah mablâ baxsa keenikakak le. Tonna leemik amakkaquk, sahda mablâ baxsih taagah sitta tanqibem mafaxximta. Mablâ baxsa kak iyyaanam inki caagid baxaabaxsale gurrallagaaranam kee baxsale tû mabul elle yalleenimi ikkal sahda baxissah tasgoorowem hinna. Toh akah kinnim mablal sitta gee waytaamah inki misinkacay, ilaala mannumih sabbata.

Amolladih axcem mablâ baxsih taagah missoynah caddol sitta yanqibeenimiiy, bisul sitta baxisak umaane sittah loowaanam mafaxximta.

Tohiih taagah mablâ baxsih taagah baxsima mara yakkeenim hinnay, mablâ baxsal sitta assakaxxuk xinta ayyunti xaylo yakkenim aysuk raqta mablaay, mablak daga raqta kinni. Ginok sahda baxaabaxsale fayxi lem takkay immay, baxaabaxsale fayxi baxaabaxsale gurrall sittah yassakaxxeenim faxximta. Toh kaadu ayyuntak sarrimaanê saalam kee saayal kaxxa doori digirtama.

9.1.2. ENK HAYTOH EXXA: ANKACSAK CEDEENIM (15 Minit)

Barseeni: Asaaku nablu waynam, dagal siinih xayyooweh sugeh yan inkiinol sittalih taamitaanama, iyya kiraate kawisseeniik lakal, akak ceddeenimih esseroora gacsetton. Ta esseroora, dumaak kah innâ nah namma gurrall akkele, tohum, saanih kawsak gacsaanam kee amôladih ninnih kak naaxigeemit yaabak elle gacisna gurra akkele. Qemboh essero sittalih ablenno, Celem kee goobaze mannah yan kataysiisiy?

[**Barteeni:** Lon baxsa sittak assakaxxuk sittalih taamitta kataysiisi iyyeenih gacsaanam xiqan]

BARTEENITIK TAAMITA

Ciggiltah tan esseroorak Ankacisseenih tanin kiraatek ugutak dagal tan ceelallok ugutak raqte esseroora afak gacisa

1. “Sehda mablâ baxsah sitta tanqibem mafaxximta” iyyan waqdi maca yaanamaay?
2. Baxaabaxsa le sehda leh tan baxsa mannal sittah yassakaxxeenim xiqaanaa?
3. Sehda leh tan baxaabaxsat inkittinaaneh elle edde xoqaysimaanam xiqaanam mannaay?
4. Ahak dagal neh xayyooweh yan kiraatek maca barittaaanam xiqteeni?

9,2, NAMMAY HAYTOH EXXA: YAABIYYA (5 Minit)

Qafar ayyunti baxaabaxsa le baxsi addat inkittinaane edde baxxaqisan /edde qaddoysan/ missile caddol takku, wonna hinnay, kaadu yabti addat takku addah af le gurra/ /kinal edde baxxaqisan ximmooma ugusak horta, hortah gacak elle agaarakad yaaba.

9.3. KAWSA (40 Minit)

1^{hattoh} Ayyaama

QAADÂ BAXSIH MASSAKAXXAA KEE MEQE ANGAARAW GINAANAMA

2^{haytoh} Ayro

Asaaki barittoh ximmooma

- **Ankacsi Kawsa**
- **Ankacsi kawsak tewqe esseroora gacsaanama**

9.3.1. KAWSI MAAKAMA(10 Minit)

Barseeni: Ahak gubal siinih xayyooweh yan kiraatek kawissaanak naharal aakam esseroora gacsetton.

Barseeni: Qaadâ baxsa iyyan waqdi maca yaanam siinit celtaa?

[Barteenit: Baxaabaxsa le gurrall raddi gacsaanam xiqelon]

Barseeni: Mango baxsi fanat sinaamak anuk meqe angaaraw mannal yanu xiqaa?

[Barteenit: Baxaabaxsa le gurrall raddi gacsaanam xiqelon]

Barseeni: Sin dariifal mangoomul baxsimak meqennal sittalih yan mara may taaxigeen? Yenek sin barseenah warisa

[Barteenit: Baxaabaxsa le gurrall raddi gacsaanam xiqelon]

a. Maggintiinah addat inkiino elle tamaatu xiqtam mannaay?

9. 3.2. KAWSI GEXSIT (16 Minit)

Barseeni: “Qaadâ baxsih massakaxxaa kee meqe angaaraw ginaanama”

iyya ammuntal siinih xayyooweh yan kiraate anay fayya heeh, yakriyeemi. Bartenit kaadu baxaabaxsa le kiryaateh qaynootat xoqaysimak midaamiduh yakriyeenim faxximta.

QAADÂ BAXSIH MASSAKAXXAA KEE MEQE ANGAARAW GINAANAMA

Baxaabaxsa le qaadâ baxsay, baxaabaxsa le mihratittee kee manô gexsit leh tan maritte keenik baxsa leh tan qaada leh tan marittelluk meqe angaaraw kee sittin massakaxxal sittaluk gexsitaanam ken xiqsissah tanim oson loonuh yanin ken qaadah baxsa keenih yassakaxxeenim xiqan waqdi kinni.

Ta xiqto, mango mari elle yaaxigeh yan ayyunti caddo dibuh hinnay, uxxuuk, mihrat caddol nablu xiqnah nan baxsa. Tah ceelalloh waginnah nan waqdi, Barseenaay, Poolisiiy, Caakimiiy, Safiiriiy (Ambasader) ww... tan maritte kulli num keenik leh yan mablaay, caalataay, diiniiy, nihirittee kee qaada keenik baxsintam xiqtaamih sabbatah, tamaraluk abnah nan angaaraw nek kulli num leh yan baxsal keenit nangooroweeh, ken mablaa keel on baxsa keenih nassakaxxem faxximta.

Tah abnah nan waqdi, gersi maralluk linoh nan angaaraw nek yamqeeh, misinkacâ rufto edde geynaah, sittin massakaxxaay, ww... tanim edde geynu xiqna. Tonnah baxaabaxsa le gurral elle nangoorowem xiqnah na caagidal axcih, taamaay, diini aroocaay, kabxaay, ww... taniimil ni bis le maralluk takku nek baxsa leh yan maralluk elle nangooroweemil, meqe fantaaxaw haanam faxximta.

Tannah yan fantaaxaw tah dibuh hinnay, saay kee salaamah kaxxa doori le. Tah yaanam faxe num leh baxsa kaah tessekexxek koo yassakaxxem raq mali. Ta maggintinaaneh addak geynah nan baxaabaxsa le tuxxiiqitte taniih, toh axcih, qaadâ tabaatabsaay, ixigaa kee abak raag kak geynu xiqna. Sehda

leh tan baxsa keenih yassakaxxeeniih, ken caalatal ken assakaxxuk keenilluk aban gexso sittalluk aalliyya dibuk hinnay, inki num umaanek maqaane isik elle cedu xiqá angaarawa innam xiqnah.

9.3.3. SIDOC HAYTOH EXXA: KAWSAK CEDEENIM (15 Minit)

Barseeni: Ta dagal siinih xayyowte kiraatek ceddeenimih esseroora gacsetton. Ta gacissaanah tanin waqdi, namma gurrall gacissaanam xiqetton. Tohum, saanih kawsak gacissan esseroora kee isih akak taaxigeenimit yabtan esserooray amôladih gacissoonuwaytaana. Qemboh essero sittalih ablenno, Baxaabaxsa le mihratittee kee qaada leh yan marallih meqennal gexsinnu nee xiqsissam macaay? Naharaak ken caalat naaxigem kee lon baxsa keenih yassakaxxeenimi iyyaanam xiqaanah.

Barseeni: Mihrat baxsa iyyan waqdi, ta mari baxsa le angaaraw faxam siinit may celtaa? Mannalaay?

[Barteenit: Baxaabaxsa le raddi gacsaanam xiqelon]

Barseeni: Gersi maralluk meqe angaaraw naallem maca xiqtaa?

[Barteenit: Baxaabaxsa le raddi gacsaanam xiqelon]

Barseeni: “Lon baxsa sittah yassakaxxeenim say kee salaamah kaxxa door le” iyyan waqdi, maca yaanamaay?

Barseeni: Ta kiraatek baar luk baritnu xiqnam macaay?

[Barteenit: Baxaabaxsa le raddi gacsaanam xiqelon]

9.4. AKTUBIYYAA KEE YABTI-RAKIIBO (40 Minit)

3^{hattoh} Ayyaama

AKTUBIYYAA KEE YABTI-RAKIIBO

3^{haytoh} Ayro

Asaaki barittoh ximmooma

- Aktubiyya
- Yabt-rakiibo

FEREY HAYTOH EXXA: AKTUBIYYA

Barseeni: Kubeytak baxaabaxsale elaatotal misnkacah esseroora barteenit akah dadlisan innah abaanam kee hortah ken haak elle akah agaaradan innah abaanam faxximta.

Kutbeyta yaktubeenimi

Baxsi addat inkiino

Itoppiya agataa kee agattinah kobox leh tan baxsih addat inkittinaane leeh, qaxmaane bilhadimiyya akah tekke baaxok ceelallo tekkem xiqta baaxo. Agat kee Agatiina dubuk hinnay baxaabaxsale Afitteey, qaada kee kinnaanel sitta assakaxxaduk qimbo baaxo saalam kee say assakaxxuk xiina ayyunta le baaxo.

Kalah kaadu baxabaxsale diinitte luk sittin assakoxxay, sittin kacaanuy, sittah rammitiyaa kee cabsul num numtin diinit tabekalah mariiy isik ikkel isim akak barsaah, katatah yanim takkay immay, tahal baxabaxsale ayyunti irok ken yableh yan maral cakkum takkeh tan baxsi addat inkittinaane leh tan baaxo tet abtu xiqta nihirritte innam xiqnah.

Ta dagal edde yabneh nan baxaabaxsaa kee baxsi addat tanih tan inkttinaane dubuh inki adban akke kee namma adbanak gabbaqanam hinnay mangoh yan daboonal horak horah tababsal teemeteh focah fan kaadu tanu xiqtah tan baaxok baxsale weelo kee gadda. Toh tonnal anuk Qafár ummatta kaadu inki ummattay inki qaaday Af le ummatta kinnim takkay ikkah mangoh tan agat kee agattiinak mafdaga innam xiqnah.ta agat agtiinay Qafar rakakayih addal sigta baxaabaxsale qaadaay, Afittee kee dinnitte le ummatta kinni wakay takkay qaada baxsay, diini baxsaa kee Afti baxsal ken baxse kal naharsiino baxsi addat tan inkittinaaney, sittaluk alliyal, say kee salamah acayuk kallaytol yamixxige ayyunta innam xiqnah.

Sitta fanah gacisnah nan waqdi, Tah kaadu Qafar ayyunti saluh baahem hinnay abuuu akaakayu baxak absumal mangoh tan adbaanitteh gaddoobitte qaada.

Ahak gubal yan “A” gubal yan qangooruy, kiraateh addak yewqeh yani “B” gubal yanih yan qangooruy, ken celta maqna let ramaddoysak gacissoonuh barseeni “A” gubal nibro siinih seeca waqdi, teetih yakke raddi “B” gubak doorak ramaddoysa.

- | A | B |
|---------------------|---------------|
| _____ 1. Xiqto | A. Cogda |
| _____ 2. Massakaxxa | B. Fantaaxawa |
| _____ 3. Rufto | C. Dudda |
| _____ 4. Gurra | D. Ramitiyya |
| _____ 5. Angaarawa | E. Farci |

RAMADDOS GACSA

1. C
2. D
3. E
4. A
5. B

9.5. FERÉY HAYTOH EXXA : YABTI -RAKIIBO

Barseeni: Nammai yakki angaarawat axawle qangor, sittat elle gaadimannaa kee baahah yan weelo sabbuural keenih aktabuk keenih baxxaqisak ken elle agaaradisa.

Nammai yakki qangor akak iyyaanam namma baxsale qangarah baxuxih xisneenay sittal soolak duddale maqna taceem dudda. Tah kaadu qangor baxux kee baxuxuh/ ramid kee ramidih angaluk abah yan ossotinaani. Nammai yakki qangor deflih sittalih ken haan wak / xisan wak baxsale maqanâ digga yaceem xiqqa qangooru.

Ta nammai yakki qangoorih xisneenal qangor yangaleh yan waqdi qusba maqnaay duddale yace. Nammai yakki qangor akak xissimam qangarak ramidih raqta qangara seceena akkiy, abina akkee kee ken nammai kee kalah tan gangor exxaxi likayah sittat xissimta wak tace qusba maqnah xisne.

- | | |
|----------------------|-------------------|
| ✚ Xissime qangor | ✚ Subac doro |
| ✚ Inki-gide | ✚ Xabcin-lee |
| ✚ Qaran-belu | ✚ Shaahî figgaana |
| ✚ Xinaqtimâ qarkayto | ✚ Monok-geera |
| ✚ Ubkak-afal | ✚ Intih-abalal |
| ✚ Ubkak- lalak | ✚ Aytih- obbal |
| ✚ Xooquh xiina | ✚ Qaran alsa |

✚ Alsah ifu

✚ Faxe gurrall

✚ Faxe-gital

Elle baritto

Ciggilta xissiiime qangor suratitteh baxxaqis

- | | |
|------------------|-----------------|
| ✓ Moddin-qadaytu | ✓ Soktô gariiri |
| ✓ Saqi awka | ✓ Qaabâ caxxa |
| ✓ Wadar- asse | ✓ Qarî kolfi |
| ✓ Qaran gayraana | ✓ Kaqaadâ soro |
| ✓ Saahî dabna | ✓ Qari silki |

MAFDAGAH AMÔGACSA

Tahak dagal maggintinaaneh addat inkittinaane itta mafdagah gubal siinih xayyowteh sugteh tanik baxaabaxsa le kiraatey, axcih ankacsah inkittinaanel sittalih taamitaanama iyya ammunti barteenit ta kiraatek ankacisak sidiica gurrall axcih ankacsak aakamaay, ankacsi gexsit kee ankacsak cedeenim elle bartan exxak sugte. yaabiyyah kaadu tonnaah, Kinal yaabanam kee salamatta baarisanamaay kee yemexege ammuntal addak addah walalaanam kee hortah gacak oyti cooca yangeenim kee ittaluk bartiyyi makcaggurul footimal xayyowte addatiionol yaabanama elle nablu xiqneeh, Kawsah kaadu tonnaah, qaadâ baxsih massakaxxa kee meqe angaaraw ginaanama iyya ammunti kaadu barteenit ta kiraatek kawisak sidiica gurrall axcih kiraatek aakamaay, kiraatek gexsit kee kiraatek cedeenim elle bartan exxak sugte.

Tonnaah kalah kaadu aktubiyya wagittaamal kaadu kutbeyta yaktubeenim kee kawsak tewqeh yan qangooruh sitta celta maqna acayuk ramaddoysak yaktubeenimiiy, Tonnaah ellacabol yabti-rakiiboh addal kaadu Nammaay yakki angaarawat axawle qangor kee ken roorisak ken elle naktubem gabatne mafdak sugte.

TABAN HAYTÔ MAFDAGA

10. DABBÓ

Mafdagah hadafitte

Barteenit ta mafdaga barteenii lakal yaalloonuwaan xiqto:

- Ankacsaanam kee sinni ayyuntiinoh dariifa baxxaqisaanam
- Ankacsaanaah, sahlín walal kee agaaratad gaba yassagalleenim
- Baxaabaxsa le mabloomik amô gacsa abaanam
- Baxaabaxsa le ayyuntiinoh caalatal yaabaanam kee agaaradaanam
- Kutbe yakriyeeniih makeelisaanam
- Ossotinâ kutbeeba yakriyeenim
- Kutbeyta yaktubeenim kee footimah xayyos abaanam
- Maasayya dooraanam kee yaktubeenim
- Wadirit kafaa kee foocat kafa sittak baxsaanam
- Kutbeh addaa kee maxcâ maafoh addat qangor maysarraqah maqna yaaxigeenim
- Qangaraay, muduqqaa kee maxcâ maafô xisne yaktubeenimi

10.1. ANKACSI KAWSAA KEE YAABIYYA (40 Minit)

1^{hattoh} Ayyaama

DABBO KEE DABBO KATASSA CALWAYITTE

1^{haytoh} Ayro

Asaaki barittoh ximmooma

- Ankacsi Kawsa
- Ankacsi kawsak tewqe esseroora gacsaanama
- Yaabiyya

10.1.2. ANKACSI MAAKAMA (5 Minit)

Barseeni: Tahak gubal siinih xayyooweh yan Dabboo kee dabbo katassa calwayitte iyyah ankacsi kiraate ankacissaanak naharal aakam esseroora gacsetton. Ta esserorak sinnih elle taaxigen gacsetton. Naharsi essero fanah gacnah nan waqdi, Dabboh sabab takku xiqtam maca siinit celtaa? Ta esseroh gacsa fanah gacnah nan waqdi, baxaabaxsa le raddi gacsaanam xiqqanah laakin lafaluk qayxiixannu takkem bictah iyyeenih gacsaanam xiqan.

Barseeni: Dabboh gexaanam sehdal katassu xiqta taqbi maca siinit celtaa?

[Barteenit: Baxaabaxsa le raddi gacsaanam xiqelon]

Barseeni: Sin dariifal dabboh gexeenim manol taqabi kak katasse mara may taaxigen? Sinni barseenah warisa.

[Barteenit: Baxaabaxsa le raddi gacsaanam xiqelon]

Barseeni: Dabboh gexaanam baxsa luk laftah tan ayyunti exxaaxi tanim siinit may celtaa?

[Barteenit: Baxaabaxsa le raddi gacsaanam xiqelon]

10.1.3. ANKACSI GEXSIT (15 Minit)

Barseeni: “Dabboo kee dabbo katassa calwayitte” iyyah yan ankacsi kiraate, barseeni barteenitih yakriyeh yan waqdi, mablâ garay kee dokumentarî gurral xayyossanama. Barteenit kaadu, lafa lafa le ximmoomak kassiisenta abbaxuk hangi akah acuwwa heenih ankacisaanam faxximta.

DABBO KEE DABBO KATASSA CALWAYITTE

Mango maritte baaxok baaxo dufah gexaanam kee xer gititte badaay barrih argaak gexeenam tambulle. Ta maritteeta dufah baaxok baaxo akah gexxa sababitte mangom takkay immay deflih baali keenik elle yanin baaxok gersi baaxol taama saamih assissenno yaanamal gexen. Ta baaxok gersi baaxo dufaanamat mano milaagi yanimih akkalah dulah yan mari mangom manol

tayse saamitte genno axcuk dufaanam takkay immay, mangih gititteh adda kee qusubih dulan baaxo kaxxa taqabitte ken taafe. Maddur taqabiyyi, diini kee siyaasa taqabittey ila mano edde waanamah fanah tan taqabitte ken taafe. Dabboh marin baaxo gexah yan maritte maadda taqabittek maddur taqabi tiyak teenah raaqa. Toh akah kinnim num isi buxak bukka iyyamay ni yaate baaxo fan culla iyyam mangoh yan maalu akah bayisan. Maalu sinnim kaadu yasillimem maduuday, woo maalu alle week rabah fanah yan taqabittek bakaray, qululuy, ceyay cabaydaru kaa edde tabbixe. Gari inkinnah buxak yewqeenik geera maali akak yemmexek daaran mageyay rabak nuwak keenik waytima.

Tonnah inki inki adda kaadu niyaate baaxo gufek lakal isi baaxol luk suge curriyatak tu geewam bictaah. Sahdayti baxih cakki elle axige waan baaxoxal currik gacca iyyeh isi diiniy, qaada kee siyaasa currino mageeyanay woh isih manol kaa yaafe dufittek lafet le gammi. Isi baaxol diini dacrisak sugaah, siyaasat gabah assagolla yallenim kee currino hinnay kaxxa agxe kaa edde tabbixe calatitte kaa taafe. Too isi baaxol akah aba ken innah currih angayye liyoh, innih faxem elle faxinnan innal agdubeyyo iyyanam suur kay garil cabtah manol ceena kaa tabbixemih taqabi kaa mada.

Illacabol dufah gaanunuk iroh baaxok baaxo gexaanam mangoh tan taqabitte sinam maadissaamih taagah, sahda baaxok baaxol aysiseenoy, taama saamiy, currino goramn kee kalah tan taqabittek marin baaxol affofoeno axcuk dufaanamak, isinni baaxol saayay, salam dacrisaakay, mano milaagonuh barak laqol taamitanamat mano milaaguy, currino inkih edde tanimih taagah ganunuk iroh say kee salam anuk gersi baaxo dufanam mafaxximta.

10.1.3. ENNEK HAYTOH EXXA: ANKACSAK CEDEENIM (15 Minit)

Barseeni: Ahak dagal siinih xayyooweh sugh yan **Dabboo kee dabbo katassa calwayitte** iyya ankacisseeniik lakal kak ceddeenimih esseroora gacsetton. Ta esseroora saanih kiraateh addak elle toobben innaa kee sinnih elle taaxigen innal inkih gacsetton. Qemboh essero, Mango mari baaxook, baaxo dabboh ken beytam macaay? Tayse manoh gorana innah gacisnam xiqnah.

Barseeni: **Kaxxam meqe.** Dulah baaxook, baaxo aban gexot marin baaxol waanam xiqan curriino macaay?

[**Barteenit: Isi diiniy, qaada kee siyaasa currino mageeyanay who isih manol kaa yaafe dufittek lafet le gammi**]

Barseeni: Dabboh sinni baaxok marin baaxô fanah gexe num fanal maali kaak yembexek maca abaah?

[**Barteenit: Baxaabaxsa radditte gacsaanam xiqelon**]

Barseeni: Maaluk gabat tu takkem luk dabboh gersi baaxo fanah sinam beytam macaay?

[**Barteenit: Baxaabaxsa radditte gacsaanam xiqelon**]

Barseeni: Sinam dabboh sinni baaxok gersi baaxo fanah gexewoonuh maca abaanam faxximtaa

[**Barteenit: Baxaabaxsa radditte gacsaanam xiqelon**]

Barseeni: Dagal neh xayyowte kutbeytak maca barittoonu xiqteenii?

[**Barteenit: Baxaabaxsa radditte gacsaanam xiqelon**]

10.4. NAMME HAYTOH EXXA: YAABIYYA (5 Minit)

Barseeni: Baxaabaxsa le dabbo wagitta caagiida massoysak barteenit akah yaaban innah abaama. Toh axcih dabbo bahtah tan taqabii kee tû-kalooutut horta, hortah gacak akah yaaban innah abaanam faxximta.

10.5. KAWSA (40 Minit)

1^{hattoh} Ayyaama UMA DABBOH AYDAADU

1^{haytoh} Ayro

Asaaki barittoh ximmooma

- Kawsa
- kawsak tewqe esseroora gacsaanama

KAWSAK

10.5.1. KAWSI MAAKAMA(10 Minit)

Barseeni: Tasaaku tahak gubal siinih xayyooweh yan uma dabboh aydaadu iyya kiraate kawissaanak naharal aakam esseroora gacsetton. Kulli gaba eyeeqqa haak barseeni gabah kah yacee barteeni afak gacsele. Qemboh essero, Dabbo yaanam macaay?

[Barteenit: Baxaabaxsa radditte gacsaanam xiqelon]

Barseeni: Uma dabboh aydaaduh sin dariifal taaxigeenim may liton?

[Barteenit: Baxaabaxsa radditte gacsaanam xiqelon]

Barseeni: Mango uddur dabbol say maraa kee lab marak muxxi biyaakittam iyya siinit celtaa? Ceelallo edde haak barseenah warisa.

[Barteenit: Baxaabaxsa radditte gacsaanam xiqelon]

10.5.2. KAWSI GEXSIT (15 Minit)

Barseeni: “Uma dabboh aydaadu” iyyah yan ankacsi kiraate, barseeni barteenitih yakriyeh yan waqdi, Barteenit kaadu, Tibbaa kee numtin amoh caalatal yakriyeenim faxximta.

UMA DABBOH AYDAADU

Yooy, yiinaay, yabbaay, yitoobokoo kee yi maqanxix carsis deqsitta qunxa magaalal guubuh sugne. Yabba taamiteh orbisam woo gide kaak akkuk masugooy, luk sugneh nan saqay barril luk sugneh nani qabaarat nek tembexeeh, tohih sabbatah magaala culleh sugne. Yabba inkinki waqdi, quuka abak nakmem edde neh orbisak addararuk sugne. Anu yitoobokoo kee maqanxiixik karmah naharat sugeemih sabbatah, inkinki taamoomi geek taamitak suge. Tama caalatal elle sugga enne waqdi, ayrok, ayrokteena, yabba kaxxa biyaakah biyaakiteeh, too biyaakak ure kalah edde rabbaasite.

Woo ayro nel kaxxam uma ayrok sugte. Yiina neh abatam gabat aalle kalah tet gubat tu aalle kalah raqneemih sabbatah yiina kaxxam tuczuneh sinaamak geyna catoh elle addararuk sugga inne waqdi, nek cuggaaneh sugte qasawka deqsitta awká suquudiya gexxa itteh, isi inaa kee abbah qari xissaay, istiraacissa hayteemit caafatal sinam inkih yabtah, nelluk kaadu tama massamaqqoo kee gaddat neh walalak ten. Ayrok, ayrok teena ta yiinaa kee tooboko mannal catam xiqaaam ifikkirra hee waqdi, ta qasawkah innaah, irô baaxo gexxa exceh, innii kee inni buxah marih mano milaageyyo exceh uscube.

Tokkeek, lakal anu yiinah uscubeh anim warissa heeh, maca taysemil malisnah nan waqdi, yi toobokoo kee maqanxix yoobbeeni, say tooboko is elle gexinnaan gatul kollih gexenno yaanam teetik iyyen. Tamannal elle sugga iyyeenih ina keenik dagoo taamay hotel addat ayrô taama baxa geyte. Ayrok ayrok teena suquudiya gexeyyo exceh edde uscubba heeh gexaamat malseeh, qunxa maqanxix kaadu kok maraqna iyyeenih ken luk sittalih gita qembisneeh, ta gexo niina nek aaxaguk maraaqooy, makitneh teetik gene. Tama qunxa maqanxix luk gita elle gennaamal baaxo manaaxigaay, gital qulul kee bakaarih magad nekke. Elle amaatinnaan aracal lakqoh esserooy,

ugraay, caylisenta inkih tatusak yaman alsitteek lakal culle. Tama yamanal kaadu tama gital tatusak amma innem inkih nel oobak, tonnah qiden marih lafof kee yexeen maray, yaagureeniyy, baxaabaxsa le gibdaabinih addat yan mara abaluk namma sanat elle sugne.

Tama mango calwayaak lakal, suquudiya culaanamih saami geyne. Tama suquudiyal kaadu anu buxah addah taama geeh immay, yi maqanxix taama maadweenimih sabbatah taama geyaanam maxiqinnon. Tama aracal sidiica alsa taamitak sugga exce waqdi yi maqanxix mamaxxaga luk sugewayneemih sabbatah qaskar raafah nee tibbixeeh, raafah ni baaxo fanah nee gacsen. Tama arac nee gacseenimih Alcamdulillah inneeh, gabat tu neh xiqtam luk adaarewaynay ikkah, mango udduurah kak neddeereh sugneh nan ina fanah genxeh nan waqdi afracuk asaaluq nemeeteeh, buxah nemeeteeh nan waqdi, ina nek buxal masuginna. Is nanu edde genneh nan sanatat edde arkaa kee qulul edde engella itteh rabbasitteh neh sugte. Dabboh niina cabba hayneh gennem kaxxa nadaama nel tekkeeh, ta inay, ablekalah nek rabteh tani kaxxa cuzni nel tekkeeh, dabbô gexo calwayak inkih lafta calway, ku buxah mari rabek yanim aaxige kalah aban gexoo kee madaara kinnim kak uble. Dabbo sehdayti baxak dagaral bahta taqbik muxxi, misinkacal katassa taqbi kaxxam fula le.

10.5.3. SIDOC HAYTOH EXXA: KAWSAK CEDEENIM (15 Minit)

Barseeni: Tahak dagal siinih xayyooweh sugeh yan uma dabboh aydaadu tikryeeniih gaba kalteeniik lakal kak ceddeenimih essero gacsetton. Ta esseroora dibuk kawsal rakitak gacissoonuwaytan esseroora.

TAAMITA

Ciggiltah tan esseroorak Ankacisseenih tanin kiraatek ugutak afak gacisa

1. Zamzam elle toobokem mamigaq le baaxooy?

2. Zamzam kee maqanxix dabboh akah gexxem macaay?
3. Tet kee maqanxix gital ken matre calway macak sugtee?
4. Dabboh gexen saaku inak kah makteenih gexeenim maca siinit celtaa?
5. Ta dagal siinih xayyoowe aydaaduk maca kak barittaaanam xiqteenii?

Dooroh esseri

Barseeni: Ahak gubal tan dooroh esserooray kawsak tewqeh tanik barseeni esseroora kawsah yan waqdi, bartenit gitah tan wara doorak gacisa

1. Kawsak ugutak zamzamak abba luk sugem maqaynatih taamaay?
A. Quuki taama B. Cayli taama C. Kabxa D. A kee B gacsa
2. Zamzam kee buxâ mari magaala fanah kah cultem macaay?
A. Baritto bartoonuh yemeeten C. Buxâ marâ fanah yemeeten
B. Luk sugen midir keenik yembexeemi D. Tayse manô fayxih yemeeten
3. Zamzam abbakah rabem maca sababaay?
A. Biyaakah rabe
B. Qawwalaylat rabe
C. Carbit rabe
D. Gacsa mali
4. Zamzam suquudiya fanah akah gexaanamat ken bahtem macaay?
A. Ken wadaytoh milaagu yubleenimi
B. Tayse manoh fayxi
C. Wacaysir aboonu

D. A kee C gacsa

DOOROH ESSEROORAH GACSA

1. D
2. B
3. A
4. D

10.6. AKTUBIYYAA KEE YABTI-RAKIIBO (40 Minit)

3^{hattoh} Ayyaama

3^{haytoh} Ayro

Asaaki barittoh ximmooma

- Aktubiyaa
- Yabti-rakiibo

FEREY HAYTOH EXXA AKTUBIYYA (20 Minit)

Maasayya kak yaanam sitta abuussa maxca^mafoh buttay inki leena^takkusa xayyossaah, gablusak gexxah iyya. Mango waqdi bool qangara, hinnammay malciiniik ilaa taban fan takke maxcammafo addat tabbixu xiqta.

Baxaabaxsa le maasayyah qaynoota tanim takkay immay akkel nablawaynam gacgacsi maasayya ablenno.

Gacgacsi maasayya

Akak yaanam yaktube num inki caagidil isi mabla gitat tanim ayballayuk tuh sabab abak xayyoosaanama.

Ceelalloh:-

Kumpeetar digir baadal mango ayyunti edde xoqoysima. Kaadu mango buxah mari kaa lon.

Takkay immay kumpeetar digirritte (games) mango taqabik ugutma tekke. Tohuuy;-ayyuntiinol baritto kee qunxaaneytal kaxxa taqabi katassa. Qimboh, qunxaaneytal kumpeetar digirritte bahta taqabitte Waqla bayissaah, barittol kaxxa taqabi katassa, ixxiga kee dariifal xinteh maacissem mayaaxigaanaay.

Amolladih nable waqdi, ayyuntiinol baaha taqabi qidaddol, lakqol, dadal kee biso maxco taamoomik wadirih koo raaqissa.

10.7. KONOY HAYTOH EXXA YABTI-RAKIIBO (20 Minit)

Barseeni: Ta yabti-rakiiboh caalatak Aboo kee abni fanih fantaaxawitte bartenitih baxxaqissah tan waqdi, sabbuural keenih aktabuk keenih baxxaqisam kee yuktubem afak keenih akrayuk ken elle agaaradisaama.

[Bartenit: sinni xaftaaral aktabuk kattaatanam faxximta]

Abo kak yaanam, maxcâ maafok rakiiboh tan exxaay maxcô maafu yab elle soolah iyyak tiyak teena (exxak teena) xeqsita. Too wak abo kak iyyoonu duuduntam, migaq akkiyy, aboh ciggiile akki takke kaallih kaa saltaah kaa “modifiers” abtaamak qangooruk faxem kallih tanay. Abna iyyanam sahda abtah tan abto.

Sahlaan Aboo kee Sahlaan maafeyna

Ceelalloh:

1. **Qalii yemeete**
2. **Macammad gexeh**

Dagal tan namma maxca maafol nablu dudnam, abo (Macammad kee Qalii) isih yan maxcah addat dibuk yaniih (qangooruk tu kaallih matanaay) sahlaan abo xeqsita. Too namma maxcah addat (Yemeete kee gexeh) sahlaan maafeyna deqsitta.

GITAH YAN ABNA AKAH XOOR

Ciggiltah tan maxcâ maafofah gitah yan abna qarwali addak doorak edde kiba

[kayne/ kaaye]	[yemete / yemeten]	[yaduuren / yaduure]
[walaale / walalen]	[tuktube / yuktuben]	[nemete / yemeten]
[yaktube / tuktube]	[teemete/ tamaate]	[gexe/gexen]

1. Yoo kee yi kataysa [**kayne/ kaaye**]
2. Usuk safarak[**yemete / yemeten**]
3. Oson sittalluk [**gexen/ gexe**]
4. Acmad qumqatah [yaduuren / yaduure]
5. Num isi qaafiyatih mihratli lih [**walaale / walalen**]
6. Is kitab [**tuktube / yuktuben**]
7. Nanu safarah allak [**nemete / yemeten**]
8. Usug isi kitab [yaktube / tuktube]
9. Kimal carra yollih [teemete/ tamaate]
10. Qalii kee Qaysha buxh [gexe/gexen]

GACSA

1. Yoo kee yi kataysa **kayne**.
2. Usuk safarak **yemete**.
3. Oson sittalluk **gexen**.
4. Acmad qumqatah yaduure.
5. Num isi qaafiyatih mihratli lih **walale** .
6. Is kitab **tuktube**.
7. Nanu safarah allak **nemete**.
8. Usug isi kitab yaktube.
9. Kimal carra yollih teemete.
10. Qalii kee Qaysha buxah gexen.

MAFDAGAH AMÔGACSA

Tahak dagal dabbo itta mafdagah gubal siinih xayyowteh sugteh tanik baxaabaxsa le kiraatey, axcih ankacsah dabboo kee dabbo katassa calwayitte iyya ammunti barteenit ta kiraatek ankacisak sidiica gurral axcih ankacsak aakamaay, ankacsi gexsit kee ankacsak cedeenim elle bartan exxak sugte. yaabiyyah kaadu tonnaah, Baxaabaxsa le dabbo wagitta caagiida massoysak yaabaanama. Toh axcih dabbo bahtah tan taqabii kee tû-kalootut horta, hortah gacak akah yaaban innah abaanam faxximtam elle nablu xiqneeh, Kawsah kaadu tonnaah, uma dabboh aydaadu iyya ammunti kaadu barteenit ta kiraatek kawisak sidiica gurral axcih kiraatek aakamaay, kiraatek gexsit kee kiraatek cedeenim elle nablem gabbatne exxak sugte.

Tonnaah kalah kaadu aktubiyya wagittaamal kaadu gac gacsi maasayya yaktubeenimi kee kawsak tewqeh yan doorit esseroora gacseenimiiy,

Tonnaah ellacabol yabti-rakiiboh addal kaadu Aboo kee abni fanih fantaaxawitte kee maxcâ maafoh addat gitah yan abna akah xooran inna kee ken ceelallo nablem gabatne mafdak sugte.